

欽定唐書

卷一百十八之一百二十七

列傳

土岐文庫

文庫17

W202

21

30

25

20

15

10

文庫 17
W202
21

010185193719

昭和六十年二月一日
土岐孝吉藏書

唐書卷一百十八

宋 端 明 殿 學 士 宋 祁 撰

列傳第四十三

張韋韓宋辛二李裴

張廷珪河南濟源人慷慨有志尚第進士補白水尉舉制科異等累遷監察御史按劾平直武后稅天下浮屠錢營佛祠於白司馬坂作大象廷珪諫以為傾四海之財殫萬民之力窮山之木為塔極冶之金為象然猶有為之法不足高也填塞澗穴覆壓蟲蟻且巨億計工員窮窶驅役為勞饑渴所致疾疹方作又僧尼乞匄自贖而州縣督輸星火迫切鬻以充非浮屠所謂隨喜者今天下虛竭蒼生彫弊謂宜先邊境實府庫養人力后善之召見長生殿賞慰良厚因是罷役會詔市河南河北牛羊荆益奴婢置監登萊以廣軍資廷珪上書曰今河南牛疫十不一在詔雖相市甚於抑奪併市則價難準簡擇則吏求賄是牛再疫農重傷也高原耕地奪為牧所兩州無復丁田牛羊踐暴舉境何賴荆益奴婢多國家戶口姦豪掠買一入於官永無免期南北異宜至必生疾此有損無益也抑聞之君所恃在民民所恃在食食所資在耕耕所資在牛牛廢則耕廢耕廢則食去食去則民亡民亡則何恃為君羊非軍國切要假令蕃滋不可

乾隆四年校刊 唐書卷一百十八 列傳



射利后乃止張易之誅譏窮治黨與廷珪建言自古革命務歸人心則以刑勝治今唐歷不移天地復主宜以仁化蕩宥且易之盛時趨附奔走天下盡誅則已暴罰一二則法不平宜一切洗貸中宗納之神龍初詔白司馬坂復營佛祠廷珪方奉詔抵河北道出其所見營築勞亟懷不能已上書切爭且言自中興之初下詔書弛不急斥少監楊務廉以示中外今土木復興不稱前詔掘壞伐木喪害生氣願罷之以紓窮乏帝不省尋爲中書舍人再遷禮部侍郎玄宗開元初大旱關中飢詔求直言廷珪上疏曰古有多難興國殷憂啟聖蓋事危則志銳情苦則慮深故能轉禍爲福也景龍先天間凶黨構亂陛下神武汛掃氛垢日月所燭無不濡澤明明上帝宜錫介福而頃陰陽愆候九穀失稔關輔尤劇臣思天意殆以陛下春秋鼎盛不崇朝有大功輕堯舜而不法思秦漢以自高故昭見咎異欲日慎一日永保太和是皇天於陛下瞻顧深矣陛下得不奉若休旨而寅畏哉誠願約心削志考前王之書敦素樸之道登端士放佞人屏後宮減外廡場無蹴鞠之玩野絕從禽之樂促遠境罷縣戍矜惠悃獨薄徭賦去淫巧捐珠璣不見可欲使心不亂或謂天戒不足畏而上帝馮怒風雨逆錯荒饑日甚則無以濟下矣或謂人窮不足恤而億兆攜離愁苦昏墊則無以奉上矣斯安危所繫禍福之原奈何不察今受命伊始華夷百姓清耳以聽刮目以視冀有聞見何遽孤其望哉再遷黃門侍郎監察御史蔣挺坐法詔決杖朝堂廷珪執奏御史有

譴當殺殺之不可辱也士大夫服其知體王琚持節巡天兵諸軍方還復詔行塞下議者皆謂將襲回紇廷珪陳五不可且言中國步多騎少人齋一石糧負甲百斤盛夏長驅晝夜不休勞逸相絕其勢不敵一出軍掩敵兵不數萬不可以行廢農廣饋飢歲不支二也千里遠襲其誰不知賊有斥候必能預防三也狄人獸居積漠譬之石田克而無補四也天下無年當養人息兵五也又請復十道按察使巡視州縣帝然納之因詔陸象先等分使十道時遣使齋繒綿至石國市犬馬廷珪曰犬馬非土性弗畜珍禽異獸不育于國不宜勞遠人致異物願省無益之故救必然之急天下之幸坐漏禁內語出爲河州刺史頻徙蘇宋魏三州初景龍中宗楚客紀處訥武延秀韋温等封戶多在河南河北諷朝廷詔兩道蠶產所宜雖水旱得以蠶折租廷珪謂兩道倚大河地雄奧股肱走集宜得其歡心安可不恤其患而殫其力若以桑蠶所宜而加別稅則隴右羊馬山南椒漆山之銅錫鉛錯海之蜃蛤魚鹽水旱皆免蠶獨南北外於王度哉願依貞觀永徽故事準令折免詔可在官有威化入爲少府監封范陽縣男以太子詹事致仕卒贈工部尚書諡貞穆廷珪倖姿儀善八分書與李邕友善及邕躓於仕屢表薦之人尙其方介云

韋湊字彥宗京兆萬年人祖叔諧貞觀中爲庫部郎中與弟吏部郎中叔謙兄主爵郎中季武同省時號三列宿湊承瀆初解褐婺州參軍事徙資州司兵觀察使房昶才之表于朝遷揚州法曹州人孟神爽罷

仁壽令豪縱數犯法交通貴戚吏莫敢繩湊按治杖殺之遠近稱伏入爲相王府屬時姚崇兼府長史嘗曰韋子識達文詳吾恨晚得之六遷司農少卿忤宗楚客出爲貝州刺史睿宗立授鴻臚少卿徙太府兼通事舍人時改葬故太子重俊有詔加諡又詔雪李多祚等罪議贈官湊上言王者發號出令必法天道善善著惡惡明也賞罰所不加則考行立諡以褒貶之臣議其君子議其父曰靈曰厲者不敢以私亂公也臣伏見故太子與多祚等擁北軍犯宸居破扉斬關兵指黃屋騎騰紫微和帝御立武門親諭逆順太子據鞍自若督衆不止逆黨悔非回兵執賊多祚伏誅太子乃遁去明日帝見羣臣涕數行下曰幾不與公等相見其爲危甚矣臣子之禮過位必趨感路馬芻有誅昔漢成帝爲太子行不敢絕馳道秦師免胄過周北門王孫滿策其必敗推此則太子稱兵宮中爲悖已甚以斬三思父子而嘉之乎則弄兵討逆以安君父可也因欲自立則是爲逆又奚可褒此時韋氏逆未明義未絕於太子母也子無廢母之理非中宗命廢之則又劫父廢母且君或不君臣安可不臣父或不父子安可不子晉太子申生諡曰恭漢太子據諡曰戾今太子乃諡節閔臣所未諭願與議諡者質於御前使臣言非即甘鼎鑊之誅申大義示天下臣言是耶咸蒙冰釋不復異議如曰未然奈何使後世亂臣賊子資以爲辭宜易諡以合經禮多祚等罪云免而不云雪帝瞿然引內閣中勞曰誠如卿言業已爾奈何對曰太子實逆不可以褒請質行以示時

大臣亦重改唯羅多祚等贈官景雲初作金仙等觀湊諫以爲方農月興功雖贊出公主然高直售庸則農人捨耕取傭趨末棄本恐天下有受其飢者不聽湊執爭以萬物主育草木昆蛟傷伐甚多非仁聖本意帝詔外詳議中書令崔湜侍中岑羲曰公敢是耶湊曰食厚祿死不敢顧況聖世必無死乎朝廷爲減費萬計出爲陝汝岐三州刺史開元初欲建碑靖陵湊以古園陵不立碑又方旱不可興工諫而止遷將作大匠詔復孝敬皇帝廟號義宗湊諫曰傳云必也正名禮祖有功宗有德其廟百世不毀商有三宗周宗武王漢文帝爲太宗武帝爲世宗歷代稱宗者皆方制海內德澤可尊列於昭穆是謂不毀孝敬皇帝未嘗南面且別立寢廟無稱宗之義遂罷遷右衛大將軍玄宗謂曰故事諸衛大將軍與尚書更爲之近時職輕故用卿以重此官其母辭尋徙河南尹封彭城郡公會洛陽主簿王鈞以賊抵死詔曰兩臺御史河南尹縱吏侵漁春秋重責帥其出湊曹州刺史侍御史張洽通州司馬久之遷太原尹兼北都軍器監邊備修舉詔賜時服勞勉之及病遣上醫臨治卒年六十五贈幽州都督諡曰文子見素見素字會微質性仁厚及進士第授相王府參軍襲父爵擢累諫議大夫天寶五載爲江西南黔中嶺南道黜陟使繩糾吏治所至震畏遷文部侍郎平判皆誦於口銓敘平允官有勾求輒下意聽納人多德之十三載玄宗普雨潦閔六旬謂宰相非其人罷左相陳希烈詔楊國忠審擇大臣時吉溫得幸帝欲用

之溫爲安祿山所厚國忠懼其進退止之謀於中書舍人竇華宋昱皆以見素安雅易制國忠入白帝帝亦以相王府屬有舊恩遂拜武部尚書同中書門下平章事集賢院學士知門下省事明年祿山表請蕃將三十二人代漢將帝許之見素不悅謂國忠曰祿山反狀暴天下今又以蕃代漢難將作矣國忠不應見素曰知禍之芽不能防見禍之形不能制焉用彼相明日當懇論之既入帝迎諭曰卿等有疑祿山意耶國忠見素趨下流涕且陳祿山反明甚詔復位因以祿山表置帝前乃出帝令中官袁思藝傳詔曰此姑忍朕徐圖之由是奉詔然每進見未嘗不爲帝言之帝不入其語未幾祿山反從帝入蜀陳玄禮之殺國忠也兵傷其首衆傳聲曰毋害韋公父子獲免帝令壽王賜藥傳創次巴西詔兼左相封國公肅宗立與房琯崔渙持節奉傳國璽乃冊宣揚制命帝曰太子仁孝去十三載已有傳位意屬方水旱左右勸我且須豐年今帝受命朕如釋負矣煩卿等遠去善輔導之見素涕泣拜辭又命見素子諤及中書舍人賈至爲冊使判官謁見肅宗於順化郡肅宗聞琯名且舊虛懷待之以見素嘗附國忠禮遇獨減是歲十月丙申有星犯昴見素言於帝曰昴者胡也天道謫見所應在人祿山將死矣帝曰日月可知乎見素曰福應在德禍應在刑昴忌火行當火位昴之昏中乃其時也既死其月亦死其日明年正月甲寅祿山其殪乎帝曰賊何等死答曰五行之說子者視妻所生昴犯以丙申金木之妃也木火之母也丙火爲金

子申亦金也二金本同未異還以相尅賊殆爲子與首亂者更相屠戮乎及祿山死日月皆驗明年三月至鳳翔拜尚書左僕射罷知政事初行在所承喪亂後兵吏三銓簿領煬散選部文符僞濫帝欲廣懷士心至者一切補官不加檢復見素奏宜明條綱以爲持久帝未及從既還都選者猥集補署無所日訴于朝乃追行其言會郭子儀亦爲僕射徙見素太子太師詔至蜀郡奉迎太上皇以功食實封三百戶上元初以疾求致仕許之詔朔望寶應元年卒年七十六贈司徒諡忠貞子諤

贊曰楊國忠本與安祿山爭寵故捕吉溫以激其亂陰儲蜀貨待天子之出則已與韋見素流涕爭祿山反狀將信所言以久其權見素能言祿山反不能言所以反是佐國忠敗王室也玄宗不悟仍相之卒爲後帝所薄然猶完其要領幸矣謂見素爲前知果非也

諤歷京兆府司錄參軍國忠之死軍聚不解陳玄禮請殺貴妃以安衆帝意猶豫諤曰臣聞以計勝色者昌以色勝計者亡今宗廟震驚陛下棄神器奔草莽惟割恩以安社稷因叩頭流血帝寤賜妃死軍乃大悅擢諤御史中丞爲置頓使乘輿將行或曰國忠死不可往蜀請之河隴或請幸太原朔方涼州或曰如京師雖然不一帝心向蜀未能言諤曰今兵少不能捍賊還京非萬全計不如至扶風徐圖去就帝問於衆衆然之遂至扶風乃決西幸後終給事中

顯字周仁諤弟益之子蚤孤事姊恭順及長身不衣帛通陰陽象緯博知山川風俗論議典據以門調補千牛備身自鄆尉判入等授萬年尉歷御史補闕與李約李正辭更進諷諫數移大事裴瑒韋質之李絳崔羣籛俛皆布衣舊繼爲宰相朝廷典章多所咨逮嘗曰吾儕五人智不及一韋公長慶初爲大理少卿累遷給事中敬宗立授御史中丞爲戶部侍郎徙吏部卒贈禮部尚書所著易經解推演終始有深誼既喜接士後出莫不造門而李逢吉方結黨與擅國政頗傳會之素議遂衰然節儉自居天下推其尙云知人字行哲叔謙子弱而好古以國子舉授校書郎高宗時擢州參軍八人爲中臺郎知人自荆府兵曹遷司庫員外郎兼判司戎大夫事未幾卒子維繩

維字文紀進士對策高第擢武功主簿督役乾陵會歲飢均力勸功人不知勞坐徐敬業親貶五泉主簿徙內江令教民耕桑縣爲刻額遷戶部郎中善裁剖時員外宋之問善詩故時稱戶部二妙終太子右庶子

繩長文辭撫養宗屬孤幼無異情舉孝廉以母老不肯仕踰二十年乃歷長安尉威行京師擢監察御史更泗涇鄜三州刺史天寶初入爲祕書少監玄宗尙文視其職如尙書丞郎繩刊是圖簡以善職稱終陳王傳

虛心字無逸維子舉孝廉遷大理丞侍御史神龍中按大獄僕射竇懷貞侍中劉幽求有所輕重虛心據正不撓景龍中屬羌叛既禽捕有詔悉誅虛心惟論酋長死原活其餘遷御史中丞歷荆潞揚三大都督府長史荊州有鄉豪負勢干法虛心籍其貲入之官以廬江多盜遂縣舒城盜賊爲衰入爲工部尙書東京留守累封南皮郡子卒贈揚州大都督諡曰正弟虛舟歷洪魏二州刺史有治名入爲刑部侍郎初維爲郎時柳于廷及虛心兄弟居郎省對之輒斂容自叔謙後至郎中者數人世號郎官家

韓思復字紹出京兆長安人祖倫貞觀中歷左衛率封長山縣男思復少孤年十歲母爲語父亡狀感咽幾絕故倫特愛之嘗曰此兒必大吾宗然家富有金玉車馬玩好未嘗省篤學舉秀才高第襲祖封永淳中家益窶歲飢京兆杜瑾者以百綾餉思復思復方併日食而綾完封不發調梁府倉曹參軍會大旱輒開倉賑民州劾責對曰人窮則濫不如因而活之無趣爲盜賊州不能誅轉汴州司戶仁恕不行鞭罰以親喪去官鬻薪自給姚崇爲夏官侍郎識之擢司禮博士五遷禮部郎中建昌王武攸盭母亡請鼓吹思復持不可而止坐爲王同皎所薦貶始州長史遷滁州刺史州有銅官人鑿鑿尤苦思復爲賈他鄙費省獲多有黃芝五生州署民爲刻頌其祥徙襄州入拜給事中帝作景龍觀思復諫曰禍難初弭土木遽興非憂物恤人所急不見省嚴善思坐譙王重福事捕送詔獄有司劾善思任汝州刺史與王游至京師不

暴王謀但奏東都有兵氣匿反罔上宜伏誅思復曰往韋氏擅內謀危社稷善思詣相府白陛下必卽位今詔追善思書發卽至使有逆節者肯遽奔命哉請集百官議議多同善思得免死流靜州遷中書舍人數指言得失頗見納用開元初爲諫議大夫山東大蝗宰相姚崇遣使分道捕瘞思復上言夾河州縣飛蝗所至苗輒盡今游食至洛使者往來不敢顯言且天災流行庸可盡瘞望陛下悔過責躬損不急之務任至公之人持此誠實以答譴咎其驅蝗使一切宜罷玄宗然之出其疏付崇崇建遣思復使山東按所損還以實言崇又遣監察御史劉沼覆視沼希宰相意悉易故牒以聞故河南數州賦不得蠲崇惡之出爲德州刺史拜黃門侍郎帝北巡爲行在巡問賑給大使遷御史大夫性恬澹不喜爲繩察徙太子賓客進爵伯累遷吏部侍郎復爲襄州刺史治行名天下代還仍拜太子賓客卒年七十四諡曰文天子親題其碑曰有唐忠孝韓長山之墓故吏盧僕邑人孟浩然立石峴山初鄭仁傑李無爲者隱居大白山思復少從二人游嘗曰子識清貌古恨仕不及宰相也子朝宗

朝宗初歷左拾遺睿宗詔作乞寒胡戲諫曰昔辛有過伊川見被髮而祭知其必戎今乞寒胡非古不法無乃爲狄又道路籍籍咸言皇太子微服觀之且匈奴在邸刺客卒發大憂不測白龍魚服可深畏也況天象變見疫癘相仍厭兵助陰是謂無益帝稱善特賜中上考帝傳位太子朝宗與將軍龐承宗諫曰太

子雖睿聖宜且養成盛德帝不聽累遷荊州長史開元二十二年初置十道採訪使朝宗以襄州刺史兼山南東道襄州南楚故城有昭王井傳言汲者死行人雖渴困不敢視朝宗移書諭神自是飲者亡恙人更號韓公井坐所任吏擅賦役貶洪州刺史天寶初召爲京兆尹分渭水入金光門墮爲潭以通西市材木出爲高平太守始開元末海內無事訛言兵當興衣冠潛爲避世計朝宗廬終南山爲長安尉霍仙奇所發玄宗怒使侍御史王鉷訊之貶吳興別駕卒朝宗喜識拔後進嘗薦崔宗之嚴武於朝當時士咸歸重之

朝宗孫欽字相之性清簡元和初第進士自山南東道使府入爲殿中侍御史累遷桂管觀察使部二十餘州自參軍至縣令無慮三百員吏部所補纔十一餘皆觀察使商才補職欽下車悉來謁一吏持籍請補缺員欽下教曰居官治吾不奪其不奉法無望縱舍缺者須按籍取可任任之會春服使至鄉有豪猾厚進賄使者求爲縣令使者請欽欽許之旣去召鄉豪責以撓法答其背以令部中自是豪右畏戢時詔置五管監兵盡境賦不足充其費欽處以儉約遂爲定制衆以爲難卒贈工部侍郎

宋務光字子昂一名烈汾州西河人舉進士及第調洛陽尉遷右衛騎曹參軍神龍元年大水詔文武九品以上官直言極諫務光上書曰后王樂聞過罔不興拒諫罔不亂樂聞過則下情通下情通則政無缺

此所以興也拒諫則羣議壅塞議壅則上孤立此所以亂也臣嘗觀天人相與之際有感必應其間甚密是以教失於此變生於彼易曰天垂象見吉凶聖人象之竊見自夏以來水氣勃戾天下多罹其災洛水暴漲漂損百姓傳曰簡宗廟廢祠祀則水不潤下夫王者卽位必郊祀天地嚴配祖宗自陛下御極郊廟山川不時薦見又水者陰類臣妾之道氣盛則水泉溢頃虹蜺紛錯暑雨滯霪陰勝之沴也後廷近習或有離中饋之職以干外政願深思天變杜絕其萌又自春及夏牛多病死疫氣浸淫傳曰思之不睿時則有牛禍意者萬幾之事陛下未躬親乎冕錯曰五帝其臣不及則自親之今朝廷賢佐雖多然莫能仰體下清光願勤思法宮凝就大化以萬方爲念不以聲色爲娛以百姓爲憂不以犬馬爲樂臣聞三五之君不能免淫亢顧備禦存乎人耳災興細微安之不怪及禍變已成駭而圖之猶水決治防病困求藥雖復僂俛尙何救哉夫塞變應天實繫人事今霖雨卽閉坊門豈一坊一市能感發天道哉必不然矣故里人呼坊門爲宰相謂能節宣風雨天工人代乃爲虛設又數年以來公私選竭戶口減耗家無接新之儲國乏俟荒之蓄陛下近觀朝市則以爲旣庶且富試踐閭陌則百姓衣馬牛之衣食犬彘之食十室而九丁壯盡於邊塞孀孤轉於溝壑猛吏醫毒急政破資馬困斯佚人窮斯詐起爲姦盜從而刑之良可歎也今人貧而奢不息法設而僞不止長史貪冒選舉以私稼穡之人少商旅之人衆願坦然更化以身先之凋

殘之後緩其力役久弊之極訓以敦龐十年之外生聚方足臣聞太子者君之貳國之本所以守器承祧養民贊業願擇賢能早建儲副安社稷慰黎元姻戚之間謗議所集積疑成患憑寵生災愛之適以害之也如武三思等誠不宜任以機要國家利器庸可久假於人祕書監鄭普思國子祭酒葉靜能挾小道淺術列朱紫取銀黃虧國經悖天道書曰制治于未亂保邦于未危此誠治亂安危之秋也願陛下遠佞人親有德乳保之母妃主之家以時接見無令蝶驥疏奏不省俄以監察御史巡察河南道時滑州輸丁少而封戶多每配封人皆亡命失業務光建言通邑大都不以封今命侯之家專擇雄奧滑州七縣而封者五王賦少於侯租入家倍於輸國請以封戶均餘州又請食賦附租庸歲送停封使息傳驛之勞不見納以者最進殿中侍御史遷右臺嘗薦汝州參軍事李欽憲後爲名臣卒年四十二時又有清源尉呂元泰亦上書言時政曰國家者至公之神器一正則難傾一傾則難正今中興政化之始幾微之際可不慎哉自頃營寺塔度僧尼施與不絕非所謂急務也林胡數叛獯虜內侵帑藏虛竭戶口亡散天下人失業不謂太平邊兵未解不謂無事水旱爲災不謂年登倉廩未實不謂國富而乃驅役飢凍彫鑄木石營構不急勞費日深恐非陛下中興之要也比見坊邑相率爲渾脫隊駿馬胡服名曰蘇莫遮旗鼓相當軍陣勢也騰逐喧譟戰爭象也錦繡夸競害女工也督斂貧弱傷政體也胡服相歡非雅樂也渾脫爲號非美

名也安可以禮義之朝法胡虜之俗詩云京邑翼翼四方是則非先王之禮樂而示則於四方臣所未論
書曰謀時寒若何必羸形體灌衢路鼓舞跳躍而索寒焉書聞不報

辛替否字協時京兆萬年人景龍中爲左拾遺時置公主府官屬而安樂府補授尤濫武崇訓死主奔故
宅別築第侈費過度又盛興佛寺公私疲匱替否上疏曰古之建官不必備九卿有位而闕其選故賞不
僭官不濫士有完行家有廉節朝廷餘奉百姓餘食下忠於上上禮於下委積無倉卒之危垂拱無顛沛
之患夫事有惕耳目動心慮事不師古以行於今臣得言之陛下倍百行賞倍十增官金銀不供於印東
帛不充於錫何所媿於無用之臣無力之士哉古語曰福生有基禍生有胎且公主陛下愛子也選賢嫁
之設官輔之傾府庫以賜之壯第觀以居之廣池鑿以嬉之可謂至重至憐也然用不合古義行不根人
心將變愛成憎轉福爲禍何者竭人之財奪人之家怨也愛一女取三怨於天下使邊疆士不
盡力朝廷士不盡忠人心散矣獨持所愛何所恃乎向使曾王賞同諸壻則有今日之福無曩日之禍人
徒見其禍不知禍所來所以禍者寵過也今弃一宅造一宅忘前悔忽後禍臣竊謂陛下乃憎之非愛之
也臣聞君以人爲本本固則邦寧邦寧則陛下夫婦母子長相保也願外謀宰臣爲久安計不使姦臣賊
子有以伺之今疆場危駭倉廩空虛卒輸不充士賞不及而大建寺宇廣造第宅伐木空山不給棟梁運

土塞路不充牆壁所謂佛者清淨慈悲體道以濟物不欲利以損人不榮身以害教今三時之月掘山穿
地損命也殫府虛帑損人也廣殿長廊榮身也損命則不慈悲損人則不愛物榮身則不清淨靈佛者之
心乎昔夏爲天子二十餘世而商受之商二十餘世而周受之周三十餘世而漢受之由漢而後歷代可
知已咸有道之長無道之短豈窮金玉修塔廟享久長之祚乎臣以爲滅彫琢之費以贖不足是有佛之
德息穿掘之苦以全昆蟲是有佛之仁罷營構之直以給邊垂是有湯武之功回不急之祿以購廉清是
有唐虞之治陛下緩其所急急其所緩親未來疏見在失真實冀虛無重俗人之所爲而輕天子之業臣
竊痛之今出財依勢避役亡命類度爲沙門其未度者窮民善人耳拔親樹知豈離明黨畜妻養孳非無
私愛是致人毀道非廣道求人也陛下常欲填池壑捐苑囿以賑貧人今天下之寺無數一寺當陛下一
宮壯麗用度尙或過之十分天下之財而佛有七八陛下何有之矣雖役不食之人不衣之士猶尙不給
況必待天生地養風動雨潤而後得之乎臣聞國無九年之儲曰非其國今計倉廩度府庫百僚共給萬
事用度臣恐不能卒歲假如兵旱相乘則沙門不能擐甲冑寺塔不足糲飢饉矣帝不省睿宗立罷斜封
官千餘人俄詔復之方營金仙玉貞觀替否以左補闕上疏曰臣謂古之用度不時爵賞不當國破家亡
者口說不若身逢耳聞不若目見臣請以有唐治道得失陛下所及見者言之太祖陛下之祖撥亂立極

得至治之體省官清吏舉天下職司無虛授用天下財帛無枉費賞必待功官必得才爲無不成征無不服不多寺觀而福祿至不度僧尼而咎殃滅陰陽不愆五穀遂成粟腐帛爛萬里貢賦百變歸款享國久長多歷年所陛下何憚而不法之中宗陛下之兄居先帝之業忽先帝之化不聽賢臣之言而悅子女之意虛食祿者數千人妄食土者百餘戶造寺蠹財數百億度人免租庸數十萬是故國家所出日加所入日減倉乏半歲之儲庫無一時之帛所惡者逐逐必忠良所愛者賞賞皆讒慝朋佞喋喋交相傾動奪百姓之食以養殘凶剝萬人之衣以塗土木人怨神怒親忿衆離水旱疾疫六年之間三禍爲變享國不永受終於凶婦取譏萬代詭笑四夷陛下所見也若法太宗治國太山之安可致也法中宗治國累卵之危亦可致也頃淫雨不解穀荒于壘麥爛于場入秋亢旱霜損蟲暴草木枯黃下人咨嗟未知所濟而營寺造觀日繼于時道路流言計用緡錢百餘萬陛下知倉有幾歲儲庫有幾歲帛百姓何所活三邊何所輸民散兵亂職此由也而以百萬構無用之觀受天下之怨陛下忍棄太宗之治本不忍棄中宗之亂階忍棄太宗長久之謀不忍棄中宗短促之計何以繼祖宗觀萬國耶陛下在韋氏時切齒羣凶今貴爲天子不改其事恐復有切齒於陛下者往見明敕一用貞觀故事且貞觀有營寺觀加浮屠黃老益無用之官行不急之務者乎往者和帝之憐悖逆也宗晉卿勸爲第宅趙履溫勸爲園亭工徒未息義兵交馳亭不

得游宅不得息信邪僻之說成骨肉之刑陛下所見也今茲二觀得無晉卿之徒陰勸爲之冀娛骨肉不可不察也惟陛下停二觀以須豐年以所費之財給貧窮填府庫則公主福無窮矣疏奏帝不能用然嘉切直稍遷右臺殿中侍御史雍令劉少微恃權貪贓替否按之岑義屢以爲請替否曰我爲憲司懼勢以縱罪謂王法何少微坐死遷累穎王府長史卒年八十

李渤字潛之魏橫野將軍申國公發之裔父鈞殿中侍御史以不能養母廢于世渤恥之不肯仕刻志於學與仲兄涉偕隱廬山嘗以列禦寇拒粟其妻怒是無婦也樂羊子捨金妻讓之是無夫也乃據古聯德高蹈者以楚接輿老萊子黔婁先生於陵子王仲孺梁鴻大人圖象讚其行因以自傲久之更徙少室元和初戶部侍郎李巽諫議大夫韋況交章薦之詔以右拾遺召於是河南少尹杜兼遣吏持詔幣卽山敦促渤上書謝昔屠羊說有言位三旌祿萬鍾知貴於屠羊然不可使吾君妄施彼賤賈也猶能忘己愛君臣雖欲盜榮以濟所欲得無愧屠羊乎不拜洛陽令韓愈遺書曰有詔河南敦諭拾遺公朝廷士引頸東望若景星鳳鳥始見爭先觀之爲快方今天子仁聖小大之事皆出宰相樂善言如不得聞自卽大位凡所出而施者無不得宜勤儉之聲寬大之政幽閨婦女草野小子飽聞而厭道之愈不通於古請問先生茲非太平世歟加又有非人力而至者年穀屢熟符貺委至干紀之姦不戰而拘彙疆梁之凶銷鑠縮粟

迎風而委伏其有一事未就正視若不成人四海所環無一夫甲而兵者若此時也拾遺公不疾起與天下士樂而享之斯無時矣昔孔子知不可爲而爲之不已跡接於諸侯之國今可爲之時自藏深山牢關而固拒卽與仁義者異守矣想拾遺公冠帶就車惠然肯來舒所畜積以補綴盛德之闕利加于時名垂將來踴躍懷企頃刻以冀又切聞朝廷議必起拾遺公使者往若不許卽河南必繼以行拾遺徵若不至更加高秩如是辭少就多傷於廉而害於義拾遺公必不爲也善人進其類皆有望於公公不爲起是使天子不盡得良臣君子不盡得顯位人庶不盡被惠利其害不爲細必審察而諦思之務使合於孔子之道乃善渤海心善其言始出家東都每朝廷有闕政輒附章列上元和九年討淮西上平賊三術一曰感二曰守三曰戰感不感不爲守守不感不爲戰又上禦戎新錄乃以著作郎召渤遂起歲餘遷右補闕以直忤旨下遷丹王府諮議參軍分司東都十三年上言至德以來天下思致治平訖今不稱者人倦而不知變天以變通之運遺陛下陛下順而革之則悠久宜乘平蔡之勢以德羈服恆竟無不濟則恩威暢矣昔舜禹以匹夫宅四海其烈如彼今以五聖營太平其難如此臣恐宰相羣臣蘊晦術略敢沃有所未盡使陛下翹然思文武禹湯而不獲也宜正大官敘九疇修王制月令崇孝悌敦九族廣諫路黜選舉復俊造定四民省抑佛老明刑行令治兵禦戎願下宰相公卿大夫議博引海內名儒大開學館與羣臣參

講據經稽古應時便俗者使切磋商周復作制度合宣父繼周之言謹上五事一禮樂二食貨三刑政四議都五辨讎渤雖處外然志存朝廷表疏凡四十五獻擢爲庫部員外郎會皇甫鎛輔政務剝下佐用度而渤奉詔弔祁士美喪在道上言渭南長源鄉戶四百今纔四十閭鄉戶三千而今于它州縣大抵類此推其敝始於攤逃人之賊假令十室五逃則均責未逃者若抵石于井非極泉不止誠繇聚斂之臣割下媚上願下詔一賜禁止計不三年人必歸于農夫農國之本本立而太平可議矣又言道路蕪不治驛馬多死憲宗得奏咨駭卽詔出飛龍馬數百給畿驛渤旣以峭直觸要臣意乃謝病歸穆宗立召拜考功員外郎歲終當校考渤自宰相而下升黜之上奏曰宰相俛文昌植陛下卽位倚以責功安危治亂繫也方陛下敬大臣未有昵比左右自驕之心而天下事一以付之俛等不推至公陳先王道德又不振拔舊典復百司之本政之興廢在賞罰俛等未聞慰一首公使天下吏有所勸黜一不職使尸祿有所懼士之邪正混然無章陛下比幸驪山宰相學士皆股肱心腹宜皆知之不先事以諫陷君於過俛與學士杜元穎等請考中下御史大夫李絳左散騎常侍張惟素右散騎常侍李益諫幸驪山鄭覃等諫畋游得事君之禮請考上下崔元略當考上下前考于輩不實輩以賄死請降中中大理卿許季同任輩者應考中下然頃陷劉闢棄家以歸宜補厥過考中中少府監裴通職修舉考應中上以封母捨嫡而追所生請考中下奏

入不報會渤請急馮宿領考功以考課令取歲中善惡爲上下郎中校京官四品以下黜陟之由三品上爲清望官歲進名聽內考非有司所得專渤舉舊事爲褻貶違朝廷制請如故事渤議遂廢會魏博節度使田弘正表渤爲副元穎劾奏渤賣直售名資狂躁干進不已外交方鎮求尉薦不宜在朝出爲虔州刺史渤奏還信州移稅錢二百萬免賦米二萬石廢冗役千六百人觀察使上狀不闕歲遷江州刺史度支使張平叔斂天下逋租渤上言度支所收貞元二年流戶賦錢四百四十萬臣州治田二千頃今旱死者千九百頃若徇度支所斂臣懼天下謂陛下當大旱責民三十年逋賦臣刺史上不能奉詔下不忍民窮無所逃死請放歸田里有詔蠲責渤又治湖水築隄七百步使人不病涉入爲職方郎中遣諫議大夫時敬宗晏朝紫宸入閣帝久不出羣臣立屏外至頓仆渤見宰相曰昨論晏朝事今益晚是諫官不能移人主意渤請出閣待罪會喚仗乃止退上疏曰今日入閣陛下不時見羣臣羣臣皆布路跛倚夫跛倚形諸外則憂思結諸內憂倦既積災釁必生小則爲旱爲孽大則爲兵爲亂禮三諫不聽則逃之陛下新卽位臣至三諫恐危及社稷又言左右常侍職規諷循默不事若設官不責實不如罷之俄充理匭使建言事大者以聞次白宰相下以移有司有司不當許再納匭妄訴者加所坐一等以絕冒越詔可時政移近侍紀律蕩然渤動正不顧患通章封無闕日天子雖幼昏亦感寤擢給事中賜金紫服五坊卒夜鬪傷縣人

鄂令崔發怒敕吏捕捽其一中人也釋之帝大怒收發送御史獄會大赦改元發以囚坐雞竿下俄而中人數十持挺亂擊發敗面折齒幾死吏哀請乃去既而囚皆釋而發不得原渤上疏曰縣令曳辱中人中人毆御囚其罪一也然令罪在赦前而中人在赦後不實于法臣恐四夷聞之慢倍之心生矣渤又誦言前神策軍在幔城募京兆進食牙盤不時治致宦人益橫帝以問左右皆曰無之帝謂渤有黨出爲桂管觀察使它日宰相李逢吉等見帝曰發暴中人誠不敬然其母故宰相韋貫之姊年八十憂發成疾陛下方孝治宜少延之帝惻然曰比諫官但言發枉未嘗道此卽遣使送發於家且撫慰其母韋拜泣對使者杖發四十猶奪其官至文宗乃用發爲懷州長史桂有灘水出海陽山世言秦命史祿代粵鑿爲漕馬搜討徵側復治以通餽後爲江水潰毀渠遂廢淺每轉餉役數十戶濟一艘渤醜淺舊道鄣泄有宜舟楫利焉踰年以病歸洛太和中召拜太子賓客卒年五十九贈禮部尚書渤孤操自將不苟合於世人咸謂之沽激屢以言斥而悻直不少衰守節者尙之

裴潏本河東聞喜人篤學善隸書以蔭仕元和初累遷左補闕於是兩河用兵憲宗任宦人爲館驛使檢稽出納有曹進玉者尤恃恩倨甚使者過至加捧辱宰相李吉甫奏罷之會伐蔡復以中人領使潏諫曰凡驛有官專戶之畿內以京兆尹道有觀察使刺史相監臨臺又御史爲之使以察過闕猶有不職則宜

明科條督責之誰不惕懼若復以宮闈臣領之則內人而及外事職分亂矣夫事不善誠於初體有非不
必大方開太平澄本正末宜塞侵官之原出位之漸帝雖不用而嘉其忠擢起居舍人帝喜方士而柳泌
爲帝治丹劑求長年帝御劑中躁病渴澹諫曰夫除天下之害者常受天下之利共天下之樂者常饗天
下之福故上自黃帝顛頊堯舜禹湯文武咸以功濟生人天皆報以耆壽垂榮無疆陛下以孝安宗廟以
仁牧黎庶攘剝祇凶復張太平賓禮賢俊待以終始神功聖德前古所不及陛下躬行之天地宗廟必相
陛下以億萬之衆今乃方士韋山甫柳泌等以丹術自神更相稱引詭爲陛下延年臣謂士有道者皆匿
名滅景無求於世豈肯干謁貴近自鬻其伎哉今所至者非曰知道咸求利而來自言飛鍊爲神以誅權
賄僞窮情得不恥遁亡豈可信厥術御其藥哉臣聞人食味別聲被色而生者也味以行氣氣以實志水
火鹽梅以烹魚肉宰夫和之齊之以味君子食之以平其心夫三牲五穀粟五行以生也發爲五味天地
生之所以奉人聖人節調以致康彊若乃藥劑者所以禦疾豈常進之餌哉況又金石性託酷烈而燒治
積年包炎產毒未易可制夫秦漢之君亦信方士矣如盧生徐福樂大李少君後皆詐誦無成功事暴前
策皆可驗視禮君之藥臣先嘗之父之藥子先嘗之臣子一也願以所治劑俾其人服之竟一歲以考真
僞則無不驗矣帝怒貶江陵令穆宗立泌等誅召澹再遷刑部郎中前率府倉曹參軍曲元衡杖民柏公

成母死有司以死在辜外推元衡父蔭贖金公成受賕不訴以赦免澹議曰杖捶者官得施所部非所部
雖有罪必請有司明不可擅也元衡非在官公成母非所部不可以蔭免公成取賄仇家利母之死逆天
性當伏誅有詔元衡流公成論死久之繇給事中爲汝州刺史越法杖人輒死以太子左庶子分司東都
遷左散騎常侍集賢殿學士改刑部侍郎爲華州刺史召拜兵部侍郎出爲河南尹復還舊官卒贈戶部
尚書諡曰敬澹以道自任悉心事上疾黨附不爲權近所持嘗哀古今辭章續梁昭明太子文選自號大
和通選上之當時文士非與遊者皆不取世恨其隘憲宗竟以藥斃天下世益謂澹知言穆宗雖誅泌而
後稍稍復惑方士有布衣張皋者上疏曰神慮澹則血氣和嗜欲勝則疾疹作古之聖賢務自頤養不以
外物撓耳目聲色敗情性繇是和平自臻福慶用昌在易无妄之疾勿藥有喜在詩自天降康降福纓纓
此天人符也然則藥以攻疾無疾不用藥也高宗時處士孫思邈達於養生其言曰人無故不用餌藥藥
有所偏助則藏氣爲不平推此論之可謂達見至理夫寒暑爲賊節宣垂度有資於醫尙當重慎故禮稱
醫不三世不服其藥庶士猶爾況天子乎先帝晚節喜方士累致危疾陛下所自知不可蹈前覆迎後悔
也今人人竊議直畏忤旨莫敢言臣蓬藪之生非以邀寵顧忠義可爲者聞而默則不安願陛下無忽帝
善其言詔訪臯不獲

李中敏字藏之系出隴西元和中擢進士第性剛峭與杜牧李甘善其文辭氣節大抵相上下沈傳師觀
察江西辟爲判官入拜侍御史鄭注誣逐宰相宋申錫天下以目太和六年大旱文宗內憂詔詢所以致
兩者中敏時以司門員外郎上言雨不時降夏陽驕愆苗欲槁枯陛下憂勤降德音俾下得盡言臣聞昔
東海誤殺一孝婦大旱三年臣頃爲御史臺推囚華封儒殺夏家子三人陛下赦封儒死然三人者亦陛
下赤子也神策士李秀殺平民法當死以禁衛刑止流宋申錫位宰相生平饋致一不受其道勁正姦人
忌之陷不測之辜獄不參驗銜恨而沒天下士皆指目鄭注臣知數寃必列訴上帝天之降災殆有由然
漢武帝用空竭桑弘羊興筦榷之利然卜式請烹以致雨況申錫之在天下知之何惜斬一注以快忠
臣之魂則天且雨矣帝不省中敏以病告滿歸潁陽注誅以司勳員外郎召累遷諫議大夫爲理甌使建
言上書者將納於甌有司允審其副有不可輒卻之臣請甌出禁中暮而入爲下開必達之路廣聰明直
枉結若有司先裁可否恐事不重密非窮塞得自申意請一裁諸上詔可遷給事中仇士良以開府階蔭
其子中敏曰內謁者監安得有子士良慙恚繇是復棄官去開成末爲婺杭二州刺史卒于官
中敏所善李款字言源長慶初第進士爲侍御史注自邪竄入朝款伏閣劾奏注內通敕使外結朝臣往
來兩地下射賊謝帝不省後寢用事款被斥去注死繇倉部員外郎累遷江西觀察使終澶王傳

一號第一百十二批

李甘字和鼎長慶末第進士舉賢良方正異等累擢侍御史鄭注侍講禁中求宰相朝廷譁言將用之甘
顯倡曰宰相代天治物者當先德望後文藝注何人欲得宰相白麻出我必壞之旣而麻出乃以趙儻爲
鄜坊節度使甘坐輕肆貶封州司馬而李訓內亦惡注繇是注卒不相甘終于貶始河南人楊牢字松年
有至行甘方未顯以書薦於尹曰執事之部孝童楊牢父茂卿從田氏府趙軍反殺田氏茂卿死牢之兄
蜀三往索父喪慮死不果至牢自洛陽走常山二千里號伏叛壘委髮羸骸有可憐狀讎意感解以尸還
之單纒冬月往來太行間凍膚皸瘵衄哀雨血行路稠人爲牢泣歸責其子以牢勉之牢爲兒踐操如此
未聞執事門言而書顯之豈樹風扶教意耶且鄉人能齧疽刳脰急親之病皆一時決耳猶蒙表其閭脫
之襁上有大禮則差問以粟帛今河北驕叛萬師不能攘而牢徒步請尸仇手與夫含腐忍瘡者孰多牢
絕乳卽能詩洛陽兒曹壯於牢者皆出其下聞牢之贖喪潞帥償其費其葬也滑帥贖之財斯執事之事
他人旣寡之矣卽有稱牢於上者執事能無恨其後乎其激叩自任類此牢後亦擢進士第
贊曰夫以下摩上士所甚患然取名最多故上失德則與下爭名而後有誅夷斥竄事然或依古肆言高
而難從以邀主賈直者逆之似傷道行之不切時此言事常弊也若廷珪數子優游彌縫皆中時病非所
謂賈直自榮者也至渤海爭晏朝澹諫方士甘斥鄭注不可作宰相排寵救危不得不爾賢哉

唐書卷一百十八

唐書卷一百十八考證

韋湊傳春秋重責帥其出湊曹州刺史○舊書以公事左授杭州刺史

虛心入爲工部尙書○舊書歷戶部尙書

李中敏傳以病告滿歸潁陽○舊書中敏謝病歸洛陽

唐書卷一百十八考證

唐書卷一百十九

宋 端 明 殿 學 士 宋 祁 撰

列傳第四十四

武李賈白

武平一名甄以字行潁川郡王載德子也博學通春秋工文辭武后時畏禍不敢與事隱嵩山修淨圖法
 屢詔不應中宗復位平一居母喪迫召為起居舍人丐終制不見聽景龍二年兼修文館直學士時天子
 暗柔不君章后悉亂外戚盛平一重斥語即自請抑母黨上言去歲熒惑入羽林太白再經天太陽虧月
 犯大角臣聞災不妄生上見下應信如景響詩曰唯此文王小心翼翼昭事上帝聿懷多福陛下天性孝
 愛戚屬外家恩洽澤濡臣一宗階三等家數侯朱輪華轂過許史梁鄧遠甚恩崇者議積位厚者疊速故
 月滿必虧日中則移時不再來榮難久藉昔永淳之後王室多難先聖從權故臣家以宗子竊祿疏封今
 上聖復辟宜退守園廬乃再假光寵爵封如初高班厚位遂超涯極故陰氣僭陽河洛汎溢昔王族驕盈
 梅福上書竇氏專縱丁鴻進諫且后妃之家恩過寵深一朝覆沒遂無噍類願思抑損之宜長遠之策推
 遠時權以全親親帝慰勉不許遷考功員外郎于時太平安樂公主各立黨相根毀親貴離間帝患之欲

令敦和以訪平一因上書曰病之在四體者跡分而易逐居心腹者候遽而難治刑政乖舛四支疾也親權猜問心腹患也書曰克明俊德以親九族九族既睦平章百姓詩曰協比其鄰婚姻孔云是知親族以輯睦爲義也自頃權貴猜防外和內離怨結姻婭疑生骨肉邀榮之徒詭獻忠款膏脣之伍苟輸讒計脅肩邸第之中嚙頤媼宦之側故過從絕猜嫌構親愛乖黨與生積霜成冰禍不可既願悉召近親貴人會宴內殿告以輯睦申以恩勤斥姦人塞讒路若猶未已則捨近圖遠抑慈示嚴惟陛下之命帝美其忠切卒不用初崔日用自言明左氏春秋諸侯官族它日學士大集日用折平一曰君文章固耐久若言經則敗績矣時崔湜張說素知平一該習勸令酬詰平一乃請所疑日用曰魯三桓鄭七穆奈何答曰慶父叔牙季友桓三子也孟孫至彘凡九世叔孫舒季孫肥凡八世鄭穆公十一子子然及二子子孔三族亡子羽不爲卿故稱七穆子罕子駟子良子國子游子印子豐也一坐驚服平一問日用曰公言齊桓公楚莊王時諸侯屬齊若楚凡幾平公靈王時諸侯屬晉楚凡幾晉六卿齊楚執政幾何人日用謝曰吾不知君能知乎平一條舉始末無留語日用曰吾請北面闔坐大笑後宴兩儀殿帝命后兄光祿少卿嬰監酒嬰滑稽敏給詔學士謂之嬰能抗數人酒酣胡人襪子何懿等唱合生歌言淺穢因倨肆欲奪司農少卿宋廷瑜賜魚平一上書諫曰樂天之和禮地之序禮配地樂應天故音動於心聲形于物因心哀樂感物應

變樂正則風化正樂邪則政教邪先王所以達廢興也伏見胡樂施于聲律本備四夷之數比來日益流宕異曲新聲哀思淫溺始自王公稍及閭巷妖妓胡人街童市子或言妃主情貌或列王公名質詠歌舞蹈號曰合生昔齊衰有行伴侶陳誠有玉樹後庭花趨數驚僻皆亡國之音夫禮慊而不進卽銷樂流不反則放臣願屏流僻崇肅雍凡胡樂備四夷外一皆罷遣況兩儀承慶殿者陛下受朝聽訟之所比大饗羣臣不容以倡優蝶狎虧汗邦典若聽政之暇苟玩耳目自當奏之後廷可也不納玄宗立貶蘇州參軍徙金壇令平一見寵中宗時雖宴豫嘗因詩頌規誠然不能卓然自引去故被謫既謫而名不衰開元末卒孫元衡儒術別傳

李父字尙真趙州房子人少孤年十二工屬文中書令薛元超曰是子且有海內名第進士茂才異等累調萬年尉長安二年詔雍州長史薛季昶選部吏才中御史者季昶以父聞擢監察御史劾奏無避景龍初葉靜能怙勢父條其姦中宗不納遷中書舍人修文館學士帝遣使江南發在所庫貲以贖生父上疏以爲江南魚鼈之利衣食所資江湖之生無旣而府庫之財有限與其拯物不如愛民且鬻生之徒惟利所視錢刀日至網罟歲廣施之一朝營之百倍若回所贖之貲減方困之徭其澤多矣韋氏之變詔令嚴促多父草定進吏部侍郎仍知制誥與宋璟等同典選事請謁不行時人語曰李下無蹊徑改黃門侍郎

封中山郡公制教不便輒駁正貴幸有求官者睿宗曰朕非有新顧李又不可耳諫罷金仙玉真二觀帝雖不從優容之太平公主干政欲引父自附父深自拒絕開元初姚崇爲紫微令薦爲侍郎外託引重實去其糾駁權畏父明切也未幾除刑部尚書卒年六十八贈黃門監諡曰貞遺令薄葬毋還鄉里父沈政方雅識治體時稱有宰相器葬日蘇頌畢構馬懷素往祖之哭曰非公爲慟而誰慟歟父事兄尚一尚貞孝謹甚又俱以文章自名弟兄同爲一集號李氏花萼集又所著甚多尚一終清源尉尚貞博州刺史賈會河南洛陽人父言忠貌魁梧事母以孝聞補萬年主簿護役蓬萊宮或短其苛高宗廷詰辯列詳諦帝異之擢監察御史方事遼東奉使稟軍餉還奏上山川道里并陳高麗可破狀帝問諸將材否對曰李勣舊臣陛下所自悉龐同善雖非闕將而持軍嚴薛仁貴勇冠軍高侃忠果而謀契苾何力性沈毅雖忌前有統御才然夙夜小心亡身憂國莫逮於勣者帝然所許衆亦以爲知言累轉吏部員外郎李敬玄兼尚書言忠尚氣及主選不能下貶邵州司馬失武懿宗意下獄幾死左除建州司戶參軍卒會少有名景雲中爲吏部員外郎玄宗爲太子遴選宮僚以會爲舍人太子數遣使采女樂就率更寺肄習會諫曰作樂崇德以和人神韶夏有容咸英有節而女樂不與其間昔魯用孔子幾霸戎有由余而疆齊秦遺以女樂故孔子行由余出奔夏以治容哇咬蠱心喪志聖賢疾之最甚殿下渴賢之美未彰好伎之聲先聞

非所以追啟誦嗣堯舜之烈也餘閑宴私後廷伎樂古亦有之猶當祕隱不以示人況闕之所司明示羣臣哉願下令屏倡優女子諸使者採召一切罷止太子手令嘉答俄擢中書舍人以父嫌名不拜徙諫議大夫知制誥天子親郊有司議不說皇地祇位會請合享天地如古制并從祀等坐睿宗詔宰相禮官議皆如會請開元初復拜中書舍人會固辭議者謂中書乃曹司非官稱嫌名在禮不諱乃就職與蘇晉同掌制誥皆以文辭稱時蘇賈後坐事貶洋州刺史歷虔鄆等州刺史遷禮部侍郎卒子至至字幼鄰擢明經第解褐單父尉從玄宗幸蜀拜起居舍人知制誥帝傳位至當讓册既進稿帝曰昔先天誥命乃父爲之辭今茲命册又爾爲之兩朝盛典出卿家父子手可謂繼美矣至頓首嗚咽流涕歷中書舍人至德中將軍王去榮殺富平令杜徽肅宗新得陝且惜去榮材詔貸死以流人使自効至諫曰聖人誅亂必先示法崇禮義漢始入關約法三章被人者死不易之法也按將軍去榮以朔方偏裨提數千士不能整行列挾私怨殺縣令有犯上之逆或曰去榮善守陝新下非去榮不可守臣謂不然李光弼守太原程千里守上黨許叔冀守靈昌魯兪守南陽賈贛守雍巨張巡守睢陽初無去榮未聞賊能下也以一能而免死彼弧矢絕倫劍術無前者恃能犯上何以止之若捨去榮誅將來是法不一而招罪人也惜一去榮殺十去榮之材其傷蓋多後逆亂之人有逆於此而順於彼乎亂富平而治於陝乎悖縣令能

不悖於君乎律令者太宗之律令陛下不可以一士小材廢祖宗大法帝詔羣臣議太子太師韋見素文部郎中崔器等皆以爲法者天地大典王者不敢專也帝王不擅殺而小人得擅殺者是權過人主開元以前無敢專殺尊朝廷也今有之是弱國家也太宗定天下陛下復鴻業則去榮非至德罪人乃貞觀罪人也其罪祖宗所不赦陛下可易之耶詔可蒲州刺史以河東瀕賊徹傅城廬舍五千室不使賊得保聚民大擾詔遣至慰安官助營完蒲人乃安坐小法貶岳州司馬寶應初召復故官遷尙書左丞楊綰建請依古制縣令舉孝廉于刺史刺史升天子禮部詔有司參議多是縮言至議以爲自晉後衣冠遷徙人多僑處因緣官族所在占籍今卿舉取人未盡請廣學校增國子博士員十道大州得置大學館詔博士領之召置生徒使保桑梓者鄉里舉焉在流寓者庠序推焉議者更附至議轉禮部侍郎待制集賢院大厓初徙兵部累封信都縣伯進京兆尹七年以右散騎常侍卒年五十五贈禮部尙書諡曰文

白居易字樂天其先蓋太原人北齊五兵尙書建有功于時賜田韓城子孫家焉又徙下邳父季庚爲彭城令李正己之叛說刺史李洧自歸累擢襄州別駕居易敏悟絕人工文章未冠謁顧況况吳人恃才少所推可見其文自失曰吾謂斯文遂絕今復得子矣貞元中擢進士拔萃皆中補校書郎元和元年對制策乙等調監厔尉爲集賢校理月中召入翰林爲學士遷左拾遺四年天子以旱甚下詔有所蠲貸振除

災沴居易見詔節未詳卽建言乞盡免江淮兩賦以救流瘠且多出宮人憲宗頗采納是時于頔入朝悉以歌舞人內禁中或言普寧公主取以獻皆頔嬖愛居易以爲不如歸之無令頔得歸曲天子李師道上私錢六百萬爲魏徵孫贖故第居易言徵任宰相太宗用殿材成其正寢後嗣不能守陛下猶宜以賢者子孫贖而賜之師道人臣不宜掠美帝從之河東王鐸將加平章事居易以爲宰相天下具瞻非有重望顯功不可任按鐸誅求百計不卹彫瘵所得財號爲羨餘以獻今若假以名器四方聞之皆謂陛下得所獻與宰相諸節度私計曰誰不如鐸爭哀割生人以求所欲與之則綱紀大壞不與則有厚薄事一失不可復追是時孫璿以禁衛勞擢鳳翔節度使張奉國定徐州平李錡有功遷金吾將軍居易爲帝言宜罷璿進奉國以竦天下忠臣心度支有囚繫關鄉獄更三赦不得原又奏言父死讎其子夫久繫妻嫁債無償期禁無休日請一切免之奏凡十餘上益知名會王承宗叛帝詔吐突承瓘率師出討居易諫唐家制度每征伐專委將帥責成功比年始以中人爲都監韓全義討淮西賈貞國監之高崇文討蜀劉貞亮監之且興天下兵未有以中人專統領者神策旣不置行營節度卽承瓘爲制將又充諸軍招討處置使是實都統恐四方聞之必輕朝廷後世且傳中人爲制將自陛下始陛下忍受此名哉且劉濟等洎諸將必耻受承瓘節制心有不樂無以立功此乃資承宗之姦挫諸將之銳帝不聽旣而兵老不決居易上言陛下

下討伐本委承瓚外則盧攸史范希朝張茂昭今承瓚進不決戰已喪大將希朝茂昭數月乃入賊境觀其勢似陰相爲計空得一縣卽辟不進理無成功不亟罷之且有四害以府帑金帛齊民膏血助河北諸侯使益富疆一也河北諸將聞吳少陽受命將請洗滌承宗章一再上無不許則河北合從其勢益固與奪恩信不出朝廷一也今暑濕暴露兵氣重蒸誰不顧死孰堪其苦又神策雜募市人不恤于役脫奔逃相動諸軍必搖三也回鶻吐蕃常有游偵聞討承宗歷三時無功則兵之強弱費之多少彼一知之乘虛入寇渠能救首尾哉兵連事生何故蔑有四也事至而罷則損威失柄祗可逆防不可追悔亦會承宗請罪兵遂罷後對殿中論執疆綱帝未諭輒進曰陛下誤矣帝變色罷謂李絳曰是子我自拔擢乃敢爾我叵堪此必斥之絳曰陛下敢言者路故羣臣敢論得先若黜之是箝其口使自爲謀非所以發揚盛德也帝悟待之如初歲滿當遷帝以資淺且家素貧聽自擇官居易請如姜公輔以學士兼京兆戶曹參軍以便養詔可明年以母喪解還拜左贊善大夫是時盜殺武元衡京都震擾居易首上疏請亟捕賊刷朝廷耻以必得爲期宰相嫌其出位不悅俄有言居易母墮井死而居易賦新井篇言浮華無實行不可用出爲州刺史中書舍人王涯上言不宜治郡追貶江州司馬旣失志能順適所遇託浮屠生死說若忘形骸者久之徙忠州刺史入爲司門員外郎以主客郎中知制誥穆宗好畋游獻續虞人箴以諷曰唐受天命

十有二聖兢兢業業咸勸厥政烏生深林獸在豐草春蒐冬狩取之以道鳥獸蟲魚各遂其生民野君朝亦克用寧在昔玄祖厥訓孔彰馳聘畋獵俾心發狂何以效之曰羿與康曾不是誠終然覆亡高祖方獵蘇長進言不滿十旬未足爲懼上心旣悟爲之輟畋降及宋璟亦諫玄宗溫顏聽納獻替從容璟趨以出鶴死握中噫逐獸于野走馬于路豈不快哉銜檄可懼審其安危惟聖之慮俄轉中書舍人田布拜魏博節度使命持節宣諭布遺五百緡詔使受之辭曰布父歸國耻未雪人當以物助之乃取其財誼不忍方諭問旁午若悉有所贈則賊未殄布贊竭矣詔聽辭餉是時河朔復亂合諸道兵出討遷延無功賊取功高絕糧道深州圍益急居易上言兵多則難用將衆則不一宜詔魏博潞定滄四節度令各守境以省度支贊餉每道各出銳兵三千使李光顏將光顏故有鳳翔徐滑河陽陳許軍無慮四萬可徑薄賊開弓高糧路合下博解深州之圍與牛元翼合還裴度招討使使悉太原兵西壓境見利乘隙夾攻之間令招諭以動其心未及誅夷必自生變且光顏久將有威名度爲人忠勇可當一面無若二人者於是天子荒縱宰相才下賞罰失所宜坐視賊無能爲居易雖進忠不見聽乃旬外遷爲杭州刺史始築堤捍錢塘湖鍾洩其水漑田千頃復浚李泌六井民賴其汲久之以太子左庶子分司東都復拜蘇州刺史病免文宗立以祕書監召遷刑部侍郎封晉陽縣男大和初二李黨事興險利乘之更相奪移進退毀譽若巨轟然

楊虞卿與居易姻家而善李宗閔居易惡緣黨人斥乃移病還東都除太子賓客分司踰年即拜河南尹復以賓客分司開成初起爲同州刺史不拜以太子少傅進馮翊縣侯會昌初以刑部尚書致仕六年卒年七十五贈尚書右僕射宣宗以詩弔之遺命薄葬毋請諡居易被遇憲宗時事無不言瀟灑抉摩多見聽可然爲當路所忌遂擯斥所蘊不能施乃放意文酒既復用又皆幼君偃蹇益不合居官輒病去遂無立功名意與弟行簡從祖弟敏中友愛東都所居履道里疏沼種樹構石樓香山鑿入節灘自號醉吟先生爲之傳暮節感浮屠道尤甚至經月不食葷稱香山居士嘗與胡杲吉旼鄭據劉真盧真張渾狄兼謨盧貞燕集皆高年不事者人慕之繪爲九老圖居易於文章精切然最工詩初頗以規諷得失及其更多更下偶俗好至數千篇當時士人爭傳鷄林行賈售其國相率篇易一金甚僞者相輒能辯之初與元稹酬詠故號元白稹卒又與劉禹錫齊名號劉白其始生七月能展書姆指之無兩字雖試百數不差九歲暗識聲律其篤於才章蓋天稟然敏中爲相請諡有司曰文後履道第卒爲佛寺東都江州人爲立祠焉贊曰居易在元和長慶時與元稹俱有名最長於詩它文未能稱是也多至數千篇唐以來所未有其自敘言關美刺者謂之諷諭詠性情者謂之閑適觸事而發謂之感傷其它爲雜律又譏世人所愛惟雜律詩彼所重我所輕至諷諭意激而言質閑適思澹而辭迂以質合迂宜人之不愛也今視其文信然而杜

牧謂纖豔不逞非莊士雅人所爲流傳人間子女母交口教授淫言媒語入人肌骨不可去蓋救所失不得不云觀居易始以直道奮在天子前爭安危冀以立功雖中被斥晚益不衰當宗閔時權勢震赫終不附離爲進取計完節自高而稹中道微險得宰相名望灌然嗚呼居易其賢哉行簡字知退擢進士辟廬坦劍南東川府罷與居易自忠州入朝授左拾遺累遷主客員外郎代韋詞判度支按進郎中長慶時振武營田使賀拔志歲終結課最詔行簡閱實發其妄志懼自刺不殊行簡敏而有辭後學所慕尚寶曆二年卒

敏中字用晦少孤承學諸兄長慶初第進士辟義成節度使李聽府聽一見許其遠到遷右拾遺改殿中侍御史爲符澈邠靈副使澈卒以能政聞御史中丞高元裕薦爲侍御史再轉左司員外郎武宗雅聞居易名欲召用之是時居易足病廢宰相李德裕言其衰忿不任事即薦敏中文詞類其兄而有器識即日知制誥召入翰林爲學士進承旨宣宗立以兵部侍郎同中書門下平章事遷中書侍郎兼刑部尚書德裕貶敏中抵之甚力議者嘗惡德裕著書亦言惟以怨報德爲不可測蓋斥敏中云歷尚書右僕射門下侍郎封太原郡公自員外凡五年十三遷崔鉉輔政欲專任患敏中居右會党項數寇邊鉉言宜得大臣鎮撫天子嚮其言故敏中以司空平章事兼邠靈節度招撫制置使初帝愛萬壽公主欲下嫁士人時鄭

顯擢進士第有闕閼敏中以充選顯與盧氏婚將授室而罷銜之敏中自以居外畏顯譏自訴于帝帝曰朕知久矣若用顯言庸相任耶顧左右取書一函發視悉顯所上敏中乃安及行帝御安福樓以饒頌璽書諭尉賜通天帶衛以神策兵開府辟士禮如裴度討淮西時次靈州諸將已破羌賊敏中即說諭其眾皆願棄兵爲業乃自南山並河按屯堡回繞千里又規蕭關通靈威路使爲耕戰具踰年檢校司徒徙劍南西川增驛軍完創關壁治蜀五年有勞加兼太子太師徙荆南懿宗立召拜司徒門下侍郎還平章事數月足病不任謁固求避位不許中使者勞問俾對別殿毋拜右補闕王譜奏言敏中病四月陛下坐朝與他宰相語不三刻安暇論天下事願聽其請無使有持寵曠貴之譏書聞帝怒斥譜陽翟令給事中鄭公輿申救不聽譜者侍中珪之遠裔未幾加敏中中書令自裴度以勳德居而敏中以恩澤進咸通二年南蠻擾邊召敏中入議許挾扶升殿固求免乃出爲鳳翔節度使三奏願歸守墳墓除東都留守不敢拜許以太傅致仕詔書未至卒冊贈太尉博士曹鄴責其病不堅退且逐諫臣舉怙威肆行諡曰醜

唐書卷一百十九

唐書卷一百十九考證

白居易傳會昌初以刑部尚書致仕六年卒年七十五○舊書大中元年卒年七十六

居易從祖弟敏中乃出爲鳳翔節度使○舊書河中晉絳節度使

唐書卷一百十九考證

唐書卷一百二十

宋 端 明 殿 學 士 宋 祁 撰

列傳第四十五

五王

桓彥範字士則潤州丹陽人以門蔭調右翊衛選司衛主簿狄仁傑曰君之才當自光大毋卹于初厚爲禮尋擢監察御史遷累中丞長安中爲司刑少卿張昌宗引妖人迎占言計不軌宋璟請窮治其姦武后以昌宗嘗自歸不許彥範諫曰昌宗謬橫恩苞福心億測天命皇神降怒自隨其咎推原厥情蓋防事暴之日得引首以免未敗則候時爲逆此凶詭之臣營惑聖心既自歸露而尙與妖人祈福禳解則果於必成初無悔意今而有之誠恐昌宗自謂應運天下浩然從之父在子稱尊爲逆子君在臣圖位爲逆臣逆而不誅社稷懼亡請付三司考治不納時內史李嶠等屢奏往爲酷吏破家者請皆有雪依違未從彥範復上言自文明後得罪惟揚豫博三州不免它可悉赦疏十上卒見聽嘗曰大理人命所懸不可便辭詭合以自免張柬之將誅易之等引與定策於是以彥範敬暉爲左右羽林將軍屬以禁兵時中宗每北門起居因得謁陳祕計神龍元年正月彥範暉率羽林兵與將軍李湛李多祚楊元琰薛思行等千騎五百

人討賊令湛多祚就東宮迎中宗至玄武門彥範等斬關入士皆鼓譟時武后處迎仙宮之集仙殿斬易之等廡下后聞變而起見中宗曰乃汝耶豎子誅可還宮彥範進曰太子今不可以歸往天皇棄羣臣以愛子託陛下今久居東宮羣臣思天皇之德不血刃清內難此天意人事歸李氏臣等謹奉天意惟陛下傳位萬世不絕天下之幸后乃臥不復言明日中宗復位以彥範爲侍中封譙郡公賜實封五百戶上書戒帝曰詩以關雎爲始言后妃者人倫之本治亂之端也故舜之興以皇英而周之興以任姒筮奔南巢禍階末嬉魯桓滅國咸始齊姜伏見陛下臨朝視政皇后必施帷殿上預聞政事臣愚謂古王者謀及婦人皆破國亡身傾軛繼路且以陰乘陽違天也以婦凌夫違人也違天不祥違人不義故書曰牝雞之晨惟家之索易曰無攸遂在中饋言婦人不得預外政也伏願上以社稷爲重令皇后無居正殿干外朝深居宮掖脩陰教以輔佐天子又道路籍籍皆云胡僧慧範託浮屠法詭惑后妃出入禁奧瀆撓朝政陛下嘗輕騎微服數幸其居上下汙慢君臣虧替臣謂興化致治以康乂國家者繇進善而棄惡孔子曰執左道以亂政者殺假鬼神以危人者殺今慧範亂政危人者也不急誅且有變除惡務本願早裁之帝辱昏狃左右不能有所省納俄墨敕以方士鄭普思爲祕書監葉靜能爲國子祭酒彥範執不可帝曰要已用之不可止彥範曰陛下始復位制詔軍國皆用貞觀故事貞觀時以魏徵虞世南顏師古爲監以孔穎達

爲祭酒如普思等方伎猥下安足繼蹤前烈臣恐物議謂陛下官不擇才以天秩加私愛不從時武三思以遷太后銜恚慮不利諸武而韋后雅爲帝寵畏且三思與烝亂由是朋讒奇中未幾罷彥範等政事五月加特進封扶陽郡王賜姓韋后屬籍錫金銀錦繡皆以鐵券恕十死令朝朔望尋出爲洛州刺史改濠州王同皎謀誅三思事洩三思誣彥範等同逆陰令許州司功參軍鄭愔上變乃貶彥範瀧州司馬敬暉崖州司馬袁恕己賈州司馬崔玄暉白州司馬張柬之新州司馬悉奪勳封三思又疏韋后隱穢榜於道請廢之帝震怒三思猥曰此殆彥範輩爲之命御史大夫李承嘉鞠狀物色其人承嘉即奏彥範暉東之恕己玄暉暴訕搖變內託廢后而實危君人臣無將當伏誅詔有司議罪大理丞李朝隱執奏彥範等未訊即誅恐爲讎家誣讒請遣御史按實卿裴談請即誅斬家籍沒帝業嘗許以不死遂流瀆州禁錮終身子弟年十六以上謫徙嶺外擢承嘉紫光祿大夫襄武郡公后又賜綵五百段錦被一進談刑部尚書而貶朝隱三思又諷節愍太子請夷彥範等三族帝不從三思慮五人者且復用乃納崔湜計遣周利貞矯制殺之利貞至貴州逢彥範即縛曳竹槎上肉盡杖殺之年五十四睿宗即位彥範等並追復官爵賜實封二百戶還其子孫諡曰忠烈開元六年詔與暉玄暉東之恕己勤勞王家皆配享中宗廟庭建中三年復贈彥範爲司徒暉太尉玄暉太子太師東之司徒恕己太子太傅彥範工屬文然不甚喜觀書所

志惟忠孝大略居若不能言及議論帝前雖被詰讓而安辭定色辨爭愈切誅二張也東之勒兵景運門將遂夷諸武洛州長史薛季昶勸曰二凶雖誅產祿猶在請除之會日暮事遽彥範不欲廣殺因曰三思机上肉爾留爲天子籍手季昶歎曰吾無死所矣俄而三思竊入宮因韋后反盜朝權同功者歎曰死我者桓君也彥範亦曰主上昔爲英王故吾留武氏使自誅定今大事已去得非天平初將起事告其母曰忠孝不並立義先國家可也御史李福業者嘗與彥範謀及被殺福業亦流番禺後亡匿吉州參軍敬元禮家吏捕得元禮俱坐死福業將刑謝元禮曰子有親吾甚愧恨元禮曰公窮而歸我我得已乎見者傷之時監察御史盧襲秀亦坐與桓敬善爲冉祖雍所按不屈或報曰南使至桓敬已死襲秀泣然祖雍怒曰彥範等負國君乃流涕且君下獄諸弟皆縱酒無憂色何邪對曰我何負哉正坐與彥範善耳今盡殺諸弟則已如獨殺襲秀恐公不得高枕而眠祖雍色動握其手曰當活公遂得不坐襲秀者其祖方慶武德中爲察非掾秦王器之嘗引與議建成事方慶辭曰母老矣勾身歸養王不逼也貞觀中爲棗城令彥範弟玄範官至常州刺史臣範工部侍郎

薛季昶者絳州龍門人武后時上書自布衣擢監察御史以累左遷平遙尉復拜御史屢按獄如旨擢給事中夏官郎中侯味虛將兵討契丹不利妄言賊行有蛇虎導軍后惡其詭拜季昶爲河北道按察使季

昶馳至軍斬味虛以聞威震北方棗城尉吳澤射殺驛使髡民女髮爲髷州不能効季昶杖殺之然後布恩信甄表善賈或傳季昶曩爲味虛笞辱故深文報怨自給事中數月爲御史中丞坐事左遷久乃入爲雍州長史遷文昌左丞爲洛州長史預誅易之等功進戶部侍郎五王失柄出季昶荊州長史貶儋州司馬初季昶與昭州首領周慶立廣州司馬光楚客不叶懼二怨不敢往歎曰吾至是邪卽具棺沐浴仰藥死葬昭州睿宗立詔贈左御史大夫同彥範等賜一子官季昶剛烈然喜入先語以爲實後雖有辨理不能得也而敦愛故舊禮有名士其長可蓋所缺云

楊元琰者字溫號州閩鄉人漢太尉震十八代孫生數歲未言相者視曰語遲者神定必爲重器及長秀眉美鬚髯崇肩博頤居父喪七日不食服除補梓州參軍平棘令課第一御史府表其政璽書褒厲再擢承宣軍副使忤用事者免載初中爲安南副都護三徙爲荊府長史五遷州刺史咸有風績初張柬之代爲荊州共乘艦江中私語外家革命元琰悲涕慷慨志在王室柬之執政故引爲右羽林將軍謂曰江上之言君固忘之今可以勉乃與李多祚等定計斬二張進雲麾將軍封弘農郡公實封戶五百賜鐵券恕十死敬暉等爲武三思所構元琰知禍未已乃詭計請祝髮事浮屠悉還官封中宗不許暉聞尙戲曰胡頭應祝以多鬣似胡云元琰曰功成不退懼亡我不空言暉感之然已不及計暉等死獨元琰全再遷衛

尉卿又上官封願追寵其親帝哀憐贈越州都督長史李多祚死太子難元琰坐厚善繫獄蕭至忠救之
免容宗立數上書乞骸骨不聽四遷刑部尚書封魏國公徙太子賓客詔設位東宮太子爲拜俄致仕開
元六年卒年七十九諡曰忠生平無留蓄中外食其家常數十人臨終敕諸子薄葬

子仲昌字蔓以通經爲脩文生累調不甚顯以河陽尉對策玄宗擢第一授蒲州法曹參軍判入異等遷
監察御史坐累爲孝義令鸞降庭樹太守蕭恕表其政徙下邳終吏部郎中仲昌資長于吏常分父邑租
振宗黨御身以約善與人交士樂從之游云

敬暉字仲暉絳州平陽人弱冠舉明經聖厯初爲衛州刺史是時河北經突厥所騷方秋而城暉曰金湯
非粟不守豈有棄農畝事池隍哉縱民歸斂閩部賴安遷夏官侍郎出爲太州刺史改洛州長史武后幸
長安爲副留守以治幹聞聖書勞之多賜物段長安二年授中臺右丞以誅二張功加金紫光祿大夫爲
侍中平陽郡公實封五百戶進封齊國暉表請諸武王者宜悉降爵繇是皆爲公三思憤俄封平陽郡王
加特進罷政事初易之已誅薛季昶請收諸武暉亦苦諫不從三思濁亂暉每椎坐悵恨彈指流血尋及
貶又放瓊州爲周利貞所害睿宗時追復官爵又贈秦州都督諡曰肅愍

崔玄暉博陵平安人本名暉武后時有所避改焉少以學行稱叔父祕書少監行功器之舉明經爲高陵

二號第一百十一批

主簿居父喪盡禮廬有燕更巢共乳母盧有賢操常戒玄暉曰吾聞姨兄幸玄馭云子姓仕宦有言其貧
實不自存此善也若貲貨盈衍惡也吾嘗以爲確論比見親表仕者務多財以奉親而親不究所從來必
出于祿粟則善如其不然何異盜乎若今爲吏不能忠清無以戴天履地宜識吾意故玄暉所守以清白
名母亡哀毀甘露降庭樹後以庫部員外郎累遷鳳閣舍人長安元年爲天官侍郎當公介然不受私謁
執政忌之改文昌左丞不踰月武后曰卿向改職乃聞令史設齋相慶此欲肆其貪耳卿爲朕還舊官乃
復拜天官侍郎厚賜綵物三年授鸞臺侍郎同鳳閣鸞臺平章事兼太子左庶子四年遷鳳閣侍郎先是
酷吏誣籍數百家玄暉開陳其枉后感悟皆爲原洗宋璟劾張昌宗不軌事玄暉頗助璟及有司正昌宗
罪而玄暉弟昇爲司刑少卿執論大辟兄弟守正如此后久疾宰相不召見者累月及少間玄暉奏言皇
太子相王皆仁明孝友宜侍醫藥不宜引異姓出入禁闈后慰納以誅二張功爲中書令博陵郡公后遷
上陽宮顧玄暉曰諸臣進皆因人而玄暉我所擢何至是對曰此正所以報陛下也俄拜博陵郡王罷政
事册其妻爲妃賜實封五百戶檢校益州大都督府長史知都督事會貶又流古州道病卒年六十九諡
曰文獻玄暉三世不異居家人怡怡如也貧寓郊墅羣從皆自遠會食無它饗與昇尤友愛族人貧孤者
撫養教勵後雖秉權而子弟仕進不使踰常資當時稱重少頗屬辭晚以非己長不復構思專意經術子

璩亦有文開元二年詔立暉東之神龍之初保父王室姦臣忌焉謫歿荒海流落變遷感激忠義宜以立
暉子璩東之孫並為朝散大夫璩終禮部侍郎璩子渙

渙博綜經術長論議十歲居父喪毀辟加人陸元方異之起家亳州司功參軍還調於是入判者千餘吏
部侍郎嚴挺之施特楊試彝尊銘謂曰子清廟器故以題相命累遷司門員外郎楊國忠惡不附已出為
巴西太守玄宗西狩迎謁于道帝見占奏以為明治體恨得之晚房瑄亦薦之即日拜門下侍郎同中書
門下平章事肅宗立與韋見素等同赴行在時京師未復舉選不至詔渙為江淮宣諭選補使收采遺逸
不以親故自嫌常曰抑才虞謗吾不忍為然聽受不甚精以不職罷為左散騎常侍兼餘杭太守江東採
訪防禦使入遷吏部侍郎集賢院待制簡淡自處時望尤重遷御史大夫元載輔政與中官董秀繁結固
寵渙疾之因進見慨然論載姦代宗曰載雖非重慎然協和中外無間然能臣也對曰和之為貴者由禮
節也不節之以禮焉得和今干戈甫定品物思又載為宰相宜明制度易海內耳目而怙權樹黨毀法為
通竇恩為恕附下苟容乃幽國卑主術臣所未喻帝默然會渙兼稅地青苗錢物使以錢給百官而吏用
下直為使料上直為百司料載諷皇城副留守張清撻其非詔尚書左丞蔣渙按實且載所惡由是貶道
州刺史卒贈太子太傅諡曰元子縱

縱繇協律郎三遷監察御史會詔擇令長授藍田令德化大行縣人立碑頌德渙之貶縱棄金部員外郎
就養後為汴西水陸運兩稅鹽鐵等使王師圍田悅乏食詔縱餉四節度糧軍無乏德宗出奉天方鎮兵
未至縱勸李懷光奔命悉軍財稱所須懷光兵疲久戰次河中遷延不進縱以金帛先度曰濟者即賜眾
趨利爭西遂及奉天遷京兆尹上言懷光反覆不情宜備之及帝徙梁州追扈不及左右短縱素善懷光
殆不來帝曰知縱者朕也非爾輩所及後數日至授御史大夫處大體不急細事獄訴付成僚屬而已自
兵興內外官冗溢時議併省縱奏兵未息仕進者多緒在官則累遷有功而褒賞不可廢也比選集乃據
闕留人怨望滋結朝廷頻詔錄勞而諸道敘優日廣若停減吏員非但承優者無官可敘亦恐序進者無
路勝置矣詔可貞元元年天子郊見為大禮使歲旱用屈縱撙裁文物儉而不陋除吏部侍郎尋為河南
尹時兵雖定民彫耗縱治簡易蠲略細苛先是戍邊者道由洛儲餼取於民縱始令官辦使五家相保自
占發斂以絕胥吏之私又引伊洛漑高仰通利里閭人甚宜之入為太常卿封常山縣公卒年六十二贈
吏部尚書諡曰忠初渙為元載所抑縱訟載世不求聞達渙有嬖妾縱以母事之妾剛酷縱顯官而數
笞諾然率妻子候顏色承養不懈時以為難孫碣

碣字東標及進士第遷右拾遺武宗方討澤潞碣建請納劉稹降忤旨貶鄧城令稍轉商州刺史擢河南

尹右散騎常侍再爲河南尹邑有大賈王可久轉貨江湖間值龐勛亂盡亡其貲不得歸妻詣卜者楊乾夫咨在亡乾夫名善數而內悅妻色且利其富既占陽驚曰乃夫殆不還矣卽陰以百金謝媒者誘聘之妻乃嫁乾夫遂爲富人七年徐州平可久困甚丐衣食歸閭里往見妻乾夫大怒詬逐之妻詣吏自言乾夫厚納賄可久反得罪再訴復坐誣可久恨歎遂失明碣之來可久陳寃碣得其情卽赦吏掩乾夫并前獄史下獄悉發賊姦一日殺之以妻還可久時淫濫獄決而霽都民相語歌舞于道徙陝魏觀察使軍亂貶懷州司馬卒

張東之字孟將襄州襄陽人少涉經史補太學生祭酒令狐德棻異其才便以王佐期之中進士第始調清源丞永昌元年以賢良召時年七十餘矣對策者千餘東之爲第一授監察御史遷鳳閣舍人時突厥默啜有女請和親武后欲令武延秀娶之東之奏古無天子取夷狄女者忤旨出爲合蜀二州刺史故事歲以兵五百戍姚州地險瘴到屯輒死東之論其弊曰臣按姚州古哀牢國域土荒外山岨水深漢世未與中國通唐蒙開夜郎滇笮而哀牢不附東漢光武末始請內屬置永昌郡統之賦其鹽布氈罽以利中土其國西大秦南交趾奇珍之貢不闕劉備據蜀甲兵不充諸葛亮五月度瀘收其產入以益軍使張伯岐選取勁兵以增武備故蜀志稱亮南征後國以富饒此前世置郡以其利之也今鹽布之稅不供珍奇

之貢不入戈戟之用不實於戎行寶貨之資不輸於大國而空竭府庫驅率平人受役蠻夷肝腦塗地臣竊爲陛下惜之昔漢歷博南山涉蘭倉水更置博南哀牢二縣蜀人愁苦行者作歌曰歷博南越蘭津度蘭倉爲他人蓋譏其貪珍奇之利而爲蠻夷所驅役也漢獲其利人且怨歌今減耗國儲費調日引使陛下赤子身膏野草骸骨不歸老母幼子哀號望祭於千里之外朝廷無絲髮利而百姓蒙終身之酷臣竊爲國家痛之往諸葛亮破南中卽用渠率統之不置漢官不留戍兵言置官留兵有三不易置官必夷漢雜居猜嫌將起留兵轉糧爲患滋重後忽反叛勞費必甚故粗設綱紀自然久定臣謂亮之策誠盡羈縻蠻夷之要今姚州官屬旣無固邊厭寇之心又無亮且縱且擒之伎唯詭謀狡算恣情剝扇動會渠遣成朋黨折支諂笑取媚蠻夷拜跪趨伏無復爲恥提挈子弟嘯引凶愚聚會捕博一擲累萬凡逋逃亡命在彼州者戶贏二千專事剽奪且姚州本龍朔中武陵主簿石子仁奏置其後長史李孝讓辛文協死於羣蠻詔遣郎將趙武貴討擊兵無噍類又以將軍李義總繼往而郎將劉惠基戰死其州遂廢臣竊以亮有三不易其言卒驗垂拱中蠻郎將王善寶昆州刺史龔乾福復請置州言課稅自支不旁取於蜀及置州掾李稜爲蠻所殺延載中司馬成琛更置瀘南七鎮戍以蜀兵蜀始擾矣且姚府總管五十七州間皆巨猾游客國家設官所以正俗防姦而無恥之吏敗謬至此今劫害未止恐驚擾之禍日滋宜罷姚州隸

齊府歲時朝覲同蕃國廢瀘南諸鎮而設關瀘北非命使不許交通增濬屯兵擇清良吏以統之臣愚以爲便疏奏不納俄爲荊州大都督府長史長安中武后謂狄仁傑曰安得一奇士用之仁傑曰陛下求文章資歷今宰相李嶠蘇味道足矣豈文士齷齪不足與成天下務哉后曰然仁傑曰荊州長史張柬之雖老宰相材也用之必盡節於國卽召爲洛州司馬宅日又求人仁傑曰臣嘗薦張柬之未用也后曰遷之矣曰臣薦宰相而爲司馬非用也乃授司刑少卿遷秋官侍郎後姚崇爲靈武軍使將行后詔舉外司可爲相者崇曰張柬之沈厚有謀能斷大事其人老惟亟用之卽日召見拜同鳳閣鸞臺平章事進鳳閣侍郎誅二張也柬之首發其謀以功擢天官尙書同鳳閣鸞臺三品漢陽郡公實封五百戶不半歲以漢陽郡王加特進罷政事柬之旣失權願還襄州養疾乃授襄州刺史中宗爲賦詩祖道又詔羣臣餞定鼎門外至州持下以法雖親舊無所縱貸會漢水漲齧城郭柬之因壘爲隄以遏湍怒閩境賴之又懇辭王爵不許俄及貶又流瀧所憂憤卒年八十二景雲元年贈中書令諡曰文貞授一子官柬之剛直不傳會然竊於學論次書數十篇子愿漪愿仕至襄州刺史漪以著作佐郎侍父襄陽恃其家立功簡接鄉人鄉人怨之初易之等誅後中宗猶監國告武氏廟而天久陰不霽侍御史崔渾奏陛下復國當正唐家位號稱天下心奈何尙告武氏廟請毀之復唐宗廟帝嘉納是日詔書下霄翳澄駭咸以爲天人之應

袁恕己滄州東光人仕累司刑少卿知相王府司馬與誅二張又從相王統南衙兵備非常以功加銀青光祿大夫中書侍郎同中書門下三品封南陽郡公實封五百戶將作少匠楊務廉者以工巧進恕己恐其復敢游娛侈麗之漸言於中宗曰務廉位九卿忠言嘉謨不聞而專事營構以媚上不斥之亡以昭德乃授陵州刺史未幾拜中書令特進南陽郡王罷政事例及貶又流瓊州爲周利貞所逼恕己素餽黃金至是飲野葛數升不死憤懣杯土以食爪甲盡不能絕乃擊殺之諡曰貞烈孫高
高字公頤少慷慨有節尙擢進士第代宗時累遷給事中建中中拜京畿觀察使坐累貶韶州刺史復拜給事中德宗將起盧杞爲饒州刺史高當草詔見宰相盧翰劉從一曰杞當國矯誣陰賊斥忠誼傲明德反易天常使宗祏失守天下沈痾朝廷不寘以法才示貶黜今還授大州天下其謂何翰等不悅命舍人作詔詔出高執不下奏曰陛下用杞爲相出入三年附下罔上使陛下越在草莽羣臣願食其肉且不厭漢法三光不明雨旱不時皆宰相請罪小者免大者戮杞罪萬誅陛下赦不誅止貶新州俄又內移今復拜刺史誠失天下望帝曰杞不逮是朕之過朕已再赦答曰杞天資詭險非不逮彼固所餘赦者止赦其罪不宜授刺史願問外廷并赦中人聽於民若億兆異臣之言臣請前死諫官亦力爭帝前帝曰與上佐可乎羣臣奉詔翌日遣使慰高曰朕惟卿言切至已如奏太子少保韋倫曰高言勁挺自是陛下良臣

宜加優禮貞元二年帝以大盜後關輔百姓貧田多荒蕪詔諸道上耕牛委京兆府勸課量地給牛不滿五十畝不給高以爲聖心所憂乃在窮乏今田不及五十畝卽是窮人請兩戶共給一牛從之卒年六十八中外悵情憲宗時李吉甫言其忠蹇特贈禮部尙書文宗開成三年又詔玄暉曾孫郢爲監察御史暉曾孫元膺河南丞東之四世孫憬壽安尉恕己曾孫德文校書郎始帝訪御史中丞狄兼善以仁傑功且言五王遺烈乃求其後秩以官唯彥範後無聞云

贊曰五王提衛兵誅嬖臣中興唐室不淹辰天下晏然其謀深矣至謂中宗爲英王不盡誅諸武使天子籍以爲威何其淺耶矧牙一敗爲豔后豎兒所乘劫持戮辱若放豚然何哉無亦神奪其明厚韋氏毒以興先天之業乎不然安李之功賢於漢平勃遠矣

唐書卷一百二十

唐書卷一百二十考證

敬暉傳絳州平陽人○舊書絳州太平人考地理志絳州領縣有太平無平陽當從舊書

長安二年授中臺右丞○舊書作長安三年

崔玄暉傳賜實封五百戶○舊書作四百戶

袁恕己孫高坐累貶韶州刺史○舊書失旨貶韶州長史

唐書卷一百二十一

宋 端 明 殿 學 士 宋 祁 撰

列傳第四十六

劉鍾崔二王

劉幽求冀州武彊人聖祿中舉制科中第調閬中尉刺史不禮棄官去久之授朝邑尉桓彥範等誅張易之昌宗而不殺武三思幽求謂彥範曰公等無葬地矣不早計後且噬臍不從既五王皆為三思構死臨淄王入誅韋庶人預參大策是夜號令詔敕一出其手以功授中書舍人參知機務爵中山縣男實封二百戶授二子五品官二代俱贈刺史睿宗立進尚書右丞徐國公增封戶至五百賜物千段奴婢二十人第一區良田千畝金銀雜物稱是景雲二年以戶部尚書罷政事不旬月遷吏部拜侍中璽詔曰頃王室不造中宗厭代戚孽專亂將隕社稷朕與王公皆幾于難幽求處危思奮翊贊聖儲協和義士震殄元惡國家之復存繫幽求是賴厥庸茂焉朕用嘉之雖胙以土宇而賦入未廣昔西漢行封更擇多戶東京定賞復增大邑宜加賜實封二百戶子子孫孫傳國無絕特免十死銘諸鐵券以傳其功先天元年為尚書右僕射同中書門下三品監脩國史幽求自謂有勞于國在諸臣右意望未滿而竇懷貞為左僕射崔暹

爲中書令殊不平見於言面已而湜等附太平公主有逆計幽求與右羽林將軍張障定計使障說玄宗曰湜等皆太平黨與日夜陰計若不早圖且產大害太上不得高枕矣臣請督羽林兵除之帝許之未幾也而障漏言於侍御史鄧光賓帝懼卽列其狀睿宗以幽求等屬吏劾奏以疎間親罪應死帝密申右之乃流幽求於封州障於峯州光賓於繡州明年太平公主誅卽日召復舊官知軍國事還封戶賜錦衣一襲開元初進尙書左丞相兼黃門監俄以太子少保罷姚崇素忌之奏幽求鬱快散職有怨言詔有司鞠治宰相盧懷慎等奏言幽求輕肆不恭失大臣體乖崖分之節翌日貶睦州刺史削實封戶六百遷杭郴二州志憤卒于道年六十一贈禮部尙書諡曰文獻六年詔與蘇瓌配享睿宗廟廷建中中追贈司徒鍾紹京虔州贛人初爲司農錄事以善書直鳳閣武后時署諸宮殿明堂及銘九鼎皆其筆也景龍中爲苑總監會計韋氏難紹京帥戶奴丁夫從事平夜拜中書侍郎參知機務明日進中書令越國公實封五百戶賚賜與劉幽求等旣當路以賞罰自肆當時惡之因上疏讓官睿宗用薛稷謀進戶部尙書出爲彭州刺史玄宗卽位復拜戶部尙書增實封改太子詹事不爲姚崇所喜與幽求並以怨望得罪貶果州刺史賜封邑百戶後坐它事貶懷恩尉悉奪階封再遷温州別駕十五年入朝見帝泣曰陛下忘疇日事邪忍使棄死草莽且同時立功者今骨已朽而獨臣在陛下不垂愍乎帝惻然卽日授太子右諭德久之還

少詹事年踰八十以官壽卒紹京嗜書畫如王羲之獻之褚遂良真跡藏家者至數十百卷建中中追贈

太子太傅

崔日用滑州靈昌人擢進士第爲芮城尉大足元年武后幸長安陝州刺史宗楚客委以頓峙饋獻豐甘稱過賓使者楚客歎其能亟薦之擢爲新豐尉遷監察御史陰附安樂公主得稍遷神龍中鄭普思納女後宮日用劾奏中宗初不省廷爭切至普思由是得罪時諸武若三思延秀及楚客等權寵交煽日用多所結納驟拜兵部侍郎宴內殿酒酣起爲回波舞求學士卽詔兼脩文館學士帝崩韋后專制畏禍及更因僧普潤道士王隱私謁臨淄王以自託且密贊大計王曰謀非計身直紆親難爾日用曰至孝動天舉無不克然利先發不則有後憂及韋氏平夜詔權雍州長史以功授黃門侍郎參知機務封齊國公賜實戶二百坐與薛稷相忿競罷政事爲婺州長史歷揚汴兗三州刺史由荊州長史入奏計因言太平公主逆節有萌陛下往以宮府討有罪臣子勢須謀與力今據大位一下制書定矣帝曰畏驚太上皇奈何日用曰庶人之孝承順顏色天子之孝惟安國家定社稷若令姦宄竊發以亡大業可謂孝乎請先安北軍而後捕逆黨於太上皇固無所驚帝納之及討逆詔權檢校雍州長史以功益封二百戶進吏部尙書會帝誕日日用采詩大小雅二十篇及司馬相如封禪書獻之借以諷諭且勸告成事有詔賜衣一副物五

十段以示無言不酬之義久之坐兄累出爲常州刺史後以例減封戶三百徙汝州開元七年詔曰唐元之際日用實費大謀功多不宜減封復食二百戶徙并州長史卒年五十并人懷其惠吏民數百皆縞服送喪贈吏部尚書諡曰昭再贈荊州大都督日用才辯絕人而敏于事能乘機反禍取富貴先天後求復相然亦不獲也嘗謂人曰吾平生所事皆適時制變不專始謀然每一反思若芒刺在背云子宗之襲封亦好學寬博有風檢與李白杜甫以文相知者日用從父兄日知字子駿少孤貧力學以明經進至兵部員外郎與張說同爲魏元忠朔方判官以健吏稱遷洛州司馬會譙王重福之變官司逃日知獨率吏卒助屯營擊賊以功加銀青光祿大夫遷殿中少監建言廐馬多請分牧隴右省關畿芻調授荊州長史四遷京兆尹封安平縣侯坐賊爲御史李如璧所劾歛縣丞後歷殿中監進中山郡公說執政薦爲御史大夫帝不許遂爲左羽林大將軍而自用崔隱甫隱甫繇是怨說日知俄授太常卿自以處朝廷久每入謁必與尚書齒時謂尚書裏行終潞州長史諡曰襄

王琚懷州河內人少孤敏悟有才略明天文象緯以從父隱客嘗爲鳳閣侍郎故數與貴近交時年甫冠見駙馬都尉王同皎同皎器之會謀刺武三思琚義其爲卽與周璟張仲之等共計事洩亡命自備於揚州富商家識非庸人以女嫁之厚給以貲琚亦賴以濟睿宗立琚自言本末主人厚齋使還長安玄宗爲

太子間游獵韋杜間怠休樹下琚以儒服見且請過家太子許之至所廬乃蕭然寔陋坐久殺牛進酒殊豐厚太子駭異自是每到韋杜輒止其廬初太子在潞州襄城張暉爲銅鞮令性豪殖喜賓客弋獵事厚奉太子數集其家山東倡人趙元禮有女善歌舞得幸太子止暉第其後生子瑛者也太子已平內難召暉拜宮門郎與姜皎崔滌李令問王守一薛伯陽等並侍左右令問累擢殿中少監守一太僕少卿此數人以東宮皆勢重天下琚是時方補諸暨縣主簿過謝東宮至廷中徐行高視侍衛呵止曰太子在琚怒曰在外惟聞太平公主不聞有太子太子本有功於社稷孝於君親安得此聲太子遽召見琚曰韋氏躬行殺逆天下動搖人思李氏故殿下取之易也今天下已定太平專思立功左右大臣多爲其用天子以元妹能忍其過臣竊爲殿下寒心太子命坐且泣曰計將安便琚曰昔漢蓋主供養昭帝其後與上官桀謀殺霍光不及天子而帝猶以大義去之今太子功定天下公主乃敢妄圖大臣樹黨有廢立太子誠召張說劉幽求郭元振等計之憂可紓也太子曰先生何以自隱而日與寡人游琚曰臣善丹沙且工諧隱願比優人太子喜恨相知晚翌日授詹事府司直內供奉兼崇文學士日以諸王及姜皎等入侍獨琚常豫祕謀不踰月遷太子舍人兼諫議大夫太子受內禪擢中書侍郎公主謀益甚幽求暉謀先事誅之侍御史鄧光賓漏謀不克皆得罪久之琚見事迫請帝決策先天二年七月乃與岐王薛王姜皎李令問

王毛仲王守一以鐵騎至承天門太上皇聞外譁譟召郭元振升承天樓閉關以拒俄而待御史任知古召募數百人於朝堂不得入少選瑒從帝至樓下誅蕭至忠岑義賢懷貞斬常元楷李慈北闕下賈膺福李猷於內客省事平瑒進戶部尚書封趙國公校工部尚書楚國公毛仲輔國大將軍霍國公守一太常卿晉國公各食實戶五百令問殿中監宋國公實戶三百瑒校令問辭不就以舊官增戶二百於是帝召燕內殿賜金銀雜皿皆一牀帛二千第一區帝於瑒眷委特異豫大政事時號內宰相每見閣中視日薄乃得出遇休日使者至第召之而皇后亦使尚宮勞瑒母賜賚接足羣臣不能無望或說帝曰王瑒麻嗣宗皆譎詭縱橫可與履危不可與共安方天下已定宜益求絕樸經術士以自輔帝悟稍疏之俄拜御史大夫持節巡天兵以北諸軍改紫微侍郎道未至拜澤州刺史削封戶百歷九刺史復封戶又改六州二郡瑒自以立勳至天寶時爲舊臣性豪侈其處方面去故就新受饋遺至數百萬侍兒數十寶帳備具閤門三百口旣失志稍自放不能遵法度在州與官屬小史會豪飲賭博藏鉤爲樂每徙官車馬數里不絕從賓客女伎馳弋凡四十年李邕故與瑒善皆華省外遷書疏往復以譴謫留落爲懷右相李材甫恨瑒恃功使氣欲除之使人劾瑒宿贓削封階貶江華員外司馬又使羅希爽深按其罪瑒懼仰藥未及死希爽緘之時人哀其無罪始瑒爲中書侍郎母居洛陽來京師讓瑒曰爾家上世皆州縣職今汝無攻

城野戰勞以諂佞取容海內切齒吾恐汝家墳墓無人復掃除也瑒卒不免寶應元年贈太子少保太平之諡張暉召還爲大理卿封鄧國公實封戶三百進京兆尹入侍宴樂出主京邑時人以爲寵然自以幹治稱累遷太子詹事判尚書左右丞再爲羽林大將軍三至左金吾大將軍以年高加特進子履冰季良弟昭仕皆清近暉嘗還鄉上家帝賜詩及錦袍繒綵乘驛就道子弟車馬聯咽使者賜賚敕州縣供饌居處尊顯天保五載卒年九十贈開府儀同三司履冰歷金吾將軍季良殿中監俱列榮戟

王毛仲高麗人父坐事沒爲官奴生毛仲故長事臨淄王王出潞州有李守德者爲人奴善騎射王市得之並侍左右而毛仲爲明悟景龍中王還長安二人常負房簏以從王數引萬騎帥長及豪俊賜飲食金帛得其驩心毛仲曉旨亦布誠結納王嘉之韋后稱制令韋播高嵩爲羽林將軍押萬騎以苛峭樹威果毅葛福順陳玄禮訴於王王方與劉幽求薛崇簡及利仁府折衝麻嗣宗謀舉大計幽求諷之皆願效死遂入討韋氏守德從帝止苑中而毛仲匿不出事定數日乃還不之責例擢將軍王爲皇太子以毛仲知東宮馬駝鷹狗等坊不旬歲至大將軍階三品與誅蕭至忠等以功進輔國大將軍檢校內外閑廐知監牧使進封霍國公實封戶五百與諸王及姜皎等侍禁中至連榻而坐帝暫不見惘惘若有失見則釋然開元九年詔持節爲朔方道防禦討擊大使與左領軍大總管王峻天兵軍節度使張說幽州節度使裴

仙先等數計事毛仲始見飾擢頗持法不避權貴爲可喜事兩營萬騎及閑厰官吏憚之無敢犯雖官田草萊樵斂不敢欺於牧事尤力婉息不訾初監馬二十四萬後乃至四十三萬牛羊皆數倍時藊麥首種千九百頃以禦冬市死畜售絹八萬募嚴道甌僮千口爲牧圉檢勒芻菽無漏隱歲贏數萬石從帝東封取牧馬數萬匹每色一隊相間如錦繡天子才之還加開府儀同三司自開元後唯王仁皎姚崇宋璟及毛仲得之然資小人志既滿不能無驕遂求爲兵部尙書帝不悅毛仲鞅鞅又與葛福順爲姻家而守德及左監門將軍盧龍子唐地文左右威衛將軍王景耀高廣濟數十人與毛仲相倚杖爲姦毛恃舊最不法中使至其家稱詔毛仲不甚恭位卑者或踞見逆意卽侮許以氣凌之直出其上高力士楊思勗等銜之毛仲有兩妻其一上所賜皆有國色嘗生子帝命力士就賜仍授子五品官還問曰毛仲喜乎力士奏毛仲熟視臣曰是子亦何辱三品官帝怒曰前毛仲負我未嘗爲意今以嬰兒顧云云力士等知帝怒它日從容曰北門奴官皆毛仲所與不除之必起大患後毛仲移書太原索甲仗少尹巖挺之以聞帝恐毛仲遂亂匿其狀十九年有詔貶灤州福順壁州守德嚴州盧龍子唐地文振州王景耀黨州高廣濟道州並爲別駕員外置毛仲四子悉奪官貶惡地緣坐數十人有詔縊毛仲於零陵守德本名宜得立功乃改今名位武衛將軍嘗過故主於道主走避守德命左右迎之至第親上食奉酒主流汗不敢當數日入

一號第一百十一批

奏曰臣蒙國恩過分而故主無寸祿請解官授之帝嘉其志擢爲郎將陳玄禮宿衛宮禁以瀆篤自檢帝嘗欲幸虢國夫人第諫曰未宣敕不可輕去就帝爲止後在華清宮正月望夜帝將出遊復諫曰宮外曠野無備豫陛下必出遊願歸城闕帝不能奪安祿山反謀誅楊國忠闕下不克至馬嵬卒誅之從入蜀遣封蔡國公及李輔國遷帝西內立禮以老卒贊曰幽求之謀紹京之果日用之智琚之辯皆足濟危紓難方多故時必資以成功者也雄邁之才不用其奇則厭然不滿誠不可與共治乎哉姚崇勸不用功臣宜矣然待幽求等恨太薄云毛仲小人志得而驕不足論已

唐書卷一百二十一

Blank columns for text in the right-hand page.

唐書卷一百二十二

宋 端 明 殿 學 士 宋 祁 撰

列傳第四十七

魏韋郭

魏元忠宋州宋城人爲太學生跌蕩少檢久不調整匡人江融曉兵術元忠從之游盡傳所學儀鳳中吐蕃數盜邊元忠上封事洛陽宮言命將用兵之要曰天下之柄有二文武而已至制勝御人其道一也今言武者先騎射不稽之權略言文者首篇章不取之經綸臣觀魏晉齊梁才固不乏然何益治亂哉養由基射能穿札不止鄢陵之奔陸機識能辨亡無救河橋之敗斷可見已夫才生於世世實須才何世而不生才何才而不資世故物有不求未有無物之歲士有不用未有無士之時也志士在富貴與賤貧皆思立功名以傳于後然知己難而所遇罕士之懷琬琰就煨塵抱棟幹困溝壑者悠悠之人直觀此士之貧賤安知其方略哉故漢拜韓信舉軍驚笑蜀用魏延羣臣歛望此富貴者易爲善貧賤者難爲功也昔漢文帝不知魏尚賢而囚之知李廣才而不用乃歎其生不逢時夫以廣之才天下無雙時方歲事匈奴而卒不任故近不知尚廣之賢而遠想廉頗李牧馮唐是以知其有而不能也此身爲時主所知不得盡

其才也晉羊祜謀舉吳賈充荀勗沮之祜歎曰天下事不如意十常七八以二人不同終不大舉此據立功之地而不獲展其志也布衣之人懷奇抱策而望朝奏夕召豈易得哉臣願歷訪文武五品以上得無有智如羊祜武如李廣而不得聘其才者乎使各言其志毋令久失職又言人無常俗政有治亂軍無常勝將有能否兵爲王者大事存亡繫焉將非其任則殄人敗國齊段孝立有言持大兵如擊盤水一致隨跌求止可得哉周亞夫堅壁以挫吳楚司馬懿閉營而困諸葛亮此皆全軍制勝不戰而卻敵是知大將臨戎以智爲本今之用人類將家子或死事孤兒進非幹略雖竭力盡誠不免於傾敗若之何用之且建功者言其所濟不言所來言其所能不言所藉若陳湯呂蒙馬隆孟觀悉出貧賤而勳伐甚高不聞其家世將帥也故陰陽不和擢士爲相蠻貊不廷擢校爲將今以四海之廣億兆之衆豈無卓越之士臣恐未之思乎又賞者禮之基罰者刑之本禮崇則謀夫竭其能實厚則義士輕其死刑正故君子勗其心罰重則小人懲其過賞罰者軍國之綱紀政教之藥石吐蕃本非疆敵而薛仁貴郭待封至棄甲喪師脫身以免國家寬政罪止削除網漏吞舟何以過此雖陛下顧收後効然朝廷所少豈此一人乎夫賞不勸謂之止善罰不懲謂之縱惡臣誠疏賤干非其事豈欲間陛下君臣生薄厚哉正以刑賞一虧百年不復故國無賞罰雖堯舜不能爲今罰旣不行賞復難信故議者皆謂比日征行虛立賞格而無其實蓋忘大體

之臣恐資勳庸竭府庫留意錐刀以爲益國所謂惜毫釐失千里者也且黔首雖微不可以欺安有寓不信之令設虛賞之格乎自蘇定方平遼東李勣破平壤賞旣不行勳亦淹廢歲月紛淆真僞相錯臣以吏不奉法慢自京師僞勳所由主司過也其則不遠近在尙書省中然未聞斬一臺郎戮一令史使天下知之陛下何照遠而不照近哉神州化首文昌政本治亂攸在臣故冒死而言夫明鑑所以照形往事所以知今臣請借近以爲諭貞觀中萬年尉司馬玄景舞文飾智以邀乾沒太宗棄之都市後征高麗總管張君义不進擊賊斬之旗下臣以爲僞勳之罪多於玄景仁貴等敗重於君义使早誅之則諸將豈復有負哉慈父多敗子嚴家無格虜且人主病不廣大人臣病不節儉臣恐陛下病之於不廣大過在於慈父斯日月一蝕也又今將吏貪暴所務口馬財利臣恐戎狄之平未可旦夕望也凡人識不經違皆言吐蕃戰前隊盡後隊方進甲堅騎多而山有氛瘴官軍遠入前無所獲不積穀數百萬無大舉之資臣以爲吐蕃之望中國猶孤星之對太陽有自然之大小不疑之明暗夷狄雖禽獸亦知愛其性命豈肯前盡死而後進哉由殘迫其人非下所願也必其戰不顧死則兵法許敵能鬪當以知算取之何憂不克哉向使將能殺敵橫尸蔽野斂其頭顱以爲京觀則此虜聞官軍鐘鼓望塵卻走何暇前隊皆死哉自仁貴等覆師喪氣故虜得跳梁山谷又師行必藉馬力不數十萬不足與虜爭臣請天下自王公及齊人挂藉之口人稅

百錢又弛天下馬禁使民得乘大馬不爲數限官籍其凡勿使得隱不三年人間畜馬可五十萬卽詔州縣以所稅口錢市之若王師大舉一朝可用且虜以騎爲彊若一切使人乘之則市取其良以益中國使得漸耗虜兵之盛國家之利也高宗善之授祕書省正字直中書省仗內供奉遷監察御史帝嘗從容曰外以朕爲何如主對曰周成康漢文景也然則有遺恨乎曰有之王義方一世豪英而死草萊議者謂陛下不能用賢帝曰我適用之聞其死顧已無及元忠曰劉藏器行副於才陛下所知今七十爲尙書郎徒歎彼而又棄此帝默然慙遷殿中侍御史徐敬業舉兵詔元忠監李孝逸軍至臨淮而偏將雷仁智爲賊敗孝逸懼其鋒按兵未敢前元忠曰公以宗室將天下安危繫焉海內承平久聞狂狡竊發皆傾耳翹心以待其誅今軍不進使遠近解情萬有一朝廷以他將代公且何辭孝逸然之乃部分進討時敬業保下阿谿弟敬猷屯淮陰咸請先擊下阿下阿敗淮陰自破今淮陰急敬業必救是敵在腹背也元忠曰不然賊勁兵盡守下阿利在一決苟有負則大事去矣敬猷博徒不知戰且其兵寡易搖大軍臨之勢宜克敬業畏直擣江都必將邀我中路吾今乘勝進又以逸擊勞破之必矣譬之逐獸弱者先禽今捨必禽之弱而趨難敵之彊非計也孝逸乃引兵擊淮陰敬猷脫身遁遂進擊敬業平之遷授司刑正遷洛陽令昭周興獄當死以平揚楚功得流歲餘爲御史中丞復爲來俊臣所構將就刑神色不動前死者宗室子三十

餘尸相枕藉於前元忠顧曰大丈夫行居此矣俄敕鳳閣舍人王隱客馳騎免死傳聲及于市諸囚歡叫元忠獨堅坐左右命起元忠曰未知寶否既而隱客至宣詔已乃徐謝亦不改容流費州復爲中丞歲餘陷侯思止獄仍放嶺南酷吏誅人多訟元忠者乃召復舊官因侍宴武后曰卿累負謗鑠何耶對曰臣猶鹿也羅織之吏如獵者苟須臣肉爲之羹耳彼將殺臣以求進臣顧何辜聖歷二年爲鳳閣侍郎同鳳閣鸞臺平章事俄檢校并州長史天兵軍大總管以備突厥遷左肅政臺御史大夫兼檢校洛州長史治號威明張易之家奴暴百姓橫甚元忠笞殺之權豪憚服俄爲隴右諸軍大使以討吐蕃又爲靈武道行軍大總管禦突厥元忠馭軍持重雖無赫然功而亦未嘗敗中宗在東宮爲檢校左庶子時二張勢傾朝廷元忠嘗奏曰臣承先帝之顧且受陛下厚恩不能徇忠使小人在君側臣之罪也易之等恨怒因武后不豫卽共譖元忠與司禮丞高戩謀挾太子爲耐久朋遂下制獄詔皇太子相王及宰相引元忠等辨於廷不能決昌宗乃引張說爲證說初僞許之至是迫使言狀不應后又促之說曰臣不聞也易之等遽曰說與同逆說曩嘗謂元忠爲伊周夫伊尹放太甲周公攝王位此反狀明甚說曰易之昌宗安知伊周臣乃能知之伊尹周公歷古以爲忠臣陛下不遺學伊周將何効焉說又曰臣知附易之朝夕可宰相從元忠則族滅今不敢面欺懼元忠之寃后寤其譏然重違易之故貶元忠高要尉中宗復位召爲衛尉卿同中

書門下三品不闕旬遷兵部尚書進侍中武后崩帝居喪軍國事委元忠裁可拜中書令封齊國公神龍二年爲尚書右僕射知兵部尚書當朝用事羣臣莫敢望謁告上家詔宰相諸司長官祖道上東門賜錦袍給千騎四人侍賜銀千兩元忠到家於親戚無所賑施及還帝爲幸白馬寺迎勞之安樂公主私請廢太子求爲皇太女帝以問元忠元忠曰公主而爲皇太女駙馬都尉當何名主恚曰山東木疆安知禮阿母子尙爲天子我何嫌宮中謂武后爲阿母子故主稱之元忠固稱不可自是語塞武三思用事京兆臯月將渤海高軫上書言其惡帝榜殺之後莫敢言王同皎謀誅三思不克反被族元忠居其間依違無所建明初元忠相武后有清正名至是輔政天下傾望冀幹正王室而稍憚權幸不能賞善罰惡譽望大減陳郡男子袁楚客者以書規之曰今皇帝新服厥德任官惟賢才左右惟其人因以布大化充古誼以正天下君侯安得事循默哉苟利社稷專之可也夫安天下者先正其本本正則天下固國之興亡繫焉太子天下本譬之大樹無本則枝葉零悴國無太子朝野不安儲君有次及之勢故師保教以君人之道用蘊崇其德所以重天下也今皇子旣長未定嫡嗣是天下無本天下無本猶樹而亡根枝葉何以存乎願君侯以清宴之間言於上擇賢而立之此安天下之道曠而不置此朝廷一失也女有內則男有外傳豈相濫哉幕府者丈夫之職今公主並開府置吏以女處男職所謂長陰抑陽也而望陰陽不愆風雨時若

一一號第一百十五世

得乎此朝廷二失也今度人旣多繻衣半道不本行業專以重寶附權門皆有定直昔之賣官錢入公府今之賣度錢入私家以茲入道徒爲游食此朝廷三失也唯名與器不可以假人故曰天工人其代之夫代天非材不可也代非其人必失天意失天意而無患禍未之有也今倡優之輩因耳目之好遂授以官非輕朝廷亂正法邪人君無私私怒害物私賞費財況私人以官乎此朝廷四失也賢者邦家之光任之致治棄之生亂近詔博求多士雖有好賢之名無得賢之實蓋有司選士非賄卽勢上失天心下違人望非爲官擇吏乃爲人擇官葛洪有言舉秀才不知書察孝廉濁如泥高第賢良者如畫此朝廷五失也闕暨者給宮掖掃除事古以奴隸畜之中古以來大道乖喪疏賢哲親近習乃委之以事授之以權故暨刁亂齊伊戾敗宋君側之人衆所畏懼所謂鷹頭之蠅廟垣之鼠者也後漢時用事尤甚晚節卒亂天下今大君中興獨有關暨坐升班秩旣無正闕率授員外乃盈千人縮青紫耗府藏前事之驗後事之師此朝廷六失也古者茅茨採椽以儉約遇子孫所以愛力也今公主所賞傾庫府所造皆官供其疏築臺沼崇峙觀廡山無木石木無近產造之終歲功用不絕夫爲君所以養人非以害人今外戚不助養而反害之是使人主受謗天下此朝廷七失也官以安人非以害于人也先王欲人治必選材欲人安必省事此誠同天下憂也人有樂君共之君有樂人慶之可謂同樂矣如此則上下無間而均一體也今天下困窮州

牧縣宰非以選進割剝自私人不聊生是有憂而上不卹也而更員外置官非助桀欺夫人情自以員外吏恐下不已畏也必峻法懼之恐財不已奉也必枉道奪之欲不亂可得哉古語有之十羊九牧羊既不得食人亦不得息書曰官不必備惟其人此言正員猶難其備況員之外乎此朝廷八失也政出多門大亂之漸近封數夫人皆先帝宮嬪以爲備內職則不當知外不備內職則自可處外而令出入禁掖使內言必出外言必入固將弄君之法縱而不禁非所以重宗廟固國家孔子曰彼婦之口可以出走彼婦之謁可以死敗此朝廷九失也不以道事其君者所以危天下也危天下之臣不可不逐安天下之臣不可不任今有引鬼神執左道以惑主者託鬼神爲難知故致其詐而據非才之地食非德之祿此國盜也傳曰國將興聽於人將亡聽於神今幾聽於神乎此朝廷十失也君侯不正誰與正之元忠得書益慙以三思權專思有以誅之會節愍太子起兵與聞其謀太子已誅三思引兵走闕下元忠子太僕少卿昇遇於承安門太子舊使從戰已而被殺議者未辨逆順元忠誦言曰既誅賊謝天下雖死鼎鑊所甘心惟皇太子沒爲恨耳帝以其嘗有功且爲高宗武后素所禮置不問宗楚客紀處訥大怒固請夷其族不聽元忠不自安上政事及國封詔以特進齊國公致仕朝朔望楚客等引右衛郎將姚廷筠爲御史中丞暴奏反狀繇是貶渠州司馬楊再思李嶠皆希順楚客傳致元忠罪唯蕭至忠議當申宥之楚客復遣再思與

冉祖雍奏元忠緣逆不宜處內地監察御史袁守一固請行誅遂貶務川尉守一又劾天后嘗不豫狄仁傑請陛下監國元忠止之此其逆久萌帝謂楊再思曰守一非是事君者一其心豈有上少疾違異論哉朕未見元忠過也元忠至洛陵卒年七十餘景龍四年贈尚書左僕射齊國公本州刺史睿宗詔陪葬定陵以實封一百五十戶賜其子晃開元六年諡曰貞元忠始名真宰以諸生見高宗高宗慰遺不知謝卽出儀舉自安帝目送謂薛元超曰是子未習朝廷儀然名不虛謂真宰相也避武后母諱改今名

韋安石京兆萬年人曾祖孝寬爲周大司空鄭國公祖津隋大業末爲民部侍郎與元文都等留守洛拒李密戰上東門爲密禽後王世充殺文都而津獨免密敗復歸洛世充平高祖素與津善授諫議大夫檢校黃門侍郎陵州刺史卒父琬仕爲成州刺史安石舉明經調乾封尉雍州長史蘇良嗣器之永昌元年遷雍州司兵參軍良嗣嘗謂安石曰大才當大用徒勞州縣可乎薦于武后擢膳部員外郎遷并州司馬有善政后手制勞問陟拜德鄜二州刺史安石性方重不苟言笑其政尙清嚴吏民尊畏久視中遷文昌右丞以鸞臺侍郎同鳳閣鸞臺平章事兼太子左庶子仍侍讀尋知納言事時二張及武三思寵橫安石數折辱之會侍宴殿中易之引蜀商宋霸子等博塞后前安石跪奏商等賤類不當戲殿上顧左右引出坐皆失色后以安石辭正改容慰勉鳳閣侍郎陸元方自以爲不及退告人曰韋公真宰相后嘗幸與

奉宮議趨疾道安石曰此道板築所成非自然之固千金子且誠垂堂況萬乘可輕乘危哉后爲回輦長安二年同鳳閣鸞臺三品俄又知納言檢校揚州大軍督府長史神龍元年罷政事俄復同三品遷中書令兼相王府長史封鄴國公賜封三百戶加特進爲侍中中宗與韋后以正月望夜幸其第賚賜不貲帝嘗幸安樂公主池主請御船安石曰御輕舟乘不測非帝王事乃止睿宗立授太子少保改封鄴國復爲侍中中書令進開府儀同三司太平公主有異謀欲引安石數因其婿唐賧邀之拒不往帝一日召安石曰朝廷傾心東宮卿胡不察對曰太子仁孝天下所稱且有大功陛下今安得亡國語此必太平公主計也帝矍然曰卿勿言朕知之主竊聞乃構飛變欲訊之賴郭元振保護免遷尙書右僕射兼太子賓客同三品俄罷政事留守東都會妻薛怨媾婢笞殺之爲御史中丞楊茂謙所劾下遷蒲州刺史徙青州安石在蒲太常卿姜皎有所請拒之皎弟晦爲中丞以安石昔相中宗受遺制而宗楚客韋溫擅削相王輔政語安石無所建正諷侍御史洪子輿劾舉子輿以更赦不從監察御史郭震奏之有詔與韋嗣立趙彥昭等皆貶安石爲河州別駕皎又奏安石護作定陵有所盜沒詔籍其贓安石歎曰祇須我死乃已發憤卒年六十四開元十七年贈蒲州刺史天寶初加贈左僕射鄴國公諡文貞二子陟斌陟字殷卿與弟斌俱秀敏異常童安石晚有子愛之神龍二年安石爲中書令陟甫十歲授溫王府東閣

祭酒朝散大夫風格方整善文辭書有楷法一時知名士皆與游開元中居喪以父不得志歿乃與斌杜門不出八年親友更往敦曉乃彊調爲洛陽令宋璟見陟歎曰盛德遺範盡在是矣累除吏部郎中中書令張九齡引爲舍人與孫逖梁涉並司書命時號得才遷禮部侍郎陟於鑿裁尤長故事取人以一日試爲高下陟許自通所工先就其能試之已乃程考由是無遺材遷吏部侍郎選人多僞集與正調相冒陟有風采擿辨無不伏者黜正數百員銓綜號爲公平然任威嚴或至嘗詰議者嘗其峻又自以門品可坐階三公居常簡貴視僚黨警然其道誼合雖後進布衣與均禮李林甫惡其名高恐逼己出爲襄陽太守徙河南採訪使以判官員錫善訊覆支使韋元甫工書奏時號員推韋狀陟皆倚任之俄襲鄴國公坐事貶守鍾離義陽後爲河東太守以失職內怏怏乃毀廉隅頗餉謝權倖欲自結天寶十二載入考華清宮楊國忠忌其才謂拾遺吳豸之曰子能發陟罪乎吾以御史相處豸之乃劾陟饋遺事國忠又使甥婿韋元忠左驗陟惶惴賂吉溫求球由是俱得罪陟貶桂嶺尉坐不行徙平樂會安祿山陷洛陽弟斌沒賊國忠欲構陟與賊通密諭守吏令脅陟使憂死州豪傑共說曰昔張說被竄匿陳氏以免今若詔書下誰敢庇公願公乘扁舟遁去事寧乃出不亦美乎陟慨然曰命當爾其敢逃刑因謝遣堅臥不出歲餘肅宗卽位起爲吳郡太守使者趣追未至會永王兵起委陟招諭乃授御史大夫江東節度使與高適會

安州陟曰中原未平江淮騷離若不齊盟質信以示四方知吾等協心戮力則無以成功乃推瑣爲地主爲載書登壇曰淮西節度使瑒江東節度使陟淮南節度使適衡國威命糾合三垂翦除兇慝好惡同之毋有異志有渝此盟墜命亡族罔克生育皇天后土祖宗明神實鑒斯言辭旨慷慨士皆隕泣永王敗帝趣陟赴鳳翔初季廣琛從永王亂非其本謀陟表廣琛爲歷陽太守慰安之至是恐廣琛有後變乃馳往諭詔恩釋其疑而後趣召帝雅聞陟名欲倚以相及是遷延疑有顧望意止除御史大夫會杜甫論房瑄詞意迂慢帝令陟與崔光遠顏真卿按之陟奏甫言雖狂不失諫臣體帝繇是疏之富平人將軍王去榮殺其縣令帝將宥之陟曰昔漢高帝約法殺人者死今陛下殺人者生恐非所宜時朝廷尙新羣臣班殿中有相弔哭者帝以陟不任職用顏真卿代之更拜吏部尙書久之宗人伐墓相坐不相教貶絳州刺史還授太常卿呂繼入輔薦爲禮部尙書東宮留守史思明逼伊洛李光弼議守河陽陟率東京官屬入關避之詔授吏部尙書令就保永樂以圖收復卒年六十五贈荊州大都督陟早有名而爲林甫國忠擢廢及肅宗擇相自謂必得以後至不用任事者皆新進望風憚之多言其驕倨及入關又不許至京師鬱鬱不得志成疾且卒歎曰吾道窮於此乎性侈縱喜飾服馬侍兒鬪童列左右常數十俸於王宮主第窮治饑羞擇膏腴地藝穀麥以烏羽擇米每食視庖中所棄其直猶不減萬錢宴公侯家雖極水陸曾不下

筓常以五采牋爲書記使侍妾主之以裁答受意而已皆有楷法陟唯署名自謂所書陟字若五朶雲時人慕之號鄒公五雲體然家法脩整教子允就學夜分視之見其勤旦日問安色必怡稍怠則立堂下不與語雖家僮數十然應門賓客必允主之永泰元年贈尙書左僕射太常博士程皓議諡忠孝顏真卿以爲許國養親不兩立不當合一行爲諡主客員外郎歸崇敬亦駁正之右僕射郭英乂無學術卒用太常議云

斌父爲相時授太常通事舍人少脩整好文藝容止嚴峭有大臣體與陟齊名開元中薛王業以女妻之遷祕書丞天寶中爲中書舍人兼集賢院學士改太常少卿李林甫構韋堅獄斌以宗累貶巴陵太守移臨汝久之拜銀青光祿大夫列五品時陟守河東而從兄由爲右金吾衛將軍縉爲太子少師四第同時列戟衣冠罕比者祿山陷洛陽斌爲賊得署以黃門侍郎愛憤卒乾元元年贈祕書監斌天性質厚每朝會不敢離立笑言嘗大雪在廷者皆振裾更立斌不徙足雪甚幾至躓亦不失恭子況少隱王屋山孔述容稱之及述嘗以諫議大夫召薦況爲右拾遺不拜未幾以起居郎召半歲輒棄官去徙家龍門除司封員外郎稱疾固辭元和初授諫議大夫勉諭到職數月乞骸骨以太子左庶子致仕卒況雖世貴而志冲遠不爲聲利所遷當時重其風操

叔更安石兄通禮家學叔父太子詹事現嘗曰而能繼漢丞相業矣擢明經第歷太常博士高宗崩卹禮亡缺叔夏與中書舍人賈大隱博士裴守真議定其制擢春官員外郎武后拜洛享明堂凡所訟改皆叔夏祝欽明郭山憚等所裁討每立一議衆咨服之累遷成均司業后又詔五禮儀物司禮博士有所脩革須叔夏欽明等評處然後以聞進位春官侍郎中宗復位轉太常少卿爲建立廟社使進銀青光祿大夫累封沛郡公國子祭酒卒贈兗州都督脩文館學士諡曰文子綽

緡開元時歷集賢脩撰光祿卿遷太常唐典禮文雖具然制度時時繆缺不倫至顯慶中許敬宗建言籩豆以多爲貴宗廟乃踰于天請大祀十二中祀十小祀八大祀中祀籩簋瓚俎皆一小祀無瓚詔可二十三年赦令以籩豆之薦未能備物宜詔禮官學士共議以聞緡請宗廟籩豆皆加十二又言郊奠爵容止一合容小則陋宜增大之兵部侍郎張均職方郎中韋述議曰禮天之所生地之所長苟可薦者莫不成在聖人知孝子之情深而物類無限故爲之節使物有品器有數貴賤差降不得相越周制王食用六穀膳用六牲飲用六清羞用百有二十品珍用八物醬用百有二十饗而以四籩四豆供祭祀此祀與賓客豐省不得同舊矣且嗜好燕私之饌與時而遷故聖人一約以禮雖平生所嗜非禮則不薦所惡是禮則不去屈建命去祥祭之芟曰祭典有之不羞珍異不陳庶侈此則禮外之食前古不薦今欲以甘旨肥濃

皆充於祭苟踰舊制其何極焉雖籩豆有加不能備也若曰以今之珍生所嗜愛求神無乃是簠簋可去而盤盂栝案當御矣韶濩可抵而箜篌笙笛應奏矣且自漢以來陵有寢宮歲時朔望薦以常饌固可盡孝子之心至宗廟法享不可變古從俗有司所承一升爵五升散禮凡宗廟貴者以爵賤者以散此貴小賤大以示節儉請如故太子賓客崔沔曰古者有所飲食必先嚴獻未化火則有毛血之薦未麴蘖則有玄酒之奠至後王作酒醴用犧牲故有三牲八簋五齊九獻然神尚玄可存而不可測也祭主敬可備而不可廢也蓋薦貴新味不尚褻雖曰備物猶有節制存焉錡俎籩豆簠簋尊彝周人時饌也其用通於燕享賓客周公乃與毛血玄酒共薦晉中郎盧諶家祭皆晉日食則當時之食不可闕於祀已唐家清廟時享禮饌備進周法也園寢上食時膳具陳漢法也職貢助祭致遠物也有新必薦順時令也苑囿躬稼所入蒐田親發所中皆因宜以薦薦而後食則濃腴鮮美盡在矣又敕有司著于令不必加籩豆之數也大凡祭器視物所宜故大羹古饌也盛以甗甗古器也和羹時饌也盛以錡錡時器也有古器而用時器者則毛血于盤玄酒于尊未有進時饌用古器者古質而今文有所不稱也雖加籩豆十二未足盡天下之美而措諸廟徒以近侈而見訾抵臣聞墨家者流出於清廟是廟貴儉不尚奢也禮部員外郎楊仲昌戶部郎中楊伯成左衛兵曹參軍劉秩等請如舊便宰相白奏玄宗曰朕承祖宗休德享祀粢盛實貴豐潔

有如不應於法亦不敢用乃詔太常擇品味可增者稍加焉縉又請室加籩豆各六每四時以新果珍饗
寶之制可又詔獻爵視藥升所容以合古二十三年詔書服紀所未通者令禮官學士詳議縉上言禮喪
服舅總麻三月從母小功五月傳曰何以小功以名加也而堂姨舅母恩所不及焉外祖父母小功五月
傳曰何以小功以尊加也舅總麻三月皆情親而屬疏也外祖正尊服同從母姨舅一等而有輕重堂姨
舅親未疏不相爲服親舅母不如同爨其亦古意有所未暢且外祖小功此爲正尊請進至大功姨舅儕
親服宜等請進舅至小功堂姨舅以疏降親舅從母一等親舅母古未有服請從祖免於是韋述議曰自
高祖至玄孫并身謂之九族由近及遠差其輕重遂爲五服傳曰外親服皆總鄭玄曰外親之服異姓正
服不過總外祖父母小功以尊加從母小功以名加舅甥外孫中外昆弟皆總以匹言之外祖則祖也舅
則伯叔也父母之恩不殊而獨殺於外者有以也禽獸知母而不知父野人則父母等都邑之士則知尊
禰大夫則知尊祖諸侯及太祖天子及始祖聖人究天道厚祖禰繫姓族親子孫則母黨之於本族不同
明甚家無二尊喪無二斬人之所奉不可二也爲人後降其父母喪女子嫁殺其家之喪所存者違抑者
私也若外祖及舅加一等而堂舅及姨著服則中外其別幾何且五服有上殺之義伯叔父母服大功從
父昆弟亦大功以其出於祖服不得過於祖也從祖祖父母從祖父母從祖昆弟皆小功以其出於曾祖

服不得過曾祖也族祖祖父母族祖父母族昆弟皆總以其出於高祖服不得過高祖也堂姨舅出外曾
祖若爲之服則外曾祖父母外伯叔祖父母亦可制服矣外祖至大功則外曾祖小功外高祖總推而廣
之與本族無異棄親錄疏不可謂順且服皆有報則堂甥外曾孫姪女之子皆當服聖人豈薄其骨肉恩
愛哉蓋本於公者未於私議有所斷不得不然苟可加也則可減也如是禮可噉矣請如古便楊仲昌又
言舅服小功魏徵嘗進之矣今之所請正同徵論堂舅堂姨舅母皆升祖免則外祖父母進至大功不加
報於外孫乎外孫而報以大功則本宗之庶孫用何等邪帝手敕曰議既爲姨舅服小功則舅母於舅有
三年之喪不得全降於舅宜服總堂姨舅古未有服朕思睦厚九族宜祖免古有同爨總若比堂姨舅於
同爨不已厚乎傳曰外親服皆總是亦不隔堂姨舅也若謂所服不得過本而復爲外曾祖父母外伯叔
父母制服亦何傷皆親親敦本意也侍中裴耀卿中書令張九齡禮部尙書李林甫奏言外服無降甥爲
舅母服舅母亦報之夫之甥既報則夫之姨舅又當服恐所引益疏臣等愚皆所不及詔曰從服六此其
一也降殺於禮無文皆自身率親爲之數姨舅屬近以親言之亦姑伯之匹可曰所引疏耶婦人從夫者
也夫於姨舅既服矣從夫而服是謂睦親卿等宜熟計耀卿等奏言舅母總堂姨舅祖免請準制自我
爲古罷諸儒儀制曰可初帝詔歲率公卿迎氣東郊至三時常以孟月讀時令於正寢二十六年詔縉奏

月令一篇朔日於宣政側設榻東向置案緡坐讀之諸司官長悉升殿坐聽餘罷高宗上元三年將禘享議者以禮緯三年禘五年禘公羊家五年再殷祭二家外互諸儒莫能決太學博士史玄議曰春秋僖公三十三年十二月薨文公之二年八月丁卯大亨公羊曰禘也則三年喪畢新君之二年當禘明年當禘羣廟又宣公八年禘僖公宣公八年皆有禘則後禘距前禘五年此則新君之二年禘三年禘爾後五年再殷祭則六年當禘八年禘昭公十年齊歸薨十三年喪畢當禘為平丘之會冬公如晉至十四年禘十五年禘傳曰有事於武宮是也至十八年禘二十年禘二十三年禘二十五年禘昭公二十五年有事於襄宮是也則禘後三年而禘又二年而禘合於禮議遂定後睿宗喪畢禘於廟至開元二十七年禘祭五禘祭七是歲緡奏四月嘗已禘孟冬又禘祀禮叢數請以夏禘為大祭之源自是相循五年再祭矣緡終太子少師

抗者安石從父兄子弱冠舉明經累官吏部郎中景雲初為永昌令輦轂繫要抗不事威刑而治前令無及者遷右御史臺中丞邑民詣闕留不聽乃立碑著其惠開元三年自太子左庶子為益州大都督府長史授黃門侍郎河曲胡康待賓叛詔持節慰撫抗於武略非所長稱疾逗留不及賊而返俄代王峻為御史大夫兼按察京畿弟拯方為萬年令兄弟領本部時以為榮坐薦御史非其人授安州都督改蒲州刺

一一號第一百十四批

史入為大理卿進刑部尚書分掌吏部選卒抗歷職以清儉不治產及終無以葬玄宗聞之特給轎車贈太子少傅諡曰貞所表奉天尉梁昇卿新豐尉王倕華原尉王燾為僚屬後皆為顯人昇卿涉學工書於八分尤工歷廣州都督書東封朝觀碑為時絕筆倕累遷河西節度使天寶中功聞于邊宅所辟舉如王繙崔殷等皆一時選云

郭震字元振魏州貴鄉人以字顯長七尺美鬚髯少有大志十六與薛稷趙彥昭同為太學生家嘗送資錢四十萬會有緣服者叩門自言五世未葬願假以治喪元振舉與之無少吝一不質名氏稷等嘆駭十八舉進士為通泉尉任俠使氣撥去小節嘗盜鑄及掠賣部中口千餘以餉遺賓客百姓厭苦武后知所為召欲詰既與語奇之索所為文章上寶劍篇后覽嘉歎詔示學士李嶠等即授右武衛鎧曹參軍進奉宸監丞會吐蕃乞和其大將論欽陵請罷四鎮兵拔十姓之地乃以元振充使因覘虜情還上疏曰利或生害害亦生利國家所患唯吐蕃與默啜耳今皆和附是將大利於中國也若圖之不審害且隨之欽陵欲裂十姓地解四鎮兵此動靜之機不可輕也若直遏其意恐邊患必甚於前宜以策緩之使其和望勿絕而惡不得萌因當取捨審也夫患在外者十姓四鎮是也患在內者甘涼瓜肅是也關隴屯戍向三十年力用困竭脫甘涼有一日警豈堪廣調發耶善為國者先料內以敵外不貪外以害內然後安平可保

欽陵以四鎮近已畏我侵掠此吐蕃之要然青海吐渾密邈爾部易爲我患亦國家之要今宜報欽陵曰四鎮本扼諸蕃走集以分其力使不得併兵東侵今委之則蕃力益彊易以擾動保後無東意當以吐渾諸部青海故地歸於我則俟斤部落還吐蕃矣此足杜欽陵口而和議未絕且四鎮久附其倚國之心豈與吐蕃等今未知利害情實而分裂之恐傷諸國意非制御之算后從之又言吐蕃僭徭戍久矣咸願解和以欽陵欲裂四鎮專制其國故未歸款陛下誠能歲發和親使而欽陵常不從則其下必怨設欲大舉固不能斯離間之漸也后然其計後數年吐蕃君臣相猜揣卒誅欽陵而其弟贊婆等來降因詔元振與河源軍大使夫蒙令卿率騎往迎授主客郎中久之突厥吐蕃聯兵寇涼州后方御洛城門宴邊遽至因輟樂拜元振爲涼州都督卽遣之初州境輪廣纔四百里虜來必傳城下元振始於南破口置和戎城北磧置白亭軍制東要路遂拓境千五百里自是州無虜憂又遣甘州刺史李漢通關屯田盡水陸之利稻收豐衍舊涼州粟斛售數千至是歲數登至匹繡易數十斛支廩十年牛羊被野治涼五歲善撫御夷夏畏慕令行禁止道不舉遺河西諸郡置生祠揭碑頌德神龍中遷左驍衛將軍安西大都護西突厥酋烏質勒部落盛疆款塞願和元振卽牙帳與計事會大雨雪元振立不動至夕凍冽烏質勒已老數拜伏不勝寒會罷卽死其子娑葛以元振計殺其父謀勒兵襲擊副使解琬知之勸元振夜遁元振不聽堅臥營

爲不疑者明日素服往弔道逢娑葛兵虜不意元振來遂不敢逼揚言迎衛進至其帳修弔贈禮哭甚哀爲留數十日助喪事娑葛感義更遣使獻馬五千駝二百牛羊十餘萬制詔元振爲金山道行軍大總管烏質勒之將闕噉忠節與娑葛交怨屢相侵而闕噉兵弱不支元振奏請追闕噉入宿衛徙部落置瓜沙間詔許之闕噉遂行至播仙城遇經略使周以悌以悌說之曰國家厚秩待君以部落有兵故也今獨行入朝一驕旅胡人耳何以自全乃教以重寶賂宰相無入朝請發安西兵導吐蕃以擊娑葛求阿史那獻爲可汗以招十姓請郭虔瓘使拔汗那蒐其鎧馬以助軍旣得復讐部落更存闕噉然之卽勒兵擊于闐坎城下之因所獲遣人間道齎黃金分遺宗楚客紀處訥使就其謀元振知之上疏曰國家往不與吐蕃十姓四鎮而不擾邊者蓋其諸豪泥婆羅等屬國自有攜貳故贊普南征身殞寇庭國中大亂嫡庶競立將相爭權自相翳屠士畜疲瘠財力困窮顧人事天時兩不諧契所以屈志於漢非實忘十姓四鎮也如其有力後且必爭今忠節忽國家大計欲爲吐蕃鄉導主人四鎮危機恐從此啟吐蕃得志忠節亦當在賊掌股若爲復得事我往吐蕃於國無有恩力猶欲爭十姓四鎮今若効力樹恩則請分子闕疏勒者欲何理抑之且其國諸蠻及婆羅門方自嫌阻藉令求我助討者亦何以拒之是以古之賢人不願夷狄妄惠非不欲其力懼後求無厭益生中國事也臣愚以爲用吐蕃之力不見其使又請阿史那獻者豈非以

可汗子孫能招綏十姓乎且斛瑟羅及懷道與獻父元慶叔僕羅兄倭子俱可汗子孫也往四鎮以他
十姓之亂請元慶爲可汗卒亦不能招來而元慶沒賊四鎮淪陷忠節亦嘗請以斛瑟羅及懷道爲可汗
矣十姓未附而碎葉幾危又吐蕃亦嘗以倭子僕羅并拔布爲可汗矣亦不能得十姓而皆自亡滅此非
宅其子孫無惠下之才恩義素絕故也豈止不能招懷且復爲四鎮患則册可汗子孫其効固試矣獻父
遭於其父兄人心何繇即附若兵力足取十姓不必要須可汗子孫也又請以郭虔瓘蒐兵稅馬於拔汗
那往虔瓘已嘗與忠節擅入其國臣時在疏勒不聞得一甲一馬而拔汗那挾忿侵擾南導吐蕃將倭子
以擾四鎮且虔瓘往至拔汗那國四面無助若履虛邑猶引倭子爲蔽況今北有契葛知虔瓘之西必引
以相援拔汗那倚堅城而抗于內突厥邀伺于外虔瓘等豈能復如往年得安易之幸哉疏奏不省楚客
等因建遣攝御史中丞馮嘉賓持節安撫闕噉以御史呂守素處置四鎮以牛師獎爲安西副都護代元
振領甘涼兵召吐蕃併力擊契葛契葛之使娑臚知楚客謀馳報之契葛怒即發兵出安西接換焉耆疏
勒各五千騎於是闕噉在計舒河與嘉賓會契葛兵奄至闕噉殺嘉賓又殺呂守素於僻城牛師獎於
火燒城遂陷安西四鎮路絕元振屯疏勒水上未敢動楚客復表周以悌代元振且以阿史那獻爲十姓
可汗置軍焉耆以取契葛契葛遣元振書且言無仇于唐而楚客等受闕噉金欲加兵擊滅我故懼死而

闕且請斬楚客元振奏其狀楚客大怒誣元振有異圖召將罪之元振使子鴻聞道奏乞留定西土不敢
歸京師以悌乃得罪流白州而赦契葛容宗立召爲太僕卿將行安西酋長有務面哭送者旌節下玉門
關去涼州猶八百里城中爭具壺漿歡迎都督嗟歎以聞景雲二年進同中書門下三品遷吏部尚書封
館陶縣男先天元年爲朔方軍大總管築豐安定遠城兵得保頓明年以兵部尚書復同中書門下三品
玄宗誅太平公主也睿宗御承天門諸宰相走伏外省獨元振總兵扈帝事定宿中書者十四昔乃休進
封代國公實封四百戶賜一子官物千段俄又兼御史大夫復爲朔方大總管以備突厥未行會玄宗講
武驪山既三令帝親鼓之元振遠奏禮止帝怒軍容不整引坐纛下將斬之劉幽求張說扣馬諫曰元振
有大功雖得罪當宥乃赦死流新州開元元年帝思舊功起爲饒州司馬怏怏不得志道病卒年五十八
十年贈太子少保元振雖少雄邁及貴居處乃儉約手不置書人莫見其喜愠建宅宣陽里未嘗一至諸
院廡自朝還對親欣欣退就室儼如也距國初仕至宰相而親具者唯元振云
贊曰魏章皆感槩而奮似矣及在昏上側臣間臨機會不一引手堪姦邪之謀誠可鄙哉至龔后豔王以
丞譖臧宗社亦不肯從也古所謂具臣者諒乎元振功顯節完一跌未復世恨其蚤歿云

唐書卷一百二十二

唐書卷一百二十二考證

魏元忠傳容宗詔陪葬定陵以實封一百五十戶賜其子晃○舊書作實封一百戶

唐書卷一百二十二考證

唐書卷一百二十三

宋 端 明 殿 學 士 宋 祁 撰

列傳第四十八

李蕭盧韋趙和

孝嶠字巨山趙州贊皇人早孤事母孝為兒時夢人遺雙筆自是有文辭十五通五經薛元超稱之二十擢進士第始調安定尉舉制策甲科遷長安時畿尉名文章者駱賓王劉光業嶠最少與等夷授監察御史高宗擊豳巖二州叛獠詔監其軍嶠入洞喻降之由是罷兵稍遷給事中會來俊臣搆狄仁傑李嗣真裴宣禮等獄將抵死敕嶠與大理少卿張德裕侍御史劉憲覆驗德裕等內知其寃不敢異嶠曰知其枉不申是謂見義不為者卒與二人列其枉忤武后旨出為潤州司馬久乃召為鳳閣舍人文冊大號令多主為之初置右御史臺察州縣吏善惡風俗得失嶠上疏曰禁網上疏法象宜簡簡則法易行而不煩雜疏則所羅廣而不苛碎伏見垂拱時諸道巡察使科條四十有四至別敕令又三十而使以三月出盡十一月奏事每道所察更多者二千少亦千計要在品覈才行而褒貶之今期會迫促奔逐不暇欲望詳究所能不亦難哉此非隳於職才有限力不逮耳臣願量其功程以為節制使器周於用力濟於時然後得

失可以精覈矣又言今所察按準漢六條而推廣之則無不包矣烏在多張事目也且朝廷萬幾非無事而幾事之動常在四方故出使者冠蓋相望今已置使則外州之事悉得專之傳驛減矣請率十州置一御史以葦歲爲之限容其身到屬縣過閭里督察姦訛采訪風俗然後可課其成功且御史出入天禁勵己自修比他吏相百也按劾回庸糾適隱欺比他吏相十也陛下誠用臣言妙擇能者委之莫不盡力効死矣武后善之下制析天下爲二十道擇堪使者爲衆議沮止俄知天官侍郎事進麟臺少監同鳳閣鸞臺平章事遷鸞臺侍郎會張錫輔政嶠其出也罷爲成均祭酒俄檢校文昌左丞留守東都長安三年以本官復爲平章事知納言遷內史嶠辭劇復爲成均祭酒平章事武后將建大像於白司馬坂嶠諫造像雖俾浮屠輸錢然非州縣承辦不能濟是名雖不稅而實稅之臣計天下編戶貧弱者衆有賣舍帖田供王役者今造像錢積十七萬緡若頒之窮人家給千錢則紓十七萬戶飢寒之苦德无窮矣不納張易之敗坐附會貶豫州刺史未行改通州數月以吏部侍郎召俄遷尙書神龍二年代韋安石爲中書令嶠在吏部時陰欲藉時望復宰相乃奏置員外官數千既吏衆猥府庫虛耗乃上書歸咎于時因蓋向非曰元首之尊居有重門擊柝之衛出有清警戒道之禁所以備非常息異望誠不可易舉動慢防閑也陛下厭崇尊輕尊嚴微服潛遊閱歷過市行路私議朝廷驚懼如禍產意外縱不自惜奈宗廟蒼生何又分職建

官不可以濫傳曰官不必備惟其人自帝室中興以不慎爵賞爲惠冒級躐階朝陞夕改正闕不給加以員外內則府庫爲殫外則黎庶蒙害非求賢助治之道也願愛委班榮息匪服之議今文武六十以上而天造含容皆矜恤之老病者已解還授員外者既遣復留恐非所以消敝救時也請敕有司料其可用進不可用退又遠力夷人不堪治事國家向務撫納而官之非立功會長類糜俸祿願商度非要者一切放還又易稱何以守位曰仁何以聚人曰財今百姓之寔不安居處不可以守位倉儲蕩耗財力傾殫不足以聚人山東病水潦江左困輸轉國匱於上人窮於下如今邊場少疎恐逋亡遂多盜賊羣行何財召募何衆閑過乎又崇作寺觀功費浩廣今山東歲饑糲糠不厭而投艱阨之會收庸調之半用吁嗟之物以榮土木恐怨結三靈謗蒙四海又比緣征戍巧詐百情破役隱身規脫租賦今道人私度者幾數十萬其中高戶多丁黠商大賈詭作臺符驛名僞度且國計軍防並仰丁口今丁皆出家兵悉入道征行租賦何以備之又重賂貴近補府若史移沒籍產以州縣甲等更爲下戶當道城鎮至無捉驛者役逮小弱卽破其家願許十道使訪察括舉使姦猾不得而隱又太常樂戶已多復求訪散樂獨持鼗鼓者已二萬員願量留之餘勒還籍以杜妄費中宗以其身宰相乃自陳失政乞罷官無所嫁非手詔請讓嶠惶恐復視事三年加修文館大學士封趙國公以特進同中書門下三品睿宗立罷政事下除懷州刺史致仕初中宗

崩嶠嘗密請相王諸子不宜留京師及玄宗嗣位獲其表宮中或請誅之張說曰嶠誠悖逆順然爲當時謀賊非其主不可追罪天子亦顧數更赦遂免貶滁州別駕聽隨子虔州刺史暢之官改廬州別駕卒年七十嶠官才思有所屬綴人多傳諷武后時汜水獲瑞石嶠爲御史上皇符一篇爲世譏薄然其仕前與王勃楊盈川接中與崔融蘇味道齊名晚諸人沒而爲文章宿老一時學者取法焉

蕭至忠沂州承人祖德言爲祕書少監至忠少與友期諸路會雨雪人引避至忠曰寧有與人期可以失信卒友至乃去衆歎服仕爲伊闕洛陽尉遷監察御史劾奏鳳閣侍郎蘇味道贓貪超拜吏部員外郎至長擊斷譽聞當時中宗神龍初爲御史中丞始至忠爲御史而李承嘉爲大夫嘗讓諸御史曰彈事有不咨大夫可乎衆不敢對至忠獨曰故事臺無長官御史天子耳目也其所請奏當專達若大夫許而後論卽劾大夫者又誰白哉承嘉慙至是承嘉爲戶部尙書至忠劾祝欽明竇希玠與承嘉等罪百寮震悚遷吏部侍郎猶兼中丞節愍太子以兵誅武三思而敗宗楚客等諡侍御史冉祖雍上變言相王與太子謀帝欲按之至忠泣曰往者天后欲以相王爲太子而王不食累日獨請迎陛下其讓德天下莫不聞陛下貴爲天子不能容一弟受人羅織耶竊爲陛下不取帝納其言止尋授中書侍郎同中書門下平章事上疏陳時政曰求治之道首于用賢苟非其才則官曠官曠則事廢事廢則人殘歷代所以陵遲者此也

今授職用人多因貴要爲粉飾上下相蒙苟得爲是夫官爵公器也恩俸私惠也王者正可金帛富之梁肉食之以存私澤也若公器而私用之則公義不行而勞人解體私謁開而正言塞日朘月削卒見凋弊今列位已廣冗員復倍陛下降不賞之澤近戚有無涯之請臺閣之內朱紫充滿官秩益輕恩賞彌數才者不用者不才故人不効力官匪其人欲求治固難矣又宰相要官子弟多居美爵並罕才藝而更相諉託詩云私人之子百寮是試或以其酒不以其漿朝朝佩璫不以其長此言王政不平而衆官廢職私家子列詩榮班徒長其佩爾臣願陛下愛惜爵賞官無虛授進大雅以樞近退小人於閑左使政令惟一私不害公則天下幸甚且貞觀故事宰相子弟多居外職非直抑疆宗亦以擇賢才爾請自宰相及諸司長官子弟並授外官共寧百姓表裏相統帝不納俄爲侍中中書令時楚客懷姦植黨而韋巨源楊再思李嶠務自安無所弼正至忠介其間獨不詭隨時望翕然歸重帝亦曰宰相中至忠最憐我韋后嘗爲其弟洵與至忠甥女冥婚至忠又以女妻后舅崔從禮子無詖兩家合禮帝主蕭后主崔時謂天子嫁女皇后娶婦唐隆元年后黨應坐而太平公主爲言出爲晉州刺史治有名默啜遣大臣來朝見至忠風采遠巡畏俯謂人曰是宜相天子何乃居外乎太平濩用事至忠乃自附納且丐還主以至忠子任千牛死韋氏難意怨望易動能助已請于帝拜刑部尙書復爲中書令封鄴國公乃參主逆謀先天二年主敗至

忠遁入南山數日捕誅之籍其家至忠始在朝有風望容止閑敏見推爲名臣外方直糾適不法而內無守觀時輕重而去就之始爲御史桓彥範等頗引重五王失敬更因武三思得中丞附安樂公主爲宰相及韋氏敗遽發韋洵壘持其女柩歸後依太平復當國嘗出主第遇宋璟環戲曰非所望於蕭傅至忠曰善乎宋生之言然不能自返也娣嫁蔣欽緒欽緒每戒之至忠不聽歎曰九世卿族一舉而滅之可哀也已不喜接賓客以簡儉自高故生平奉賜無所遺施及籍沒珍寶不可計然玄宗賢其爲人後得源乾曜亟用之謂高力士曰若知吾進乾曜遽乎吾以其貌言似蕭至忠力士曰彼不嘗負陛下乎帝曰至忠誠國器但晚謬爾其始不謂之賢哉弟元嘉工部侍郎廣微工部員外郎

贊曰異哉玄宗之器蕭至忠也不亦惑乎至忠本非賢而寄賢以奸利失之則邀利以喪賢姻嬖后挾寵主取宰相謀間王室身誅家破遺臭無窮而帝以乾曜似之遽使當國是帝舉不知至忠之不可用又不知乾曜之所可用也或稱帝不以罪掩才益可怪嘆嗚呼力士誠腐夫庸人不能發適天子之迷若曰至忠賢於初固不繆於末既繆於末果不賢於初惟陛下圖之如是帝且悟往失而精來鑒已其復相李林甫將安祿山皆基于不明身播岷岷信自取之歟

盧藏用字子潛幽州范陽人父瓌魏州長史號才吏藏用能屬文舉進士不得調與兄微明偕隱終南少

室二山學鍊氣爲辟穀登衡廬衍洋岷峨與陳子昂趙貞固友嘗長安中召授左拾遺武后作興泰宮於萬安山上疏諫曰陛下離宮別觀固多矣又窮人力以事土木臣恐議者以陛下爲不愛人而奉己也且頃歲穀雖頗登而百姓未有儲陛下巡幸訖靡休息斤斧之役歲月不空不因此時施德布化而又廣宮苑臣恐下未易堪今左右近臣以諛意爲忠犯忤爲患至令陛下不知百姓失業百姓亦不知左右傷陛下之仁也忠臣不避誅震以納君於仁明主不惡切諫以趨名于後陛下誠能發明制以勞人爲辭則天下必以爲愛力而苦己也不然下臣此章得與執事者共議不從姚元崇持節靈武道奏爲管記還應縣令舉甲科爲濟陽令神龍中累擢中書舍人數糾駁僞官歷吏部黃門侍郎修文館學士坐親累降工部侍郎進尚書右丞附太平公主誅玄宗欲捕斬藏用顧未執政意解乃流新州或告謀反推無狀流驩州會交趾叛藏用有捍禦勞改昭州司戶參軍遷黔州長史判都督事卒于始興藏用善著龜九宮術工草隸大小篆八分善琴弈思精遠士貴其多能嘗以俗狃陰陽拘畏乖至理泥變通有國者所不宜專謂天道從人者也古爲政者刑獄不濫則人壽賦斂省則人富法令有常則邦寧賞罰中則兵彊禮者士所歸賞者士所死禮賞不倦則士爭先否者雖揆時行罰涓日出號無成功矣故任賢使能不時日而利明法審令不卜筮而吉養勞貴功不禱祠而福乃爲折滯論以暢其方世謂知言子昂貞固前死藏用撫其

孤有恩人稱能終始交始隱山中時有意當世人目為隨駕隱士晚乃徇權利務為驕縱素節盡矣司馬承禎嘗召至闕下將還山藏用指終南曰此中大有嘉處承禎徐曰以僕視之仕宦之捷徑耳藏用默無子弟若虛多才博物隴西辛怡諫為職方有獲異鼠者豹首虎臆大如拳怡諫謂之鼯鼠而賦之若虛曰非也此許慎所謂鼯鼠豹文而形小一坐驚服終起居郎集賢院學士

韋巨源與安石同系後周京兆尹總曾孫祖貞伯襲鄆國公入隋改舒國巨源有吏幹武后時累遷夏官侍郎同鳳閣鸞臺平章事其治委碎無大體旬校省中遺隱下符斂克不少蠲雖收其利然下所怨苦坐李昭德累貶麟州刺史累拜地官尚書神龍初以吏部尚書同中書門下二品時要官缺執政以次用其親巨源秉筆當除十人楊再思得其一試問餘授皆諸宰相近屬再思喟然曰吾等誠負天下巨源曰時當爾耳是時雖賢有德終莫得進士大夫莫不解體會安石為中書令避親罷政事尋遷侍中舒國公韋后與敘昆弟附屬籍三思封戶在貝州屬大水刺史宋璟議免其租巨源以為蠶桑可輸絲是河朔人多流徙者景龍二年韋后自言衣笥有五色雲巨源倡其偽勸中宗宣布天下帝從其言因是大赦巨源見帝昏惑乃與宗楚客鄭愔趙延禧等推處祥妖陰導韋氏行武后故事俄遷尚書左僕射仍知政事帝方南郊巨源請后為亞獻而自為終獻及臨淄王平諸韋家人請避之巨源曰吾大臣無容見難不赴出都

街亂兵殺之年八十睿宗立贈特進荊州大都督博士李處直請諡為昭戶部員外郎李崑以巨源附武三思為相託韋后親屬諡昭為非處直執不改豈列陳其惡不見用然世皆直豈韋氏自安石及武后時宰相待價巨源皆近親其族至大官者又數十人

趙彥昭字奐然甘州張掖人父武孟少游獵以所獲饋其母母泣曰汝不好書而敖蕩吾安望哉不為食武孟感激遂力學淹該書記自長安丞為右臺侍御史著河西人物志十篇彥昭少豪邁風骨秀爽及進士第調為南部尉與郭元振薛稷蕭至忠善自新豐丞為左臺監察御史景龍中累遷中書侍郎同中書門下平章事金城公主嫁吐蕃始以紀處訥為使處訥辭乃授彥昭彥昭顧已處外恐權寵奪移不悅司農卿趙履溫曰公天宰而為一介使不亦鄙乎彥昭問計安出履溫乃為請安樂公主留之遂以將軍楊矩代睿宗立出為宋州刺史坐累貶歸州俄授涼州都督為政嚴下皆股慄入為吏部侍郎持節按邊遷御史大夫蕭至忠等誅郭元振張說言彥昭與祕謀改刑部尚書封耿國公實封百戶彥昭本以權幸進中宗時有巫趙挾鬼道出入禁掖彥昭以姑事之嘗衣婦服乘車與妻偕謁其得宰相巫力也於是殿中侍御史郭震劾暴醜惡會姚宗執政惡其人貶江州別駕卒

和逢堯岐州岐山人武后時貢鼎詣闕下上書自言願助天子和任百度有司讓曰昔桀不道伊尹負鼎

于湯今天子聖明百司以和尚何所謂逢堯不能答流莊州十餘年乃舉進士高第累擢監察御史突厥
默啜請尚公主逢堯以御史中丞攝鴻臚卿報可默啜遣貴近頡利來曰詔送金鏤具鞍乃塗金非天子
意使者不可信雖得公主猶非實請罷和親欲馳去左右色動逢堯呼曰我大國使不受我辭可輒去乃
牽持其人謂曰漢法重女婿而送鞍具欲安且久不以金爲貴可汗乃貪金而不貴信邪默啜聞曰漢使
至吾國衆矣斯食鐵石人不可易因備禮以見逢堯說之曰天子昔爲單于都護思與可汗通舊好可汗
尚嚮風慕義襲冠冕取重諸蕃默啜信之爲斂髮紫衣南面再拜稱臣遣子入朝逢堯以使有指擢戶部
侍郎坐善太平公主斥朗州司馬終柘州刺史逢堯詭當大事敢徼福故卒以附麗廢然唐興奉使者
稱逢堯

唐書卷一百二十三

唐書卷一百二十三考證

蕭至忠傳祖德言○舊書作德言曾孫

尋授中書侍郎○舊書作轉黃門侍郎

盧藏用傳父璠魏州長史○舊書官至魏州司馬

韋巨源傳祖貞伯○舊書祖名匡伯

趙彥昭傳睿宗立出爲宋州刺史坐累貶歸州俄授涼州都督○舊書先爲涼州都督後爲宋州刺史

唐書卷一百二十三考證

唐書卷一百二十四

宋 端 明 殿 學 士 宋 祁 撰

列傳第四十九

姚宋

姚崇字元之陝州硤石人父懿字善懿貞觀中為潯州都督贈幽州大都督諡文獻崇少倜儻尚氣節長
 乃好學仕為孝敬挽郎舉下筆成章授濮州司倉參軍五遷夏官郎中契丹擾河北兵檄叢進崇奏決若
 流武后賢之即拜侍郎后嘗語左右往周興來俊臣等數治詔獄朝臣相逮引一切承反朕意其枉更界
 近臣臨問皆得其手牒不寃朕無所疑即可其奏自俊臣等誅遂無反者然則向論死得無寃邪崇曰自
 垂拱後被告者類自誣當是時以告言為功故天下號曰羅織甚於漢之鉤黨雖陛下使近臣覆訊彼尚
 不自保敢一搖手以悖酷吏意哉且被問不承則重罹其慘如張虔勗李安靜等皆是也今賴天之靈發
 寤陛下凶豎殲夷朝廷又安臣以一門百口保內外官無復反者陛下以告牒置弗推後若反有端臣請
 坐知而不告后悅曰前宰相務順可陷我為淫刑主聞公之言乃得朕心賜銀千兩聖曆三年進同鳳閣
 鸞臺平章事遷鳳閣侍郎俄兼相王府長史以母老納政歸侍乃詔以相王府長史侍疾月餘復兼夏官

乾隆四年校刊

唐書卷一百二十四列傳

尙書同鳳閣鸞臺三品崇建言臣事相王而夏官本兵臣非惜死恐不益王乃詔改春官張易之私有請於崇崇不納易之譖於后降司僕卿猶同鳳閣鸞臺三品出爲靈武道大總管張東之等謀誅二張崇適自屯所還遂參計議以功封梁縣侯實封二百戶后遷上陽宮中宗率百官起居王公更相慶崇獨流涕東之等曰今豈涕泣時邪恐公禍由此始崇曰比與討逆不足以語功然事天后久違舊主而泣人臣終節也由此獲罪甘心焉俄爲亳州刺史後五王被害而崇獨免歷宋常越許四州睿宗立拜兵部尙書同中書門下三品進中書令玄宗在東宮太平公主干政宋王成器等分典閑廐禁兵崇與宋璟建請主就東都出諸王爲刺史以壹人心帝以謂主主怒太子懼上疏以崇等忤間王室請加罪貶爲申州刺史移徐潞二州遷揚州長史政條簡肅人爲紀德于碑徙同州刺史先天二年玄宗講武新豐故事天子行幸牧守在三百里者得詣行在時帝亦密召崇崇至帝方獵渭濱即召見帝曰公知獵乎對曰少所習也臣年二十居廣成澤以呼鷹逐獸爲樂張憬藏謂臣當位王佐無自棄故折節讀書遂待罪將相然少爲獵師老而猶能帝悅與俱馳逐緩速如旨帝歡甚既罷乃咨天下事衰衰不知倦帝曰卿宜遂相朕崇知帝大度銳于治乃先設事以堅帝意即陽不謝帝怪之崇因跪奏臣願以十事聞陛下度不可行臣敢辭帝曰試爲朕言之崇曰垂拱以來以峻法繩下臣願政先仁恕可乎朝廷覆師青海未有奉復之悔臣願不

俾邊功可乎比來壬倭冒觸憲網皆得以寵自解臣願法行自近可乎后氏臨朝喉舌之任出闕人之口臣願宜豈不與政可乎戚里貢獻以自媚于上公卿方鎮濫亦爲之臣願租賦外一絕之可乎外戚貴主更相用事班序荒雜臣請戚屬不任臺省可乎先朝褻狎大臣虧君臣之嚴臣願陛下接之以禮可乎燕飲融章月將以忠被罪自是諍臣沮折臣願羣臣皆得批逆鱗犯忌諱可乎武后造福先寺上皇造金仙玉真二觀費鉅百萬臣請絕道佛營造可乎漢以祿莽閻梁亂天下國家爲甚臣願推此鑒戒爲萬代法可乎帝曰朕能行之崇乃頓首謝翌日拜兵部尙書同中書門下三品封梁國公遷紫微令固辭實封乃停舊食賜新封百戶中宗時近戚奏度僧尼温戶疆丁因避賦役至是崇建言佛不在外悟之于心行事利益使蒼生安穩是謂佛理烏用姦人以汨真教帝善之詔天下汰僧僞濫髮而農者餘萬二千人崇嘗於帝前序次郎吏帝左右顧不主其語崇懼再三言之卒不答崇趨出內侍高力士曰陛下新即位宜與大臣裁可否今崇亟言陛下不應非虛懷納誨者帝曰我任崇以政大事吾當與決至用郎吏崇顧不能而重煩我邪崇聞乃安由是進賢退不肖而天下治開元四年山東大蝗民祭且拜坐視食苗不敢捕崇奏詩云秉彼蠹賊付昇炎火漢光武詔曰勉順時政勸督農桑去彼螟蟻以及蠹賊此除蝗誼也且蝗畏人易驅又田皆有主使自救其地必不憚勤請夜設火坎其旁且焚且瘞乃可盡古有討除不勝者特人

不用命耳乃出御史爲捕蝗使分道殺蝗汴州刺史倪若水上言除天災者當以德昔劉聰除蝗不克而害愈甚拒御史不應命崇移書謂之曰聰僞主德不勝祇今祇不勝德古者良守蝗避其境謂修德可免彼將無德致然乎今坐視食苗忍而不救因以無年刺史其謂何若水懼乃縱捕得蝗十四萬石時議者喧譁帝疑復以問崇對曰庸儒泥文不知變事固有違經而合道反道而適權者昔魏世山東蝗小忍不除至人相食後奏有蝗草木皆盡牛馬至相噉毛今飛蝗所在充滿加復蕃息且河南河北家無宿藏一不穫則流離安危繫之且計蝗縱不能盡不愈於養以遺患乎帝然之黃門監盧懷慎曰凡天災安可以人力制也且殺蟲多必戾和氣願公思之崇曰昔楚王吞蛭而厥疾瘳叔敖斷蛇福乃降今蝗幸可驅若縱之穀且盡如百姓何殺蟲救人禍歸於崇不以諉公也蝗害訖息於是帝方躬萬幾朝夕詢逮它宰相畏帝威決皆謙憚唯獨崇佐裁決故得專任崇第除僻因近舍客廬會懷慎卒崇病瘖移告凡大政事帝必令源乾曜就咨焉乾曜所奏善帝則曰是必崇畫之有不合則曰胡不問崇乾曜謝其未也乃已帝欲崇自近詔徙寓四方館日遣問食飲起居高醫尙食踵道崇以館局華大不敢居帝使語崇曰恨不處禁中此何避久之紫微史趙誨受夷人賂當死崇素親倚署奏營減帝不悅時曲赦京師惟誨不原崇惶懼上還宰政引宋璟自代乃以開府儀同三司罷政事帝將幸東都而太廟屋自壞帝問宰相宋璟蘇頌同

對曰三年之喪未終不可以行幸壞壓之變天所以示教戒陛下宜停東巡修德以答至譴帝以問崇對曰臣聞隋取符堅故殿以營廟而唐因之且山有朽壤乃崩況木積年而木自當蠹乎但壞與行會不緣行而壞且陛下以關中無年輸餉告勞因以幸東都所以爲人不爲己也百司已戒供擬既具請車駕如行期舊廟難復完盍奉神主舍太極殿更作新廟申誠奉大孝之德也帝曰卿言正契朕意賜絹二百匹詔所司如崇言天子遂東因詔五日一參入閤供奉八年授太子少保以疾不拜明年卒年七十二贈揚州大都督諡曰文獻十七年追贈太子太保崇析贖產令諸子各有定分治令曰比見達官之裔多貧困至銖尺自競無論曲直均受囁詆田宅水磈既共有之至相推倚以頓廢陸賈石苞古達者也亦先有定分以絕後爭昔楊震趙明盧植張奐咸以薄葬知真識去身貴速朽耳夫厚葬之家流于俗以奢靡爲孝令死者戮尸暴骸可不痛哉死者無知自同糞土豈煩奢葬使其有知神不在柩何用破費徇侈乎吾亡歛以常服四時衣各一稱性不喜冠衣毋以入墓紫衣玉帶足便於體今之佛經羅什所譯姚興與之對讎而興命不延國亦隨滅梁武帝身爲寺奴齊胡太后以六宮入道皆亡國殄家近孝和皇帝發使贖生太平公主武三思等度人造寺身嬰夷戮爲天下笑五帝之時父不喪子兄不哭弟致仁壽無凶短也下逮三王國祚延久其臣則彭祖老聃皆得長齡此時無佛豈抄經鑄像力邪緣死喪造經像以爲追福夫

死者生之常古所不免彼經與像何所施然兒曹慎不得爲此崇尤長吏道處決無淹思三爲宰相常兼兵部故屯戍斥候士馬儲械無不諳記玄宗初立賓禮大臣故老雅尊遇崇每見便殿必爲之興去輒臨軒以送宅相莫如也時承權戚干政之後綱紀大壞先天末幸相至十七人臺省要職不可數崇常先有司罷冗職修制度擇百官各當其材請無廣釋道無數移吏繇是天子責成于下而權歸于上矣然資權謫始爲同州張說以素憾諷趙彥昭劾崇及當國說懼潛詣岐王申款崇它日朝衆趨出崇曳踵爲有疾狀帝召問之對曰臣損足曰無甚痛乎曰臣心有憂痛不在足問以故曰岐王陛下愛弟張說輔臣而密乘車出入王家恐爲所誤故憂之於是出說相州魏知古崇所引及同列稍輕之出攝吏部尙書知東都選知古憾焉時崇二子在洛通賓客饋遺憑舊請託知古歸悉以聞他日帝召崇曰卿子才乎皆安在崇揣知帝意曰臣二子分司東都其爲人多欲而寡慎是必嘗以事干魏知古帝始以崇私其子或爲隱微以言動之及聞乃大喜問安從得之對曰知古臣所薦也臣子必謂其見德而請之帝於是愛崇不私而薄知古欲斥之崇曰臣子無狀撓陛下法而逐知古外必謂陛下私臣乃止然卒罷爲工部尙書崇始名元崇以與突厥叱刺同名武后時以字行至開元世避帝號更以今名三子彞昇奔皆至卿刺史亦少修謹始崇欲使不越官次而習知吏道故自右千牛進至太子舍人皆平遷開元中有事五陵有司

以鷹犬從奔曰非禮也奏罷之請治劇爲睢陽太守召授太僕卿後爲尙書右丞子閔居右相牛仙客幕

府仙客病甚閔強使薦奔及盧奐爲宰相仙客妻以閔閔坐死奔貶永陽太守卒曾孫合曷

合元和中進士及第調武功尉善詩世號姚武功者遷監察御史累轉給事中奉先馮翊二縣民訴牛羊

使奪其田詔美原主簿朱儁覆按猥以田歸使合劾發其私以地還民歷陝虢觀察使終祕書監

勗字斯勸長慶初擢進士第數爲使府表辟進監察御史佐鹽鐵使務累遷諫議大夫更湖常二州刺史

爲宰相李德裕厚善及德裕爲令狐綯等譖遂適索支黨無敢通勞問旣居海上家無資病無湯劑勗數

饋餉候問不傳時爲厚薄終夔王傳自作壽藏於萬安山南原崇塋之旁署兆曰寂居穴墳曰復真堂中

劔士爲牀曰化臺而刻石告後世

宋璟邢州南和人七世祖弁爲元魏吏部尙書璟耿介有大節好學工文辭舉進士中第調上黨尉爲監

察御史遷鳳閣舍人居官鯁正武后高其才張易之誣御史大夫魏元忠有不臣語引張說爲驗將廷辯

說惶遽環謂說曰名義至重不可陷正人以求苟免緣此受謫芬香多矣若不測者吾且叩閣救將與子

偕死說感其言以實對元忠免死璟後遷左臺御史中丞會飛書告張昌宗引相工觀吉凶者璟請窮治

后曰易之等已自言於朕璟曰謀反無容以首原請下吏明國治易之等貴寵臣言之且有禍然激於義

雖死不悔后不懌姚璿遽傳詔令出璟曰今親奉德音不煩宰相擅宣王命后意解許收易之等就獄俄詔原之勅二張詣璟謝璟不見曰公事公言之若私見法無私也顧左右歎曰吾悔不先碎璿子首而令亂國經營宴朝堂二張列卿三品璟階六品居下坐易之詣事璟虛位揖曰公第一人何下坐璟曰才劣品卑卿謂第一何邪是時朝廷以易之等內寵不名其官呼易之五郎昌宗六郎鄭善果謂璟曰公奈何謂五郎爲卿璟曰以官正當爲卿君非其家奴何郎之云會有喪告滿入朝公卿以次謁通禮意易之等後至促步前璟舉笏却揖唯唯故積怨常欲中傷后知之得免然以數忤旨詔按獄揚州璟奏按州縣纔監察御史職耳又詔按幽州都督屈突仲翔辭曰御史中丞非大事不由使仲翔罪止職今使臣往此必有危臣者既而詔副李嶠使隴蜀璟復言隴右無變臣以中丞副李嶠非朝廷故事終辭易之初冀璟出則劾奏誅之計不行乃伺璟家婚禮將遣客刺殺之有告璟者璟乘庫車舍他所刺不得發俄二張死乃免神龍初爲吏部侍郎中宗嘉其直令兼諫議大夫內供奉仗下與言得失遷黃門侍郎武三思怙烝寵數有請于璟璟厲答曰今復子明辟王宜以侯就第安得尙干朝政獨不見產祿事乎後韋月將告三思亂宮掖三思諷有司論大逆不道帝詔殊死璟請付獄按罪帝怒岸巾出側門謂璟曰朕謂已誅矣尙何請璟曰人言后私三思陛下不問卽斬之臣恐有竊議者請按而後刑帝愈怒璟曰請先誅臣不然終不

奉詔帝乃流月將嶺南會還京師詔璟權檢校并州長史未行又檢校貝州刺史時河北水歲大饑三思使欽封租璟拒不與故爲所擠歷杭相二州政清毅吏下無敢犯者遷洛州長史睿宗立以吏部尙書同中書門下三品玄宗在東宮兼右庶子先是崔湜鄭愔典選爲戚近于奪至迎用二歲闕猶不能給更置比冬選流品滯并璟與侍郎李乂盧從愿澄革之銓總平允太平公主不利東宮嘗駐輦光範門伺執政以諷璟曰太子有大功宗廟社稷主也安得異議乃與姚崇白奏出公主諸王於外帝不能用貶楚州刺史歷竟冀魏三州河北按察使進幽州都督以國子祭酒留守東都遷雍州長史玄宗開元初以雍州爲京兆府復爲尹進御史大夫坐小累爲睦州刺史徙廣州都督廣人以竹茅茨屋多火璟教之陶瓦築堵列邸肆越俗始知棟梁利而無患災召拜刑部尙書四年遷吏部兼侍中帝幸東都次嶠谷馳道隘稽擁車騎帝命黜河南尹李朝隱知頓使王怡等官璟曰陛下富春秋今始巡守以道不治而罪二臣繇此相劾後有受其敝者帝遽命捨之璟謝曰陛下向以怒責之以臣言免之是過歸於上而恩在下姑聽待罪於朝然後詔還其職進退得矣帝善之累封廣平郡公廣人爲璟立遺愛頌璟上言頌所以傳德載功也臣之治不足紀廣人以臣當國故爲溢辭徒成諛諛者欲釐正之請自臣始有詔許停帝嘗命璟與蘇頲制皇子名與公主號遂差次所封且詔別擇一美稱及佳邑封上璟奏言七子均養詩人所稱今若同等

別封或母寵子愛恐傷鳴鳩之平昔袁盎引却慎夫人席文帝納之夫人亦不爲嫌以其得長久計也臣不敢別封帝歎重其賢皇后父王仁峻卒將葬用昭成皇后家賢孝謹故事墳高五丈一尺環等請如著令帝已然可明日復詔如孝謹者環還詔曰儉德之恭侈惡之大也僭禮厚葬前世所誠故古墓而不墳人子於哀迷則未遑以禮自制故聖人制齊斬總免衣衾棺槨各有度數雖有賢者斷其私懷衆皆務奢獨能以儉所謂至德要道者中宮若謂孝謹踰制初無非者一切之令固不足以法貞觀時嫁長樂公主魏徵謂不可加長公主太宗欣納而文德皇后降使厚謝草席人追王其父擅作鄴陵而禍不旋踵國家知人情無窮故爲制度不因人以搖動不變法以愛憎比來人間競務靡葬今以后父重戚不憂乏用高冢大寢不畏無人百事官給一朝可就而區區屢聞者欲成朝廷之政中宮之美爾儻中宮情不可奪請準令一品陪陵墳四丈差合所宜帝曰朕常欲正身紀綱天下於后容有私邪然人所難言公等乃能之即可其奏又遣使賚綵絹四百匹會日食帝素服俟變錄囚多所貸遺賑卹災患罷不急之務環曰陛下降德音卹大隱未有輕繫惟流死不免此古所以慎赦也恐議者直以月蝕修刑日蝕修德或言分野之變冀有揣合臣以謂君子道長小人道銷止女謁放讒夫此所謂修德也囹圄不擾兵甲不濫官不苛治軍不輕進此所謂修刑也陛下常以爲念雖有虧食將轉而爲福又何患乎且君子恥言浮於行願動天

以誠無事空文帝嘉納後以開府儀同三司罷政事京兆人權梁山謀逆勅河南尹王怡馳傳往按牢械充滿久未決乃命環爲京留守復其獄初梁山詭稱婚集多假貸吏欲并坐貸人環曰婚禮借索大同而狂謀率然非所防億使知而不假是與爲反貸者弗知何罪之云平縱數百人十二年東巡泰山環復爲留守帝將發謂曰卿國元老別方歷時宜有嘉謀以遺朕環因一二極言手制答曰所進當書之坐右出入觀省以誠終身賜賚優渥進兼吏部尚書十七年爲尚書右丞相而張說爲左丞相源乾曜爲太子少傅同日拜有詔太官設饌太常奏樂會百官尚書省東堂帝賦三傑詩自寫以賜二十年請致仕許之仍賜全祿退居洛乘輿東幸環謁道左詔榮王勞問別遣使賜藥餌二十五年卒年七十五贈太尉諡文貞環風度凝遠人莫涯其量始自廣州入朝帝遣內侍楊思勗驛迓之未嘗交一言思勗自以將軍貴幸訴之帝帝益嗟重環爲宰相務清政刑使官人皆任職聖厯後突厥默啜負其疆數窺邊侵九姓拔曳固負勝輕出爲其狙擊斬之入蕃使郝靈佺傳其首京師靈佺自謂還必厚見賞環顧天子方少恐後干寵蹈利者夸威武爲國生事故抑之踰年纔授右武衛郎將靈佺恚憤不食死張嘉貞後爲相關堂按見其危言切議未嘗不失聲歎息六子昇尚渾恕華衡昇太僕少卿尚漢東太守

渾與李林甫善歷諫議大夫平原太守御史中丞東京採訪使在平原暴斂求進至重取民一年庸租使

東畿薛稷甥女鄭寡而美渾使河南尉楊朝宗聘而已納之薦朝宗爲赤尉恕以都官郎中爲劍南採訪判官數貪縱不法陰養刺客天寶中渾恕尚並以賊敗渾流高要恕流海康尙貶臨海長史華衡亦皆坐貪得罪廣德中渾起爲太子諭德物議穢薄之流死江嶺昆弟皆荒飲俳嬉而衡最險悖廣平之風衰焉贊曰姚崇以十事要說天子而後輔政顧不偉哉而舊史不傳觀開元初皆已施行信不誣已宋璟剛正又過於崇玄宗素所尊憚常屈意聽納故唐史臣稱崇善應變以成天下之務璟善守文以持天下之正二人道不同同歸于治此天所以佐唐使中興也嗚呼崇勸天子不求邊功璟不肯賞邊臣而天寶之亂卒蹈其害可謂先見矣然唐三百年輔弼者不爲少獨前稱房杜後稱姚宋何哉君臣之遇合蓋難矣夫

唐書卷一百二十四

唐書卷一百二十五

宋 端 明 殿 學 士 宋 祁 撰

列傳第五十

蘇瓌

蘇瓌字昌容雍州武功人隋尙書僕射威之曾孫擢進士第補恆州參軍居母喪哀毀加人左庶子張大安表舉孝悌擢瓌王府錄事參軍歷朗歙二州刺史時來俊臣貶州參軍人懼復用多致書請瓌瓌叱其使曰吾忝州牧高下自有體能過待小人乎遂不發書俊臣未至追還恨之由是連外徙不得入久之轉揚州大都督府長史州據都督會多珍怪產前長史張潛于辯機貲取鉅萬瓌單身襤被自將徙同州刺史歲旱兵當番上者不能赴瓌奏宿衛不可闕宜月賜增半糧俾相給足則不闕番又宜却進獻罷營造不急者不見省時十道使括天下亡戶初不立籍人畏搜括卽流入比縣旁州更相度蔽瓌請罷十道使專責州縣豫立簿注天下同日闕正盡一月止使梃姦匿歲一括實檢制租調以免勞弊武后鑄浮屠立廟塔役無虛歲瓌以爲糜損浩廣雖不出國用要自民產日殫百姓不足君孰與足天下僧尼濫僞相半請併寺著僧常員數缺則補后善其言神龍初入爲尙書右丞封懷縣男瓌明曉法令多識臺省舊章一

朝格式皆所刪正再遷戶部尚書拜侍中留守京師中宗復政鄭普思以妖幻位祕書員外監支黨徧岐隴間相煽誘爲亂環捕繫普思窮訊普思妻以左道得幸皇后出入禁中有詔勿治環廷爭不可帝猶依違司直范獻忠環使按普思者進曰環爲大臣不能前誅逆豎而報天子罪大矣臣請先斬環於是僕射魏元忠頓首曰環長者用刑不枉普思法當死帝不得已流普思於儋州餘黨論死累拜尚書右僕射同中書門下三品進封許國公帝南郊國子祭酒祝欽明建白皇后爲亞獻安樂公主爲終獻環以爲非禮帝前折愧之帝昏懦不能從時大臣初拜官獻食天子名曰燒尾環獨不進及侍宴宗晉卿嘲之帝默然環自解於帝曰宰相變和陰陽代天治物今粒食踴貴百姓不足衛兵至三日不食臣誠不稱職不敢燒尾帝崩遺詔皇太后臨朝相王以大尉輔政后詔宰相韋安石韋巨源蕭至忠宗楚客紀處之韋温李嶠韋嗣立唐休璟趙彥昭洎環議禁中楚客猥曰太后臨朝相王有不通問之嫌不宜輔政環正色曰遺制乃先帝意安得輒改楚客等怒卒削相王輔政事環稱疾不朝是月韋氏敗睿宗卽位進左僕射景雲元年老病罷爲太子少傅卒年七十二贈司空荊州大都督諡曰文貞皇太子別次發哀遺令薄葬布車一乘環治州考課常最爲宰相陳當世病利甚多韋温始爲汴州司倉參軍以賊被杖及用事憚環正卒不敢傷開元二年賜其家實封百戶長子頽固辭乃擢中子父左補闕六年詔與劉幽求配享睿宗廟廷文

宗太和中錄壽德官其四代孫翔環諸子頽詵顯

頽字廷碩弱敏悟一覽至于百輒覆誦第進士調烏程尉武后封嵩高舉賢良方正異等除左司禦率府胄曹參軍吏部侍郎馬載曰古稱一日千里蘇生是已再遷監察御史長安中詔覆來俊臣等冤獄頽驗發其誣多從洗宥遷給事中修文館學士拜中書舍人時環同中書門下三品父子同在禁筦朝廷榮之玄宗平內難書詔填委獨頽在太極後閣口所占授功狀百緒輕重無所差書史白曰丐公徐之不然手腕脫矣中書令李嶠曰舍人思若涌泉吾所不及遷太常少卿仍知制誥遭父喪起爲工部侍郎辭不拜終制乃就職帝問宰相有自工部侍郎得中書侍郎乎對曰陛下任賢惟所命何資之計乃詔以頽爲中書侍郎帝勞曰方美官缺每欲用卿然宰相議遂無及者朕爲卿恨陸象先歿紫微侍郎未嘗補朕思其人無易卿者頽頓首謝明日加知制誥給政事食給食自頽始時李父對掌書命帝曰前世李嶠蘇味道文擅當時號蘇李今朕得頽及父何愧前人哉俄襲封許國公吐蕃盜邊諸將數敗虜益張秣騎內侵帝怒欲自將兵討之頽諫曰古稱荒服取荒忽之義非常奉職貢也故來則拒去則勿逐以禽獸畜之羈縻御之譬若獵然羽毛不入服用體肉不登郊廟則王者不射也況萬乘之重與犬羊蚊蚋語負勝哉遠夷左衽不足以辱天子亦可見矣雖然兵法先聲後實陛下如班親征之詔而勅虜將謀夫投會濟師則吐

善不日崩破亦無待躬致天討也臣謂岐隴凋弊積年若干乘萬騎供億不涯誠恐徭役內興寇掠外虞斯人不堪一也戎虜之性驟往倏來敗不恥奔勝不讓成若大軍一臨邊怖震烏散彼出多方我受其誤二也太上皇聞陛下身對寇場不能無憂蒸蒸之思何以自安三也漢蒯成侯諫高帝曰上嘗自勞豈謂無人使哉高帝以爲愛我今將相大臣豈無爲陛下宣力者何親行之遽邪不省復上言王者之師有征無戰落賈或闕王命征之於是乎治兵其郊獲辭而止非謂按甲自臨敵人畏之莫敢戰也古天子無親將惟黃帝五十二戰當未平之時自阪泉功成則修身閒居無爲無事陛下撥定禍亂方當深視高居制禮作樂禪梁父登空同何至猷天居衽金革爲一日之敵今吐蕃遺渠領干犯國令軍吏一不勝而陛下屈至尊爲之敵雖朝鼎夕砧猶未可以夸四夷安足勞聖躬哉虜之入唯盜牛馬發窳褊衣未嘗殺略邊人其罪易原也臣恐虜情狼顧牽連北狄聞六師之行八幽并犯靈夏南動京師太上皇一致憂勞是陛下以天下之安不能盡其親也臣固曰居中制勝策之上者若夫擇良將募重而約嚴違律必誅殺敵必賞多出金以購會長虜亡無日矣願稍遷延以須西音亦會薛訥大破吐蕃俘獲不貲由是帝止不行時詔立靖陵碑命頌爲之詞辭曰前世帝后不志碑事弗稽古謂之不法審當可者祖宗諸陵一須營立後嗣謂何帝不納其言開元四年進同紫微黃門平章事修國史與宋璟同當國璟剛正多所裁決頌能推

其長在帝前敷奏璟有未及或少屈頌輒助成之有不會意頌更申璟所執故帝未嘗不從二人相得歡甚璟嘗曰吾與蘇氏父子同爲宰相僕射長厚自是國器若獻可替否事至卽斷盡公不顧私則今丞相爲過之八年罷爲禮部尙書俄檢校益州大都督長史按察節度劍南諸州時蜀彫劫人流亡詔頌收劍南山澤鹽鐵自贍頌尙簡靜重興力役卽募戍人輪雇直開井置鑪量入計出分所贏市穀以廣見糧時前司馬皇甫恂使蜀檄取庫錢市錦半臂琵琶捍撥玲瓏鞭頌不肯予因上言遣使銜命先取不急非陛下以山澤贍軍費意或謂明公在遠叵得忤上意頌曰不然明主不以私愛奪至公我可以遠近廢忠臣節邪嵩州蠻苴院與吐蕃連謀入寇獲諜者吏請討之頌不聽移書還其諜曰毋得爾苴院羞悔不敢侵邊從封泰山詔頌朝覲壇世咨其文還分主十銓事卒年五十八帝猶視朝起居舍人韋述上疏曰貞觀永徽時大臣薨輒置朝舉哀成終始恩上有旌賢錄舊之德下有生榮死哀之美昔晉知悼子卒平公宴樂杜黃一言而悟春秋載之故禮部尙書頌累葉輔弼奉事軒陛二十餘年今奄忽不還邦人痛嗟惟惟蓋之舊股肱之戚宜節廢朝明君臣之誼帝曰固朕意也卽日帳次哭洛城南門不朝詔贈右丞相諡曰文憲葬日帝游咸宜宮將獵聞之曰頌且葬我忍自娛哉半道而還頌性廉儉奉粟悉推散諸弟親族儲無長貲自景龍後與張說以文章顯稱望略等故時號燕許大手筆帝愛其文曰卿所爲詔令別錄副本

署臣某撰朕當留中後遂爲故事其後李德裕著論曰近世詔誥惟類敘事外自爲文章云
詵字廷曾舉賢良方正高第補汾陰尉遷祕書詳正學士累轉給事中時顯爲紫微侍郎因辭帝曰古有
內舉不避親者乎對曰晉祁奚是也帝曰若然朕自用詵卿言非公也頃之出徐州刺史治有迹卒贈吏
部侍郎詵子震以蔭補千牛十餘歲彊學有成人風類曰吾家有子累遷殿中侍御史長安令安祿山陷
京師震與尹崔九遠殺開遠門吏棄家出奔會肅宗興節靈武震晝夜馳及行在帝嘉之拜御史中丞遷
文部侍郎廣平王爲元帥崇擇賓佐以震爲糧料使二京平封岐陽縣公改河南尹九節度兵敗相州震
與留守崔圓奔襄鄧貶濟王府長史起爲絳州刺史進二部侍郎判度支爲秦陵建陵鹵簿使以勞封岐
國公拜太常卿代宗將幸東都復以震爲河南尹未行卒贈禮部尚書

幹環從父兄也父勗字慎行武德中爲秦王諮議典籤文學館學士尚南康公主拜駙馬都尉遷魏王秦
府司馬博學有美名秦重之勸開館引文學士著書名家歷吏部侍郎太子左庶子卒幹擢明經授徐王
府記室參軍王好畋每諫止之垂拱中遷魏州刺史河朔饑前刺史苛暴百姓流徙幹檢吏督勸課農
豫公是流冗盡復以治稱拜右羽林軍將軍遷冬官尚書來俊臣素忌之誣幹與琅邪王沖通書繫獄發

張說字道濟或字說之其先自范陽徙河南更爲洛陽人永昌中武后策賢良方正詔吏部尚書李景諶
糊名較覆說所對第一后署乙等授太子校書郎遷左補闕后嘗問諸儒言氏族皆本炎黃之裔則上古
乃無百姓乎若爲朕言之說曰古未有姓若夷狄然自炎帝之妻黃帝之姬始因所生地而爲之姓其後
天子建德因生以賜姓黃帝二十五子而得姓者十四德同者姓同德異者姓殊其後或以官或以國或
以王父之字始爲賜族久乃爲姓降唐虞抵戰國姓族漸廣周衰列國既滅其民各以舊國爲之氏下及
兩漢人皆有姓故姓之以國者韓陳許鄭魯衛趙魏爲多后曰善久視中后追暑三陽宮乾秋未還說上
疏曰宮距洛城百六十里有伊水之隔嶠坂之峻過夏涉秋水潦方積道壞山險不通轉運河廣無梁咫
尺千里扈從兵馬日費資饋太倉武庫並在都邑紅粟利器蘊若山丘奈何去宗廟之上都安山谷之僻
處是猶倒持劍戟示人鐔柄巨竊爲陛下不取夫禍變之生在人所忽故曰安樂必戒無行所悔不可一
也宮城褊小萬方輻湊填郭溢郭併鍾無所排斥居人蓬宿草次風雨暴至不知庇託孤嫠老病流轉衢
巷陛下作人父母將若之何不可二也池亭奇巧蕩誘上心削巒起觀塌流漲海俯貫地脉仰出雲路易
山川之氣奪農桑之土延木石運斧斤山谷連聲春夏不輟勸陛下作此者豈正人邪詩云人亦勞止迄
可小康不可三也御苑東西二十里外無墻垣局禁內有榛叢谿谷猛毅所伏暴戾所憑陛下往往輕行

警蹕不肅歷蒙密乘險職卒有逸獸狂夫驚犯左右豈不殆哉易曰思患豫防願爲萬姓持重不可四也
今北有胡寇觀邊南有夷獠驅徼關西小旱耕稼是憂安東近平輪漕方始臣願及時旋軫深居上京息
人以展農修德以來遠罷不急之役省無用之費澄心澹懷惟億萬年蒼蒼羣生莫不幸甚臣度芻議十
不從一何者沮盤游之娛間林泚之玩規遠圖替近適要後利棄前歡未沃明主之心已擬貴臣之意然
不愛死者懼言責不職耳后不省擢鳳閣舍人張易之誣陷魏元忠也援說爲助說廷對元忠無不順言
忤后旨流欽州中宗立召爲兵部員外郎累遷工部兵部二侍郎以母喪免既葬詔起爲黃門侍郎因請
終制祁陳哀到時禮俗衰薄士以奪服爲榮而說獨以禮終天下高之除喪復爲兵部兼修文館學士睿
宗卽位擢中書侍郎兼雍州長史譙王重福死東都支黨數百人獄久不決詔說往按一昔而罪人得乃
誅張靈均鄭愔餘誣悉原帝嘉其不枉直不漏惡慰勞之玄宗爲太子說與褚元量侍讀尤見親禮踰
年進同中書門下平章事監修國史景雲二年帝謂侍臣曰術家言五日內有急兵入宮爲我備之左右
莫對說進曰此讒人謀動東宮耳陛下若以太子監國則名分定姦膽破蓋禍塞矣帝悟下制如說言明
年皇太子卽皇帝位太平公主引蕭至忠崔湜等爲宰相以說不附己授尙書左丞罷政事爲東都留守
說知太平等懷逆乃因使以佩刀獻玄宗請先決策帝納之至忠等已誅召爲中書令封燕國公實封二

百戶始武后末年爲澁寒胡獻中宗嘗乘樓縱觀至是因四夷來朝復爲之說上疏曰韓宣適魯見周禮
而歎孔子會齊數倡優之罪列國如此況天朝乎今四夷請和使者入謁當接以禮樂示以兵威雖曰戎
夷不可輕也焉知無駒支之辯由余之賢哉且乞寒澁胡未聞典故裸體跳足汨泥揮水盛德何觀焉恐
非干羽柔遠樽俎折衝之道納之自是遂絕素與姚元崇不平罷爲相州刺史河北道按察使坐累徙岳
州停實封說既失執政意內自懼雅與蘇瓌善時瓌子頰爲相因作五君詠獻頌其一紀瓌也候瓌忌日
致之頰覽詩嗚咽未幾見帝陳說忠謨有勳不宜棄外遂遷荊州長史俄以右羽林將軍檢校幽州都督
入朝以戎服見帝大喜授檢校并州長史兼天兵軍大使修國史勅齋奠卽軍中論譏朔方軍大使王賚
誅河曲降虜阿布思也九姓同羅拔野固等皆疑懼說持節從輕騎二十直詣其部宿帳下召見酋豪慰
安之副使李憲以虜難信不宜涉不測說報曰吾肉非黃羊不畏其食血非野馬不畏其刺士當見危致
命亦吾効死秋也由是九姓遂安後討蘭池叛胡康待賓詔說相聞經略時党項羌亦連兵攻銀城說
將步騎萬人出合河關掩擊破之追北駱駝羗胡自相猜夜聞待賓遁入鐵建山餘衆奔潰說招納党
項使復故處副使史獻請盡誅之說不從奏置麟州以安羌衆召拜兵部尙書同中書門下三品讓宋璟
陸象先不許明年詔爲朔方節度大使親行五城督士馬時慶州方渠降胡康願子反自爲可汗掠牧馬

西涉河出塞說進討至木檠山禽之俘獲三千乃議徙河曲大州殘胡五萬於唐鄧仙豫間空河南朔方地以功賜實封三百戶故時邊鎮兵羸六十萬說以時平無所事請罷二十萬還農天子以爲疑說曰邊兵雖廣諸將自衛營私爾所以制敵不在衆也以陛下之明四夷畏威不慮減兵而招寇臣請以閩門百口爲保帝乃可時衛兵貧弱番休者亡命略盡說建請一切募勇彊士優其科條簡色役不旬日得勝兵十三萬分補諸衛以彊京師後所謂曠騎者也帝自東都將還京因幸并州說見帝曰太原王業所基陛下巡幸振耀威武以申永思繇河東入京師有漢武睢上祠此禮廢闕歷代莫舉願爲三農祈穀誠四海之福帝納其言過祠后土乃還進中書令說又倡封禪議定詔與諸儒草儀多所裁正帝召說與禮官學士置酒集仙殿曰朕今與賢者樂于此當遂爲集賢殿乃下制改麗正書院爲集賢殿書院而授說院學士知院事東封還爲尙書右丞相兼中書令詔說撰封禪壇頌刻之泰山以夸成功初源乾曜不欲封禪說固請乃不相平及升山執事官當從者說皆引所厚超階入五品從兵唯加勳而不賜衆怨其專宇文融先獻策括天下游戶及籍外田畧十道勸農使分行郡縣說畏其擾數沮格之至是融請吏部置十銓與蘇頲等分治選事有所論請說頗抑之於是銓綜失敘融恨之乃與崔隱甫李林甫共劾奏說引術士王慶則夜祠禱解而奏表其閩引僧道岸窺詞時事冒署右職所親吏張觀范堯臣依據說勢市權招賂

擅給太原九姓羊錢千萬其言醜慘帝怒詔乾曜隱甫刑部尙書韋抗卽尙書省鞠之發金吾兵圍其第說兄左庶子光詣朝堂刑耳列寃帝遣高力士往視見說蓬首垢面席藁家人以瓦器饋脫粟鹽蔬爲自罰憂懼者力士還奏且言說往納忠於國有功帝憮然乃停說中書令誅慶則等坐者猶十餘人說既罷政事在集賢院專修國史又乞停右丞相不許然每軍國大務帝輒訪焉隱甫等恐說復用巧文詆毀素忿說者又著疾邪篇帝聞因令致仕始爲相時帝欲事吐蕃說密請講和以休息鄯塞帝曰朕待王君奘計之說出告源乾曜曰君奘好兵以來利彼入吾言不用矣後君奘破吐蕃於青海西說策其且敗因上嵩州鬪羊於帝以申諷諭曰使羊能言必將曰鬪而不解立有死者所賴至仁無殘量力取勸焉帝識其意納之賜綵千匹後瓜州失守君奘死十七年復爲右丞相遷左丞相上日勅所司供帳設樂內出醪饌帝爲賦詩俄授開府儀同三司十八年卒年六十四爲停正會贈太師諡曰文貞羣臣駭異未決帝爲製碑諡如太常繇是定說敦氣節立然許高推藉後進於君臣朋友大義甚篤帝在東宮所與祕謀密計甚衆後卒爲宗臣朝廷大述作出其手帝好文辭有所爲必使視草善用人之長多引天下知名士以佐佑王化粉澤典章成一王法天子尊尙經術開館置學士修太宗之政皆說倡之爲文屬思精壯長於碑誌世所不逮既謫岳州而詩益悽婉人謂得江山助云常典集賢圖書之任間雖致仕一歲亦修史於家

始帝欲授說大學士辭曰學士本無大稱中宗崇寵大臣乃有之臣不敢以爲稱固辭乃免後宴集賢院故事官重者先飲說曰吾聞儒以道相高不以官閱爲先後太宗時修史十九人長孫無忌以元舅每宴不肯先舉爵長安中與修珠英當時學士亦不以品秩爲限於是引觴同飲時伏其有體中書舍人陸堅以學士或非其人而供儼太厚無益國家者議白罷之說聞曰古帝王功成則有奢滿之失或興池觀或尙聲色今陛下崇儒向道躬自講論詳延豪俊則麗正乃天子禮樂之司所費細而所益者大陸生之言蓋未達邪帝知遂薄堅說嘗自爲其父碑帝爲書其額曰嗚呼積善之墓說歿後帝使就家錄其文行於世開元後宰相不以姓著者曰燕公云大厯中詔配享玄宗廟廷子均均相

均亦能文自太子通事舍人累遷主爵郎中中書舍人開元十七年說授左丞相校京官考注均考曰父教子忠古之善訓王言帝載尤難以任庸以嫌疑而撓紀綱考上下當時亦不以爲私後襲燕國公累遷兵部侍郎以累貶饒蘇二州刺史久之復爲兵部侍郎自以己才當輔相爲李林甫所抑林甫卒倚陳希烈冀得其處既而楊國忠用事希烈罷而均爲刑部尙書坐均貶建安太守遷授大理卿居常缺望不平祿山盜國爲僞中書令肅宗反正兄弟皆論死房瑄聞之驚曰張氏滅矣乃見苗晉卿營解之帝亦願說有舊詔免死流合浦建中初贈太子少傅子懷事德宗爲中書舍人

均尙靈親公主時說居中秉政均爲舍人諸父光爲銀青光祿大夫榮盛冠時玄宗嘗均厚卽禁中置內宅侍爲文章珍賜不可數均供奉翰林而均以此所賜夸均曰此婦翁遺婿非天子賜學士也均嘗爲帝贊禮舉止都雅帝悅之因幸內宅顧均曰希烈辭宰相孰可代者均錯愕未得對帝曰無易吾婿均頓首謝會貴妃聞以語國忠國忠惡之及希烈罷薦韋見素代之均始怨上天寶十三載祿山入朝以破奚契丹功求平章事國忠曰祿山有軍功然不識字與之恐四夷輕漢乃止及還范陽詔高力士餞滄坡力士歸曰祿山內鬱鬱若知欲相而不行者帝以語國忠國忠曰所告者必張均帝怒盡逐其兄弟以均守建安而均爲盧溪郡司馬均自給事中爲宜春郡司馬歲中還均爲太常卿帝西狩至咸陽唯韋見素楊國忠魏方進從帝謂力士曰若計朝臣當孰至者力士曰張均兄弟世以恩戚貴其當卽來房瑄有宰相望而陛下久不用又爲祿山所器此不來矣帝曰未可知也後瑄至召見流涕帝撫勞且問均均在瑄曰臣之西亦嘗過其家將與偕來均曰馬不善馳後當繼行然臣觀之恐不能從陛下矣帝嗟恨顧力士曰吾豈欲誣人哉均等自謂才器亡雙恨不大用吾向欲始終全之今非若所料也均遂與希烈皆相祿山均死賊中

贊曰說於玄宗最有德及大平用事納忠惓惓又圖封禪發明典章開元文物彬彬說力居多中爲姦人

排擯幾不免自古功名始終亦幾希何獨說哉至子以利遽敗其家若瓌頤再世稱賢宰相盛矣

唐書卷一百二十五

唐書卷一百二十五考證

蘇瓌子頤帝不納其言○臣德潛按不納其言謂玄宗不納頤諫立靖陵碑之言也舊書玄宗從其言而

止較合

張說傳封燕國公實封二百戶○舊書三百戶

中書舍人陸堅以學士或非其人而供儻太厚云云○舊書作徐堅語

說子均久之復爲兵部侍郎○舊書作戶部侍郎

唐書卷一百二十五考證

Blank columns for text in the right-hand page.

唐書卷一百二十六

宋 端 明 殿 學 士 宋 祁 撰

列傳第五十一

魏盧李杜張韓

魏知古深州陸澤人方直有雅才擢進士第以著作郎修國史累遷衛尉少卿檢校相王府司馬神龍初為吏部侍郎以母喪解服除為晉州刺史睿宗立以故屬拜黃門侍郎兼修國史會造金仙玉真觀雖盛夏工程嚴促知古諫曰臣聞古之君人必時視人之所勤人勤於力則功築罕人勤於財則貢賦少人勤於食則百事廢故曰不作無益害有益又曰罔拂百姓以從己之欲禮季夏之月樹木方盛無有斬伐不可以興土功此皆興化立治為政養人之本也今為公主造觀將以樹功祈福而此皆百姓所宅卒然迫逼令其轉徙扶老攜幼別椽發瓦呼嗟道路乖人事違天時起無用之作崇不急之務羣心震搖眾口藉藉陛下為人父母欲何以安之且國有簡冊君舉必記言動之微可不慎歟願下明詔順人欲除功役收之桑榆其失不遠不納復諫曰自陛下散窮凶逆保定大器蒼生顛隕以謂朝有新政今風教頽替日甚府藏空屈人力勞敝營作無涯吏員濩增諸司試補員外檢校官已贏二千太府之帛為殫太倉之米

乾隆四年校刊

唐書卷一百二十六列傳

不支臣前請停金仙玉真訖亦未止今前水後旱五穀不立繇茲向春必甚饑饉陛下欲何方以賑之又
突厥於中國爲患日久其人非可以禮義誠信約也雖遣使請婚恐豺狼之心弱則順伏強則驕逆月滿
騎肥乘中國饑虛講親際會窺犯亭鄣復何以防之帝嘉其直以左散騎常侍同中書門下三品玄宗在
春宮又兼左庶子先天元年爲侍中從獵渭川獻詩以諷手制褒答并賜物五十段明年封梁國公寶懷
貞等詭謀亂國知古密發其姦懷貞誅賜封二百戶物五百段玄宗恨前賞薄手勅更加百戶旌其著節
是冬詔知東都吏部選事以稱職聞優詔賜衣一副自是恩意尤渥由黃門監改紫微令與姚元崇不協
除工部尚書罷政事開元三年卒年六十九宋璟聞而嘆曰叔向古遺直子產古遺愛兼之者其魏公乎
贈幽州都督諡曰忠所薦洹水令呂太一蒲州司功參軍齊澣右內率騎曹參軍柳澤密尉宋遙左補闕
袁暉右補闕封希顏伊闕尉陳希烈後皆有聞於時文宗太和二年求其曾孫處訥授湘陽尉與魏徵裴
冕後擢任之

盧懷慎滑州人蓋范陽著姓祖愨仕爲靈昌令遂爲縣人懷慎在童卯已不凡父友監察御史韓思彥歎
曰此兒器不可量及長第進士歷監察御史神龍中遷侍御史中宗謁武后上陽宮后詔帝十日一朝懷
慎諫曰昔漢高帝受命五日一朝太公於櫟陽宮以起布衣登皇極子有天下尊歸於父故行此耳今陛

下守文繼統何所取法況應天去提象纒二里所騎不得成列車不得方軌於此屢出愚人萬有一犯屬
車之塵雖罪之何及臣愚謂宜遵內朝以奉溫清無煩出入不省遷右御史臺中丞上疏陳時政曰臣聞
善人爲邦百年可以勝殘去殺孔子稱苟用我者朞月而已三年有成故書三載考績三考黜陟幽明昔
子產相鄭更法令布刑書一年人怨思殺之三年人德而歌之子產賢者也其爲政尙累年而後成況常
材乎比州牧上佐兩畿令或一二歲或三五月卽遷會不論以課最使未遷者傾耳以聽企踵以望冒進
亡廉亦何暇爲陛下宣風恤人哉禮義不能興戶口益以流倉庫愈匱百姓日敝職爲此耳人知吏之不
久不率其教吏知遷之不遷不究其力媮處爵位以養資望雖明主有勤勞天下之志然僥幸路啟上下
相蒙竄盡至公乎此國病也賈誼所謂躒躒乃小小者耳此而不革雖和緩將不能爲漢宣帝綜覈名實
興治致化黃霸良二千石也加秩賜金就旌其能終不肯遷故古之爲吏至長子孫臣請都督刺史上佐
畿令任未四考不得遷若治有尤異或加賜車裘祿秩降使臨問璽書慰勉須公卿闕則擢之以勵能者
其不職或貪暴免歸田里以明賞罰之信昔唐虞稽古建官惟百夏商官倍亦克用乂此省官也故曰官
不必備惟其才無曠庶官天工人其代之此擇人也今京諸司員外官數十倍近古未有謂不必備則爲
有餘求其代工乃多不盡務而奉粟之費歲巨億萬徒竭府藏豈致治意哉今民力敝極河渭廣漕不給

京師公私耗損邊隅未靜儻炎曠成疹租稅減入疆場有警賑救無年何以濟之毋輕人事惟艱毋安厥位惟危此慎微也原員外之官皆一時良幹擢以才不申其用尊以名不任其力自昔用人豈其然歟臣請才堪牧宰上佐並以遷授使宣力四方責以治狀有老病若不任職者一廢省之使賢不肯確然殊異此切務也夫冒于寵賂侮于鰥寡爲政之蠹也竊見內外官有昧餉狼籍剝蒸人雖坐流黜俄而遷復還爲牧宰任以江淮嶺嶺粗示懲貶內懷自棄徇貨陪貲訖無悛心明主之於萬物平分而無偏施以罪吏牧馭方是謂惠姦而遺遠遠州陬邑何負聖化而獨受其惡政乎邊徼之地夷夏雜處憑險恃遠易擾而難安官非其才則黎庶流亡起爲盜賊由此言之不可用凡才況猾更乎臣請以臧論廢者削迹不數十年不賜收齒書曰旌別淑慝卽其誼也疏奏不報遷黃門侍郎滄陽縣伯與魏知古分領東都選開元元年進同紫微黃門平章事三年改黃門監薛王舅王仙童暴百姓靈司按得其罪業爲申列有詔紫微黃門覆實懷慎與姚崇執奏仙童罪狀明甚若御史可疑則它人何可信由是獄決懷慎自以才不及崇故事皆推而不專時議爲伴食宰相又兼吏部尙書以疾乞骸骨許之卒贈荊州大都督諡曰文成遺言薦宋璟李傑李朝隱虞從憲帝悼歎之懷慎清儉不營產服器無金玉文綺之飾雖貴而妻子猶寒飢所得祿賜於故人親戚無所計惜隨散輒盡赴東都掌選奉身之具止一布囊既屬疾宋璟盧從愿候之見

敝簞單藉門不施箔會風雨至舉席自障日晏設食蒸豆兩器菜數楮而已臨別執二人手曰上求治切然享國久稍倦於勤將有儉人乘間而進矣公第志之及治喪家無留儲帝時將幸東都四門博士張晏上言懷慎忠清以直道始終不加優錫無以勸善乃下制賜其家物百段米粟二百斛帝後還京因校獵鄠杜間望懷慎家環堵陋家人若有所營者馳使問焉還白懷慎大祥帝卽以繡帛賜之爲罷獵經其墓碑表未立停蹕臨視泫然流涕詔官爲立碑令中書侍郎蘇頌爲之文帝自書子奂奕奂早修整爲吏有清白稱歷御史中丞出爲陝州刺史開元二十四年帝西還次陝嘉其美政題贊於聽事曰寧城之重分陝之雄亦旣利物內存匪躬斯爲國寶不墜家風尋召爲兵部侍郎天寶初爲南海太守南海兼水陸都會物產環怪前守劉巨麟彭臬皆以臧敗故以奂代之汙吏斂手中之市舶者亦不敢干其法遠俗爲安時謂自開元後四十年治廣有清節者宋璟李朝隱奂三人而已終尙書右丞奕見

忠義傳

李元絃字大綱其先滑州人後世占京兆萬年本姓丙氏曾祖粲仕隋爲屯衛大將軍煬帝使督京師之西二十四郡盜賊善撫循能得士心高祖與之厚及兵入關以衆歸授宗正卿應國公賜姓李後爲左監門大將軍以其老聽乘馬按視宮禁年八十餘卒諡曰明祖高宗時爲太常卿隴西公父道廣武后時

爲汴州刺史有善政突厥契丹寇河北議發河南兵擊之百姓震擾道廣悉心撫定人無離散遷殿中監同鳳閣鸞臺平章事封金城侯卒贈秦州都督諡曰成元紘早修謹仕爲雍州司戶參軍時太平公主勢震天下百司順望風指嘗與民競碾磑元紘還之民長史竇懷貞大驚趣改之元紘大署判後曰南山可移判不可搖也改好時令遷潤州司馬以辦治得名開元初爲萬年令賦役稱平擢京兆少尹詔決三輔渠時王主權家皆旁渠立磑瀦場爭利元紘敕吏盡毀之分溉渠下田民賴其恩三遷吏部侍郎會戶部楊瑒白知慎坐支調失宜貶刺史帝求可代者公卿多薦元紘帝欲擢爲尙書宰相以資薄乃爲戶部郎條陳利害及政得失帝才之謂可丞輔賜衣一稱絹二百疋明年遂拜中書侍郎同中書門下平章事封清水縣男元紘當國務峻涯檢抑奔競夸進者憚之五月五日宴武成殿賜羣臣襲衣特以紫服金魚錫元紘及蕭嵩羣臣無與比是時廢京司職田議者欲置屯田元紘曰軍國不同中外異制若人閑無役地棄不墾以閑手耕棄地省饋運實軍糧於是屯田其爲益尙矣今百官所廢職田不一縣弗可聚也百姓私田皆力自耕不可取也若置屯卽當公私相易調發丁夫調役則業廢於家免庸則賦闕於國內地爲屯古未有也恐得不補失徒爲煩費遂止初左庶子吳兢爲史官撰唐書及春秋未成以喪解後上書請畢其功詔許就集賢院成書張說致仕詔在家修史元紘因言國史記人君善惡王政損益褒貶所

繫前聖尤重今國大典分散不一且太宗別置史館禁中所以祕嚴之也請勒說以書就館參會撰錄詔可後與杜暹不協數辨爭帝前帝不憚皆罷之以元紘爲曹州刺史徙蒲州引疾去後以戶部尙書致仕復起爲太子詹事卒贈太子少傅諡曰文忠元紘再世宰相有清節其當國累年未嘗改治第宅僮馬敝弱得封物賜給親族宋璟嘗歎曰李公引宋遙之美黜劉冕之貪爲國相家無留儲雖季文子之德何以加之

杜暹濮州濮陽人父承志武后時爲監察御史懷州刺史李文暕爲人所告詔承志推驗無實文暕宗室近屬也卒得罪承志貶爲方義令遷天官員外郎暹羅獄興移疾去卒于家自高祖至暹五世同居暹尤恭謹事繼母孝擢明經第補婺州參軍秩滿歸吏以紙萬番贖之暹爲受百番衆歎曰昔清吏受一大錢何異哉爲鄭尉復以清節顯華州司馬楊孚公挺人也每咨重暹會乎遷大理正暹適以累當坐孚曰使若人得罪衆安勸乎以狀言執政絲是擢爲大理評事開元四年以監察御史覆屯磧西會安西副都護郭虔瓘與西突厥可汗阿史那獻鎮守使劉遐慶更相訟詔暹卽按入突騎施帳究索左驗虜以金遺暹暹固辭左右曰公使絕域不可失戎心乃受焉陰埋幕下已出境乃移文畀取之突厥大驚度磧追不及去遷給事中以母喪解會安西都護張孝嵩遷太原尹或言暹往使安西虜伏其清今猶慕思乃奪服

拜黃門侍郎兼安西副大都護明年于闐王尉遲朮約突厥諸國叛暹覺其謀發兵計斬之支黨悉誅更立君長于闐遂安以功加光祿大夫守邊四年撫戎練士能自勤勵爲夷夏所樂十四年召同中書門下平章事遣中使往迎謁見賜絹二百馬一匹第一區與李元紘輕重不得罷爲荊州都督長史歷魏州刺史太原尹帝幸北都進戶部尚書許扈蹕還復東幸以暹爲京留守暹率當番衛士繕三宮城浚池督役不少懈帝聞嘉之數賜書褒勞進禮部尚書封魏縣侯二十八年卒贈尚書右丞相遣使護喪禁中出絹三百匹賜之太常諡曰貞肅右司員外郎劉同昇等以暹行忠孝諡有未盡博士裴總謂暹往以墨衰受命安西雖勤勞于國不得盡孝其子列訴帝更敕有司考定卒諡貞孝暹友愛撫異母弟昱甚厚其爲人少學術故當朝議論時時失淺薄然能以公清勤約自將豐豐爲之自弱冠誓不通親友獻遺以終身既卒尚書省及故吏致贈其子孝友一不受以行暹素志云暹族子鴻漸

鴻漸字之選父鵬舉與盧藏用隱白鹿山以母疾與崔沔同授醫蘭陵蕭亮遂窮其術歷右拾遺玄宗東行河因游畋上賦以風終安州刺史鴻漸第進士解褐延王府參軍安思順表爲朔方判官祿山亂皇太子按軍平涼未知所適議出蕭關趣豐安鴻漸與六城水運使魏少游節度判官崔漪支度判官盧簡金關內鹽池判官李涵謀曰胡羯亂常二京覆沒太子治兵平涼然散地難恃也今朔方制勝之會若奉迎

太子西詔河隴北結回紇回紇固與國收其勁騎與大兵合鼓而南雪社稷之恥不亦易乎卽具上兵馬招輯之勢且錄軍資器械儲詹凡最使涵詣平涼見太子太子大悅會裴冕至自河西亦勸之朔方而鴻漸與漪至白草頓迎謁說曰朔方天下勁兵靈州用武地今回紇請和吐蕃結附天下列城堅守以待王命縱爲賊據日夜望官軍以圖收復殿下治兵長驅逆胡不足滅也太子喜曰靈武我之關中卿乃吾蕭何也旣至靈武鴻漸卽與冕等勸卽皇帝位以係中外望六請見聽鴻漸明習朝章採舊儀設壇壝城南先一日草其儀上之太子曰聖皇在遠寇逆方結宜罷壇場它如奏太子卽位是爲肅宗授鴻漸兵部郎中知中書舍人事俄爲武部侍郎遷河西節度使兩京平又節度荆南乾元二年襄州大將康楚元等反刺史王政脫身走楚元僞稱南楚霸王因襲荊州鴻漸棄城遁人皆南奔爭舟溺死者甚衆禮朗復郢州州聞鴻漸出皆竄伏山谷俄而商州刺史韋倫平其亂久之乃召鴻漸爲尚書右丞太常卿充禮儀使奉建二陵制度皆鴻漸綜正以優封衛國公又建言周官凶荒殺禮今承大亂民人夷殘其婚葬鹵簿非於國有大功及二等以上親皆不許給詔可代宗廣德二年以兵部侍郎同中書門下平章事尋進中書侍郎崔旰殺郭英乂據成都邛州牙將柏貞節瀘州牙將楊子琳劍州牙將李昌巖以兵討旰蜀劍大亂命鴻漸以宰相兼成都尹山南西道劍南東川副元帥劍南西川節度副大使往鎮撫之鴻漸性畏怯無它

遭略而晚節溺浮圖道畏殺戮及逾劍門懲艾張獻誠敗且憚旣雄武先許以不死旣見禮遇之不敢加譙責反委以政日與從事杜亞楊炎縱酒高會因薦旣爲成都尹而授貞節邛州刺史子琳瀘州刺史各罷兵乃請入朝許之及見帝盛言旣威略可任宜爲留後獻寶器五牀羅錦十五牀麝臍五石復輔政議者疾其長亂進門下侍郎大歷三年兼東都留守河南淮西山南東道副元帥辭疾不行又讓山南劍南副元帥聽之四年疾甚辭宰相罷三日卒年六十一贈太尉諡曰文憲鴻漸自蜀還食干僧以爲有報摺紳效之病甚令僧剔頂髮遺命依浮圖葬不爲封樹

張九齡字子壽韶州曲江人七歲知屬文十三以書干廣州刺史王方慶方慶歎曰是必致遠會張說謫嶺南一見厚遇之居父喪哀毀廷中木連理擢進士始調校書郎以道侔伊呂科策高第爲左拾遺時玄宗卽位未郊見九齡建言天百神之君王所由受命也自古繼統之主必有郊配蓋敬天命報所受也不以德澤未洽年穀未登而闕其禮昔者周公郊祀后稷以配天謂成王幼沖周公居攝猶用其禮明不可廢也漢丞相匡衡曰帝王之事莫重乎郊祀董仲舒亦言不郊而祭山川失祭之序逆於禮故春秋非之臣謂衡仲舒古之知禮皆以郊之祭所宜先也陛下紹休聖緒于今五載而未行大報考之于經義或未通今百穀嘉生鳥獸咸若夷狄內附兵革用弭乃怠於事天恐不可以訓願以迎日之至升紫壇陳采

席定天位則聖典無遺矣又言乖政之氣發爲水旱天道雖遠其應甚邇昔東海枉殺孝婦天旱久之吏不明匹婦非命則天昭其冤況六合元元之衆縣命於縣令宅生於刺史陛下所與共治尤親於人者乎若非其任水旱之繇豈唯一婦而已今刺史京輔雄望之郡猶少擇之江淮隴蜀三河大府之外稍非其人繇京官出者或身有累或政無狀用牧守之任爲斥逐之地或因附會以忝高位及勢衰謂之不稱京職出以爲州武夫流外積資而得不計於才刺史乃爾縣令尙可言哉毗庶國家之本務本之職乃爲好進者所輕承弊之民遭不肖所擾聖化從此銷鬱繇不選親人以成其敝也古者刺史入爲三公郎官出宰百里今朝廷士入而不出其於計私甚自得也京師衣冠所聚身名所出從容附會不勤而成是大利在於內而不在於外也智能之士欲利之心安肯復出爲刺史縣令哉國家賴智能以治而常無親人者陛下不革以法故也臣愚謂欲治之本莫若重守令守令旣重則能者可行宜遂科定其資凡不歷都督刺史雖有高第不得任侍郎列卿不歷縣令雖有善政不得任臺郎給舍都督守令雖遠者使無十年任外如不爲此而救其失恐天下猶未治也又古之選士惟取稱職是以士修素行而不爲僥幸姦僞自止流品不雜今天下不必治於上古而事務日倍於前誠以不正其本而設巧於末也所謂末者吏部條章舉羸千百刀筆之人溺於文墨巧史猾徒緣姦而奮臣以謂始造簿書備遺忘耳今反求精於案牘而

忽於人才是所謂遺劍中流鏤舟以記者也凡稱吏部能者則曰自尉與主簿繇主簿與丞此執文而知官次者也乃不論其賢不肖豈不謬哉夫吏部尚書侍郎以賢而授者也豈不能知人如知之難拔十得五斯可矣今膠以格條據資配職爲官擇人初無此意故時人有平配之謂官曹無得賢之實臣謂選部之法敝於不變今若刺史縣令精覈其人則管內歲當選者使考才行可入流品然後送臺又加擇焉以所用衆寡爲州縣殿最則州縣慎所舉可官之才多吏部因其成無庸人之繁案今歲選乃萬計京師米物爲耗豈多士哉蓋冒濫抵此爾方以一詩不判定其是非適使賢人遺逸此明代之闕政也天下雖廣朝廷雖衆必使毀譽相亂聽受不明事則已矣如其賢能各有品第每一官缺不以次用之豈不可乎如諸司要官以下等叨進是議無高卑唯得與不爾政清議不立而名節不修善士守志而後時中人進求而易操也朝廷能以合名進人士亦有修名獲利之出家之趨也不如此則小者得於苟求一變而至阿私大者許以分義再變而成朋黨矣故用人不可不第其高下高下有次則不可以妄干天下之士必刻意修飾而刑政自清此興衰之大端也俄選左補闕九齡有才鑒吏部試拔萃與舉者常與右拾遺趙冬曦考次號稱詳平改司勳外員郎時張說爲宰相親重之與通譜系常曰後出詞人之冠也遷中書舍人內供奉封曲江男進中書舍人會帝封泰山說多引兩省錄事主書及所親攝官升山超階至五品

九齡當草詔謂說曰官爵者天下公器先德望後勞舊今登封告成千載之絕典而清流隔於殊恩胥史乃濫章鞞恐制出四方失望方進草尙可以改公宜審計說曰事已決矣悠悠之言不足慮既而果得謗御史中丞宇文融方事田法有所關奏說輒建議違之融積不平九齡爲言說不聽俄爲融等痛詆幾不免九齡亦改太常少卿出爲冀州刺史以母不肯去鄉里故表換洪州都督徙桂州兼嶺南按察選補使始說知集賢院嘗薦九齡可備顧問說卒天子思其言召爲祕書少監集賢院學士知院事會賜渤海詔而書命無足爲者乃召九齡爲之被詔趣成遷工部侍郎知制誥數乞歸養詔不許以其弟九舉九章爲嶺南刺史歲時聽給驛省家遷中書侍郎以母喪解毀不勝哀有紫芝產坐側白鳩白雀巢家樹是歲奪哀拜中書侍郎同中書門下平章事固辭不許明年遷中書令始議河南開水屯兼河南稻田使上言廢循資格復置十道採訪使李林甫無學術見九齡文雅爲帝知內忌之會范陽節度使張守珪以斬可突干功帝欲以爲侍中九齡曰宰相代天治物有其人然後授不可以賞功國家之敗由官邪也帝曰假其名若何對曰名器不可假也有如平東北二虜陛下何以加之遂止又將以涼州都督牛仙客爲尚書九齡執曰不可尚書古納言唐家多用舊相不然歷內外貴任妙有德望者爲之仙客河湟一使典耳使班常伯天下其謂何又欲賜實封九齡曰漢法非有功不封唐遵漢法太宗之制也邊將積穀帛繕器械適

所職耳陛下必賞之金帛可也獨不宜裂地以封帝怒曰豈以仙客寒士嫌之邪卿固素有門閥哉九齡頓首曰臣荒陬孤生陛下過聽以文學用臣仙客擢胥史目不知書韓信淮陰一壯夫羞絳灌等列陛下必用仙客臣實恥之帝不悅翌日林甫進曰仙客宰相材也乃不堪尚書邪九齡文史拘古義失大體帝由是決用仙客不疑九齡既戾帝旨固內懼恐遂爲林甫所危因帝賜白羽扇乃獻賦自況其末曰苟効用之得所雖殺身而何忌又曰縱秋氣之移奪終感恩於篋中帝雖優答然卒以尚書右丞相罷政事而用仙客自是朝廷士大夫持祿養恩矣嘗薦長安尉周子諒爲監察御史子諒劾奏仙客其語援讖書帝怒杖子諒于朝堂流瀼州死於道九齡坐舉非其人貶荊州長史雖以直道黜不戚戚冀望惟文史自娛朝廷許其勝流久之封始興縣伯請還展墓病卒年六十八贈荊州大都督諡曰文獻九齡體弱有醜藉故事公卿皆撻笏于帶而後乘馬九齡獨常使人持之因設笏囊自九齡始後帝每用人必曰風度能若九齡乎初千秋節王公並獻寶鑑九齡上事鑿十章號千秋金鑑錄以伸諷諭與嚴挺之袁仁敬梁昇卿盧怡善世稱其交能終始者及爲相諤諤有大臣節當是時帝在位久稍怠於政故九齡議論必極言得失所推引皆正人武惠妃謀陷太子瑛九齡執不可妃密遣宦奴牛貴兒告之曰廢必有興公爲援宰相可長處九齡叱曰房幄安有外言哉遽奏之帝爲動色故卒九齡相而太子無患安祿山初以范陽偏校

入奏氣驕蹇九齡謂裴光庭曰亂幽州者此胡雛也及討奚契丹敗張守珪執如京師九齡署其狀曰纓首出師而誅莊賈孫武習戰猶戮宮嬪守珪法行于軍祿山不容免死帝不許赦之九齡曰祿山狼子野心有逆相宜卽事誅之以絕後患帝曰卿無以王衍知石勒而害忠良卒不用帝後在蜀思其忠爲泣下且遣使祭於韶州厚幣卹其家開元後天下稱曰曲江公而不名云建中元年德宗賢其風烈復贈司徒子拯居父喪有節行後爲伊闕令會祿山盜河洛陷焉而終不受僞官賊平擢太子贊善大夫九齡弟九舉亦有名終嶺南節度使其曾孫仲方

仲方生岐秀父友高郢見異之曰是兒必爲國器使吾得位將振起之貞元中擢進士宏辭爲集賢校理以母喪免會郢拜御史大夫表爲御史進累倉部員外郎會呂溫等以劾奏宰相李吉甫不實坐斥去仲方以溫黨補金州刺史宦人奪民田仲方三疏申理卒與民直入爲度支郎中吉甫卒太常諡恭懿博士尉遲汾請諡敬憲仲方挾前怨未已因上議曰古之諡考大節略細行善善惡惡一言而足按吉甫雖多才多藝而側媚取容疊致台衮寡信易謀事無成功且兵凶器不可從我始至以伐罪則邀必成功今內有賊輔臣之盜外有懷毒蠱之臣師徒暴野農不得在晦婦不得在桑耗賦殫畜尸僵血流紫幣成岳毒痛之痛訴天無辜階禍之發寔始吉甫又言吉甫平易柔寬名不配行請俟蔡平然後議之憲宗方用兵

疾其言醜訐貶爲遂州司馬稍進河南少尹鄭州刺史敬宗立李程輔政引爲諫議大夫帝時詔王播造競渡舟三十艘度用半歲運費仲方見延英論諍堅苦帝爲減三之二又詔幸華清宮仲方曰萬乘之行必具葆衛易則失威重不從猶見慰勞郭令崔發以辱黃門繫獄逢赦不見宥仲方曰恩被天下流昆蟲而不行御前乎發繇是不死大和初出爲福建觀察使召還進至左散騎常侍李德裕秉政以太子賓客分司東都德裕罷復拜常侍李訓之變大臣或誅或繫翌日羣臣謁宣政牙闥不啟羣臣錯立朝堂無史卒贊候久乃半扉啟使者傳召仲方曰有詔可京兆尹然後門關喚仗于時族夷將相體足旁午仲方皆密使識其尸俄許收葬故骸不相亂已而禁軍橫多撓政仲方勢窄不能有所繩劾宰相鄭覃更以薛元賞代之出爲華州刺史召入授祕書監人頗言覃助德裕擯仲方不用覃乃擬丞郎以聞文宗曰侍郎朝廷華選彼牧守無狀不可得但封曲江縣伯卒七十二贈禮部尚書諡曰成仲方確正有風節既駁吉甫諡世不直其言卒不至顯既歿人多傷之始高祖仕隋時太宗方幼而病爲刻玉像於熒陽佛祠以祈年久而剗晦仲方在鄭敕吏治鑿石以聞傳于時

韓休京兆長安人父大智洛州司功參軍其兄大敏仕武后爲鳳閣舍人梁州都督李行褒爲部人告變詔大敏鞠治或曰行褒諸李近屬后意欲去之無列其冤恐累公大敏曰豈顧身枉人以死乎至則驗出

之后怒遣御史覆按卒殺行褒而大敏賜死于家休工文辭舉賢良玄宗在東宮令條對國政與校書郎趙冬曦並中乙科擢左補闕判主簿員外郎進至禮部侍郎知制誥出爲虢州刺史號於東西京爲近州乘輿所至常稅廩芻休請均賦它郡中書令張說曰免號而與它州此守臣爲私惠耳休復執論吏白恐忤宰相意休曰刺史幸知民之敝而不救豈爲政哉雖得罪所甘心焉訖如休請以母喪解服除爲工部侍郎知制誥遷尚書右丞侍中裴光庭卒帝敕蕭嵩舉所以代者嵩稱休志行遂拜黃門侍郎同中書門下平章事休直方不務進趨旣爲相天下翕然宜之萬年尉李美玉有罪帝將放嶺南休曰尉小官犯非大惡今朝廷有大姦請得先治金吾大將軍程伯獻恃恩而貪室宅輿馬僭法度臣請先伯獻後美玉帝不許休固爭曰罪細且不容巨猾乃置不問陛下不出伯獻臣不敢奉詔帝不能奪大率堅正類此初嵩以休柔易故薦之休臨事或折正嵩嵩不能平宋璟聞之曰不意休能爾仁者之勇也嵩寬博多可休峭鯁時政所得失言之未嘗不盡帝嘗獵苑中或大張樂稍過老必視左右曰韓休知否已而疏輒至嘗引鑑默不樂左右曰自韓休入朝陛下無一日歡何自戚戚不逐去之帝曰吾雖瘠天下肥矣且蕭嵩每啟事必順旨我退而思天下不安寢韓休敷陳治道多訐直我退而思天下寢必安吾用休社稷計耳後以工部尚書罷遷太子少師封宜陽縣子卒年六十八贈揚州大都督諡曰文忠寶應元年贈太子太師子

浩治洪法混渾洞皆有學尚浩萬年主簿坐籍王鉞家賁有隱入爲尹鮮于仲通所劾流循州洪爲司庫員外郎與法皆以累貶洪後爲華州長史渾大理司直安祿山盜京師皆陷賊賊逼以官浩與洪法混渾出奔將走行在浩洪渾及洪四子復爲賊禽殺之洪善與人交有節義藉甚於時見者爲流涕肅宗以大

臣子能死難詔贈浩吏部郎中洪太常卿渾太常少卿法上元中終諫議大夫治終殿中侍御史

混字太冲以蔭補左威衛騎曹參軍至德初避地山南採訪使李承昭表爲通川郡長史改彭王府諮議參軍初法知制誥當草王璵詔無借言銜之及當國混兄弟皆斥冗官璵罷乃擢殿中侍御史三遷吏部員外郎性彊直明吏事莅南曹五年簿最詳緻再遷給事中知兵部選時盜殺富平令韋當賊隸北軍魚朝恩私其凶奏原死混執處卒伏辜遷右丞知吏部選以戶部侍郎判度支自至德軍興所在賦稅無藝帑司給輸乾隱混檢制吏下及四方輸將犯者痛恨以法會歲數稔兵革少息故儲積數帛稍豐實然覆治案牘深文鉤剝人亦咨怨大曆十二年秋大雨害稼什八京兆尹黎幹言狀混恐有所蠲貸固表不實代宗命御史行視實損田三萬餘頃始渭南令劉藻附混言部田無害御史趙計按驗如藻言帝又遣御史朱敖覆實害田三千頃帝怒曰縣令所以養民而田損不問豈卹隱意邪貶南浦員外尉計亦斥爲豐州司戶員外參軍方是時潦敗河中鹽池混奏池產瑞鹽帝疑遣諫議大夫蔣鎮廉狀鎮畏混還乃賀帝

且請置祠詔號寶應靈應池德宗立惡混摺刻徙太常卿議者不厭乃出爲晉州刺史未幾遷浙江東西觀察使尋檢校禮部尚書爲鎮海軍節度使綏輯百姓均租調不踰年境內稱治帝在奉天淮汴震駭混訓士卒分兵戍河南旣狩梁州又獻縑十萬匹請以鎮兵三萬助討賊有詔嘉勞進檢校尚書右僕射封南陽郡公李希烈陷汴州混遣裨將王棲耀李長榮柏良器以勁卒萬人進討次睢陽而賊已攻盩厔樓耀等破走之漕路無梗完靖東南混功多時里胥有罪輒殺無貸人怪之混曰哀晁本一鞭背史禽賊有負聚其類以反此輩皆鄉縣豪黠不如殺之用年少者惜身保家不爲惡又以賊非牛酒不嘯結乃禁屠牛以絕其謀婺州屬縣有犯令者誅及鄰伍坐死數十百人又遣官分察境內罪涉疑似必誅一判輒數十人下皆愁怖聞京都未平乃閉關梁禁牛馬出境築石頭五城自京口至玉山毀上元道佛祠四十區修塢壁起建業抵京峴樓雉相望以爲朝廷有永嘉南走事置館第數十於石頭城穿井皆百尺命偏將已洿督役日數千人洿虐用其衆朝夕辦先世已塿皆發夷造樓艦三千枕以舟師由海門大閱至甲浦乃還追李長榮等歸以親吏盧復爲宣州刺史增營壘教習長兵毀樓鑄軍器陳少游在揚州以甲士三千臨江大閱混亦總兵臨金山與少游會以金繒相餉酬然混握彊兵遷延不赴難而調發糧帛以濟朝廷者繼屬當時實賴之李晟方屯渭北混運米饋之船置十弩以相警捍賊不能剽始膺船臨江混顧

僚吏曰天子蒙塵臣下之恥也乃自舉一囊將佐爭負之貞元年加檢校左僕射同中書門下平章事
江淮轉運使封鄭國公以繕治石頭城人頗言有窺望意雖帝亦惑之會李泌問關辨數帝意乃解二年
更封晉是歲入朝澁既宿齒先達頗簡倨接新進用事不能滿其意衆怨之獻羨錢五百餘萬緡詔加度
支諸道轉運鹽鐵等使右丞元琇判度支也以關輔早請運江南租米西給京師帝委澁專督之而琇畏
其剛復難共事請自江至揚子澁主之揚子以北自主之澁由是銜琇會琇以京師錢重貨輕發江東鹽
監院錢四十萬緡入關澁給奏運錢至京師率費萬致千不可從帝責謂琇琇曰千錢其重與斗米均費
三百可致帝以諭澁澁執不可至是誣劾琇饋米與淄青李納河中李懷光帝怒不復究驗貶琇雷州司
戶參軍左丞董晉白宰相劉滋齊映曰昨關輔用兵方蝗旱琇不增一賦而軍興皆濟可謂勞臣今被謫
無名刑濫人懼假令權臣逞志公胡不請三司鞫之滋映不能用給事中袁高抗疏申執澁指爲黨與寢
不報劉玄佐不朝帝密詔澁諷之及過汴玄佐素憚澁修屬吏禮澁辭不敢當因結爲兄弟入拜其母置
酒設女樂酒行澁曰宜早見天子不可使夫人白首與新婦子孫填宮掖也玄佐泣悟澁以錢二十萬緡
爲玄佐辦裝又以綾二十萬槁軍玄佐入朝澁薦可任邊事時兩河罷兵澁上言吐蕃盜河湟久近歲饑
鴈而西迫大食北抗回鶻東抗南詔分軍外戰兵在河隴者不過五六萬若朝廷命將以十萬衆城涼鄯

洮渭各置兵二萬爲守禦臣請以本道財賦饋軍給三年費然後營田積粟且耕且戰則河隴之地可翹
足而復帝善其言因訪玄佐玄佐請行會澁病甚張延賞奏減州縣冗官收祿俸募戰士西討玄佐慮延
賞斬削資儲辭犬戎未讐不可輕進因稱疾帝遣中人勞問臥受命延賞知不可用乃止澁尋卒年六十
五贈太傅諡曰忠肅澁雖宰相子性節儉衣裘茵祗十年一易甚暑不執扇居處陋薄取庇風雨當門列
戟以父時第門不忍壞乃不請堂先無挾廡弟洞稍增補之澁見卽徹去曰先君容焉吾等奉之常恐失
墜若摧圯繕之則已安敢改作以傷儉德居重位清潔疾惡不爲家人資產自始仕至將相乘五馬無不
終櫪下好鼓琴書得張旭筆法畫與宗人幹相埒嘗自言不能定筆不可論書畫以非急務故自晦不傳
於人善治易春秋著通例及天文事序議各一篇初判度支李晟以裨將白軍事澁待之加禮使其子拜
之厚遺器幣鞍馬後晟終立大功澁幼時已有美名所與游皆天下豪俊晚節益苛謬故論者疑其飾情
希進旣得志則疆肆蓋自其性云子羣羣終國子司業

臯字仲聞資質重厚有大臣器由雲陽尉策賢良方正異等拜右拾遺累遷考功員外郎父喪德宗遣使
弔問俾論議澁行事號泣承命立草數千言以進帝嘉之服除宰相疑考功郎中帝爲加知制誥遷中書
會人御史中丞兵部侍郎號稱職俄拜京兆尹奏署鄧鋒爲倉曹參軍鋒苛斂吏乃說臯悉索府中雜錢

折糶粟麥三十萬石獻於帝，阜悅之，奏爲興平。貞元十四年，大旱，民請蠲租賦，阜府帑已空，內憂恐，奏不敢實。會中人出入百姓，遮道訴之事，聞貶撫州員外司馬。未幾，改杭州刺史，入拜尚書右丞。王叔文用事，阜嫉之，謂人曰：「吾不能事新貴，從弟暉以告叔文，叔文怒，出爲鄂岳蕪沔觀察使，叔文敗，卽拜節度使，徙鎮海，入爲戶部尚書，歷東都留守，忠武軍節度使，大抵以簡儉治所。至有績，召拜吏部尚書，兼太子少傅。莊憲太后崩，充大明宮留守，穆宗以舊傳恩，加檢校尚書右僕射，俄爲真，又進左僕射。長慶四年，復爲東都留守，卒於道。年七十九。贈太子太保，諡曰貞。阜貌類父，既孤，不復視鑑，生知音，律常曰：「長年後，不願聽樂，以門內事多，逆知之，聞鼓琴，至止息，歎曰：「美哉嵇康之爲是曲，其當晉魏之際乎？」其音主商，商爲秋，秋者天將搖落，肅殺其歲之晏乎？晉乘金運，商又金聲，此所以知魏方季而晉將代也。緩其商絃，與宮同音，臣奪君之義，知司馬氏之將篡也。王陵母，巨儉，文欽諸葛誕，繼爲揚州都督，咸有興復之謀，皆爲司馬懿父子所殺。康以揚州故，廣陵地，陵等皆魏大臣，故名其曲曰「廣陵散」。言魏散亡，自廣陵始，止息者，晉雖暴興，終止息於此，其哀憤躁感，懣痛迫脅之音，盡於是矣。永嘉之亂，其兆乎康避晉魏之禍，託以鬼神以俟後世知音云。」

涇字幼深，蔭補弘文生，滿歲參調吏部侍郎，達奚珣以地望抑之，除章懷太子陵令，無愠容。安祿山亂，家

七人遇害，涇避難江南，蔬食不聽樂。乾元中，授睦州別駕，劉晏表爲屯田員外郎，知揚子留後，召拜諫議大夫，與補闕李翰數上章，言得失，擢知制誥，坐與元載善，貶邵州司戶參軍。德宗卽位，起爲淮南黜陟使，復爲諫議大夫，晏被罪，天下錢穀歸尚書省，而省司廢久，無綱紀，莫總其任，乃擢涇戶部侍郎，判度支。涇上言：「江淮七監歲鑄錢四萬五千緡，輸京師，工用運轉，每緡度二千，是本倍於子。今商州紅崖冶產銅而洛源監久廢，請鑿山取銅，卽冶，舊監置十鑪，鑄之，歲得錢七萬二千緡，度費每緡九百，則得可浮本矣。江淮七監請皆罷，又言：「天下銅鐵冶，乃山澤利，當歸王者，請悉隸鹽鐵使從之，復罷省胥史冗食二千人，積米長安萬年二縣各數十萬石，視年豐耗而發，歛焉。故人不艱食，涇與楊炎善，炎得罪，不自安，無何，阜上疏理炎罪，帝意涇教之，貶蜀州刺史。興元元年，入爲兵部侍郎，轉京兆尹。貞元十年，終國子祭酒，贈戶部尚書。」

贊曰：人之立事，無不銳始而工於初，至其半則稍怠，卒而漫漶不振也。觀玄宗開元時，厲精求治，元老魁舊動所尊，憚故姚元崇、宋璟言聽計行，力不難而功已成。及太平久，左右大臣皆帝自識，擢狎而易之，志滿意驕，而張九齡爭愈切，言益不聽。夫志滿則忽其所謀，意驕則樂軟熟，憎顛切較力，雖多課所効不及姚宋遠矣。終之胡雛亂華，身播邊陲，非曰天運亦人事有致而然。若知古等皆宰相，選使當天寶時，庸能

有救哉

唐書卷一百二十六

唐書卷一百二十六考證

盧懷慎子奐前守劉巨麟彭杲皆以賊敗○舊書作劉巨鱗彭杲

杜暹子鴻漸鴻漸即與冕等勸即皇帝位以係中外望六請見聽○舊書五上表乃從綱目亦作賡五上太子乃許之

張九齡傳以道倖伊呂科策高第為左拾遺○舊書作右拾遺

子拯居父喪有節行○舊書子名極

韓休傳遷太子少師○本紀作太子少保

休子湜造樓艦三千艘○舊書造樓船戰艦三十餘艘

休孫臯長慶四年復為東都留守卒于道○舊書作二年卒

唐書卷一百二十七

宋 端 明 殿 學 士 宋 祁 撰

列傳第五十二

張源裴

張嘉貞字嘉貞本范陽舊姓高祖子吒仕隋終河東郡丞遂家蒲州為猗氏人以五經舉補平鄉尉坐事免長安中御史張循憲使河東事有未決病之問吏曰若頗知有佳客乎吏以嘉貞對循憲召見咨以事嘉貞條析理分莫不洗然循憲大驚試命草奏皆意所未及它日武后以為能循憲對皆嘉貞所為因請以官讓后曰朕寧無一官自進賢邪召嘉貞見內殿以簾自鄣嘉貞儀止秀偉奏對侃侃后異之因請曰臣草茅之人未覩朝廷儀陛下過聽引對禁近今天威咫尺若隔雲霧恐君臣之道有未盡也后曰善詔上簾引拜監察御史擢循憲司勳郎中疇其得人累遷兵部員外郎時功狀盈几郎吏不能決嘉貞為詳處不聞旬廷無稽牒進中書舍人歷梁秦二州都督并州長史政以嚴辦吏下畏之奏事京師玄宗善其政數慰勞嘉貞自陳少孤與弟嘉祐相恃以長今為鄴州別駕願內徙使少相近冀盡力報死無恨帝為徙嘉祐忻州刺史突厥九姓新內屬雜處大原北嘉貞請置天兵軍綏護其眾即以爲天兵使明年入朝

或告其反按無狀帝令坐告者嘉貞辭曰國之重兵利器皆在邊今告者一不當卽罪之臣恐塞言路且爲未來之患昔天子聽政於上賧賦矇誦百工諫庶人謗今將坐之則後無繇聞天下事遂得減死天子以爲忠且許以相嘉貞因曰昔馬周起徒步謁人主血氣方壯太宗用之能盡其才甫五十而沒向使用少晚則無及已陛下不以臣不肖必用之要及其時後衰無能爲也且百年壽孰爲至者臣常恐先朝露死溝壑誠得効萬一無負陛下足矣帝曰第往行召卿及宋璟等罷帝欲果用嘉貞而忘其名夜詔中書侍郎韋抗曰朕嘗記其風操而今爲北方大將張姓而複名卿爲我思之抗曰非張齊丘乎今爲朔方節度使帝卽使作詔以爲相夜且半因閣大臣表疏舉一則嘉貞所獻遂得其名卽以爲中書侍郎同中書門下平章事遷中書令居位二年善傳奏敏於裁遣然彊躁論者恨其不裕帝數幸東都洛陽主簿王鈞者爲嘉貞繕第會以賊聞有詔杖之朝堂嘉貞畏巖染促有司速斃以滅言祕書監姜皎得罪嘉貞希權幸意請加詔杖已而皎死會廣州都督裴仙先抵罪帝問法如何嘉貞復援皎比張說曰不然刑不上大夫以近君也士可殺不可辱向皎得罪官三品且有功若罪應死卽殺獨不宜廷辱以卒伍待也況勳貴在八議乎事往不可咎仙先豈容復濫哉帝然之嘉貞退不悅曰言太切說曰宰相時來則爲非可長保若貴臣盡杖正恐吾輩及之渠不爲天下士君子地乎初嘉貞在兵部而說已爲侍郎及皆相說位其下

議論無所讓故說不平未幾嘉祐拜金吾將軍兄弟要近人頗憚媚帝幸太原嘉祐以賊聞說誅嘉貞素服待罪不謁遂出爲幽州刺史說代其處嘉貞銜悔謂人曰中書令幸二員何相迫邪踰年爲戶部尙書益州長史判都督事詔宴中書省與宰相會嘉貞銜說不已於坐慢罵說源乾曜王峻共平解乃得去明年王守一死坐與厚善貶台州刺史俄拜工部尙書爲定州刺史知北平軍事封河東侯及行帝賦詩詔百官祖道上東門久之以疾丐還東都詔醫馳驛護視卒年六十四贈益州大都督諡曰恭肅嘉貞性簡疏與人不疑內曠如也或時以此失有嗜進者汲引之能以恩終始所薦中書舍人苗延嗣呂太一考功員外郎員嘉靜殿中侍御史崔訓皆位清要日與議政事故當時語曰令君四俊苗呂崔員其始爲中書舍人崔湜輕之後與議事正出其上湜驚曰此終其坐後十年而爲中書令嘉貞雖貴不立田園有勸之者答曰吾嘗相國矣未死豈有飢寒憂若以譴去雖富田產猶不能有也近世士大夫務廣田宅爲不肖子酒色費我無是也引萬年主簿韓朝宗爲御史卒後十餘歲朝宗以京兆尹見帝曰陛下待宰相進退皆以禮身雖沒子孫咸在廷張嘉貞晚一息寶符獨未官帝憫然召拜左司禦率府兵曹參軍賜名曰延賞

延賞雖蚤孤而博涉經史通吏治苗管卿尤器許以女妻之肅宗在鳳翔擢監察御史辟署關內節度使

王思禮府思禮守北都表爲副入遷刑部郎中始元載被用以晉卿力故厚遇廷賞薦爲給事中御史中丞大厯初除河南尹諸道營田副使河洛當兵衝邑里墟榛延賞政簡約輕徭賦疏河渠築宮廟數年流庸歸附都闕完雒有詔褒美時罷河南山南等副元帥兵屯東都詔延賞知留守以兵屬居五年治行第一召還會李少良劾元載陰罪載斥其狂下御史臺治訊而延賞適拜大夫不滿所私出爲淮南節度使歲旱民宅遷吏禁之延賞曰食者人恃以活拘此而斃不如適彼而生苟存吾人何限爲乃具舟遣之敕吏爲修室廬已逋債而歸者更增於舊瓜步舟艫湊湊而遙繫江南延賞請度屬揚州自是行無稽壅會毋喪免服除累拜荆南劍南西川節度使建中中西山兵馬使張拙襲成都爲亂延賞奔鹿頭戍拙酣亂不設備延賞諜知之遣將叱于遂捕斬拙復成都自揚國忠討南蠻三蜀疲罄及乘輿臨狩糜用百出後更郭英父崔靈楊子琳亂益矜僭公私蕭然延賞事爲之制薄入謹出府庫遂實德宗在奉天貢獻踵道及次梁倚劍蜀爲根本卽拜中書侍郎同中書門下平章事帝還詔入秉政初吐蕃寇劍南李晟總神策軍戍之及還以成都倡自隨延賞遣吏奪取故晟銜之至是鎮鳳翔帝所倚重表陳宿憾帝不得已罷延賞爲尚書左僕射然雅意決用之以晟嘗爲韓滉讖擢命滉移書道意及俱入朝滉從容邀晟平憾且使薦延賞於帝於是復拜平章事旣而宴禁中帝出瑞錦一端分繫之以示和解晟因爲子請婚延賞不許

晟曰吾武夫雖有舊惡盃酒間可解儒者難犯外睦而內含怒今不許婚譽未忘也先時吐蕃尙結贊請和晟奏戎狄無信不可許滉亦請調軍食時邊無聽和帝疑將帥邀功生事議未決會滉卒延賞揣帝意遂罷晟兵奏以給事中鄭雲逵代之帝曰晟有社稷功俾自擇代者乃用邢君牙而拜晟太尉兼中書令奉朝請是夏吐蕃背約劫渾瑊將校多沒如晟等策故事臨軒冊拜三公中書令讀冊侍中贊禮或闕則宰相攝事晟嘗拜而延賞薄其禮用尙書崔漢衡劉滋代攝時議遣劉玄佐復河湟延賞因建言今官繁費廣州縣殘困宜并省其員悉收粟料糧課輸京師賞戰士帝許之卽詔上州留上佐錄事參軍司戶司兵司士各一員餘參軍留半中州減司士上縣令尉具中縣省尉京兆河南府司錄判官赤縣丞簿尉各省半餘府準上州詔下內外始怨玄佐辭西討延賞更用李抱真抱真怨延賞奪晟兵不肯行由是功臣解體是年除吏千五百員當省者千餘道路謗浸淫聞於上延賞懼請詔州縣或者先滿或攝掌過停限而官見乏者聽在所擇省員有幹譽者權補以才不以資而大臣馬燧白志貞韋倫表言省官太甚不可行會延賞疾困不能事宰相李泌一切奏復卒年六十一贈太保諡曰成肅延賞更四鎮所至民頌其愛及當國飾情復怨不稱所望亦早不幸未及有所建明然帝待遇厚稱其奏議有宰相體專屬以吏事而以軍食委李泌刑法委柳渾時以爲任職子弘靖

弘靖字元理雅厚信直以蔭爲河南參軍杜亞辟佐其府亞疑牙將令狐運劫餉絹弘靖直其枉亞怒斥出府裴延齡爲德陽公主治第欲徙弘靖先廟上疏自言德宗異之權監察御史累遷戶部侍郎陝州觀察使徙河中節度使元和中拜刑部尚書同中書門下平章事吳少陽死其子元濟擅總留務憲宗欲誅之弘靖請先遣使者弔贈待不恭乃加兵詔可進中書侍郎封高平縣侯武元衡遇害賊未得王承宗邸廨卒張宴被告詔付御史臺劾驗有狀弘靖疑御史傳致宴罪言之帝不聽遂誅宴并討承宗弘靖曰戎事並興鮮有濟不如悉力淮西已平乃治河朔議再迁乃歸政以檢校吏部尚書同平章事爲河東節度使未及鎮詔伐承宗弘靖自以諫不聽思自効乃大閱兵請身討賊詔許出軍無親往既王師無功帝憶曩言下詔褒美弘靖亦遣使間道喻承宗承宗款附召拜吏部尚書徙節宣武宣武承韓弘虐政代以寬簡民便安之長慶初劉總舉所部內屬請弘靖爲代進檢校司空仍同中書門下平章事充盧龍節度使始入幽州老幼夾道觀河朔舊將與士卒均寒暑無障蓋安與弘靖素貴肩輿而行人駭異俗謂祿山思明爲二聖弘靖懲始亂欲變其俗乃發墓毀棺衆滋不悅旬一決事賓客將吏罕聞其言委成於參佐韋雍張宗厚又不通大體腴刻軍賜專以法根治之官屬輕佻酣肆夜歸燭火滿街前後呵止其誅責士皆曰反虜嘗曰天下無事而輩挽兩石弓不如識一丁字軍中以氣自任銜之朝詔以錢百萬緡資將

士弘靖取二十萬市府雜費有怨言會雍欲鞭小將薊人未嘗更笞辱不伏弘靖繫之是夕軍亂囚弘靖薊門館掠其家貲婢妾執雍等殺之判官張澈始就職得不殺與弘靖同被囚會詔使至澈謂弘靖曰公無負此土人今天子使至可因見衆辨幸得脫歸即推門求出衆畏其謀欲遷別館澈大罵曰汝何敢反前日吳元濟斬東市李師道斬軍中同惡者父母妻子肉飽狗鼠鴟鵂衆怒擊殺之數日吏卒稍自悔詣館謝弘靖願革心事之三請不對衆曰公不赦我矣軍中可一日無帥乎遂取朱克融主留後詔貶弘靖太子賓客分司東都再貶吉州刺史明年出幽州改撫州刺史稍遷太子少師卒年六十五贈太子太保弘靖少有令問杜鴻漸杜佑皆器許歷臺閣顯級人以爲有輔相才及居位簡默自處無所規拂幽薊初效順不能因俗制變故范陽復亂家聚書畫俸祕府先第在東都思順里盛麗甲當時歷五世無所增葺時號三相張家云子文規次宗裴度秉政引文規爲右補闕度出襄陽貶温令度奏置幕府累轉吏部員外郎右丞韋温劾文規父昔被囚逗留不赴難不宜任省署出爲安州刺史終桂管觀察使子彥遠博學有文辭乾符中至大理卿次宗開成初爲起居舍人文宗始詔左右史立螭頭下記宰相奏對既退帝召見審正是非故開成時事爲最詳以稱職兼集賢院直學士文規左遷改國子博士史館脩撰李德裕再當國引爲考功員外郎知制誥出澧明二州刺史卒孫茂樞字休府及進士第天祐中累遷祠部郎中知

制誥坐柳環事貶博昌尉嘉祐弟有幹略方嘉貞為相時任右金吾衛將軍昆弟每上朝軒蓋導
盈閭巷時號所居坊曰鳴珂里後貶浦陽府折衝開元末為相州刺史舊刺史多死官眾疑畏嘉祐以周
總管尉遲迴死國難忠臣也立祠房解板眾心三歲入為左金吾將軍後吳兢為刺史又加神冕服遂無
患

源乾曜相州臨漳人祖師民隋刑部侍郎父直心高宗時太常伯沈死嶺南乾曜第進士神龍中以殿中
侍御史黜陟江東奏課最頻遷諫議大夫景雲後公卿百官上巳九日廢射禮乾曜以為聖王教天下必
制禮以正人情君子三年不為禮禮必壞三年不為樂樂必崩古之擇士先觀射禮非取一時樂也夫射
者別邪正觀德行中祭祀辟寇戎古先哲王莫不遞襲比年以來射禮不講所司恡費而舊典為虧巨愚
謂所計者財所虧者禮故孔子不愛羊而存禮也大射謂春秋不可廢開元初邠王府吏犯法玄宗敕左
右為王求才長史太常卿姜皎薦乾曜自梁州都督召見神氣爽澈占對有序帝悅之擢少府少監兼邠
王府長史累進尚書左丞四年拜黃門侍郎同紫微黃門平章事踰月與姚崇俱罷會帝東幸以京兆尹
留守京師治尚寬簡人安之居三年政如始至仗內白鷹因縱失之詔京兆督捕獲於野絀榛死吏懼得
罪乾曜曰上仁明不以畜玩實罪苟其獲戾尹專之遂入自劾失旨帝一不問眾伏其知體而善引咎八

年復為黃門侍郎同中書門下三品進位侍中建言大臣子併求京職俊父率任外官非平施之道臣三
息俱在京師請出一息補外以示自近始詔可乃以子河南參軍弼為絳州司功太祝潔為鄭尉詔曰乾
曜身率庶寮以讓既請外其子又復下遷傳不云乎范宣子讓其下皆讓晉國之人於是太和道之或行
仁豈遠哉其令文武官父子昆弟三人在京師者分任于外絲是公卿子弟皆出補帝嘗自較其考與張
說偕賜時議者言國執政所以同休戚不崇異無以責功帝乃詔中書門下共食寶戶三百堂封自此始
東封還為尚書左丞相兼侍中久之罷侍中遷太子少師避祖名更授少傅安陽郡公帝幸東都以老疾
不任陪扈卒贈幽州大都督乾曜性謹重其始仕已四十餘歷官皆以清慎恪敏得名為相十年與張嘉
貞張說李元紘杜暹同秉政居中未嘗廷議可否事晚節唯唯聯署務為寬平悼大故鮮咎悔姜皎為嘉
貞所排雖得罪訖不申救君子譏焉族孫光裕亦有名居官號清愿撫諸弟友義為中書舍人與楊滔劉
令植同刪著開元新格歷尚書左丞會選諸司長官為刺史光裕任鄭州為世良吏卒官子清以雍睦保
家士友推之天寶中為給事中襄州刺史安祿山犯河洛為江陵大都督長史以禦賊卒贈禮部尚書諡
曰懿

裴耀卿字煥之靈州刺史守真次子也數歲能屬文擢童子舉稍遷祕書省正字相王府典籤與掾巨悅

文學章利器更直備顧問府中號學直王卽帝位授國子主簿累遷長安令舊有配戶和市法人厭苦耀卿一切責豪門坐賈預給以直絕傲欺之弊及去人思之爲濟州刺史濟當走集地廣而戶寡會天子東巡耀卿置三梁十驛科斂均省爲東州知頓最封禪還次宋州宴從官帝歡甚謂張說曰前日出使巡天下觀風俗察吏善惡不得實今朕有事岱宗而懷州刺史王巨飭率外無它獻我知其不市恩也魏州刺史崔沔遣使供帳不施錦繡示我以儉此可以觀政也濟州刺史裴耀卿上書數百言至曰人或重擾卽不足以告成朕置書座右以自戒此其愛人也俄徙宣州前此大水河妨壞諸州不敢擅興役耀卿曰非至公也乃躬護作役未訖有詔徙官耀卿懼功不成弗卽宣而撫巡飭厲愈急隄成發詔而去濟人爲立碑頌德歷冀州入拜戶部侍郎開元二十年副信安王禕討契丹又持帛二十萬賜立功奚官耀卿曰幣涉寇境不可以不備乃令先與期而分道賜之一日畢突厥室韋果邀險來襲耀卿已還遷京兆尹明年秋雨害稼京師飢帝將幸東都召問所以救人者耀卿曰陛下旣東巡百司畢從則太倉三輔可遣重臣分道賑給自東都益廣漕運以實關輔關輔旣實則乘輿西還事蔑不濟且國家大本在京師但秦地狹水旱易匱往貞觀永徽時祿粟者少歲漕粟二十萬略足今用度寔廣運數倍且不支故數東幸以就敖粟爲國大計臣願廣陝運道使京師常有三年食雖水旱不足憂今天下輸丁約四百萬使丁出百錢爲

陝洛運費又益半爲營窰用分納司農河南陝州又令租米悉輸東都從都至陝河益滿沮若廣漕路變陸爲水所支尙贏萬計且河南租船候水始進吳工不便河漕處處停留易生隱盜請置倉河口以納東租然後官自顧載分入河洛度三門東西各築敖倉自東至者東倉受之三門迫險則旁河鑿山以開車道運數十里西倉受之度宜徐運抵太原倉趨河入渭更無留阻可減費鉅萬天子然其計拜黃門侍郎同中書門下平章事充轉運使於是置河陰集津三門倉引天下租繇盟津沂河而西三年積七百萬石省運費三十萬緡或曰以此緡納於上足以明功答曰是謂以國財求寵其可乎敕吏爲和市費遷侍中二十四年以尙書左丞相罷封趙城侯夷州刺史楊潛以贓抵死有詔杖六十流古州耀卿上言刺史縣令異諸吏爲人父母風化所瞻今使裸躬受笞事大逼辱法至死則天下共之然一朝下吏屈挫率頓民且哀憐是忘免死之恩而有傷心之痛恐非崇守長勸風俗意又雜犯抵死無杖刑必三覆後決今非時不覆或天其命非所以寬宥之也凡大暑決囚多死秋冬乃有全者請今貸死決杖會盛夏生長時並停則有再生之實是時特進蓋嘉運破突騎施還詔爲河西隴右節度使因令經略吐蕃嘉運以新立功日酣邀未赴屯耀卿言於帝曰嘉運精勁勇烈誠有餘然臣見其夸言驕色竊憂之恐不足與立事今盛秋防邊日月已薄當與軍中士卒相見若不素講雖決在一時恐非制勝萬全之義且兵未及訓不能知法

士未懷惠不可共心使幸而有功非師出以律之善又萬人之命倚於將示不得已故鑿凶門而出今酣
嗽朝夕胖肆自安非愛人憂國者不可不察苟不易帥宜嚴詔申約以督其行帝乃促嘉運詣部卒無功
還天寶初進尚書左僕射俄改右僕射而李林甫代之上日林甫至本省具朝服劍佩博士導郎官唱按
禮畢就耀卿聽事乃常服以贊者主事導唱林甫驚曰班爵與公同而禮數異何也耀卿曰比苦眩不堪
重衣又郎博士紛泊非病士所宜林甫默然慙居一歲卒年六十三贈太子太傅諡曰文獻子綜吏部郎
中綜子信

信字弘正幼能文第進士補校書郎判等高授藍田尉德宗詔發畿縣民城奉天嚴郢爲京兆政刻急本
曹尉韋重規妻乳且疾不敢免信請代役要如程當時稱其義帝幸梁信奔見行在授補闕李懷光以河
中叛信建議請討帝深器之詔用盧杞爲饒州刺史與諫官執不可歷遷諫議大夫黔中視察使韋士文
爲夷獠所逐詔信代之部夷安服歷同州刺史中書舍人遷尚書右丞時李異以兵部尚書領鐵將選
使局就本曹經構已半會信至以爲不可異雖怙恩而彊猶撤之時重其有守改吏部侍郎以疾爲國子
祭酒工部尚書卒贈吏部尚書諡曰貞信清勁明銳所與友皆第一流鄭餘慶尤厚善旣歿餘慶爲行服
士林美之

贊曰開元之盛所置輔佐皆得賢才不者若張源等猶惓惓事職其建明有足稱道朝多君子信太平基
礎張氏三世宰相然器有所窮嘉貞窮於俗延賞窮於伎弘靖窮於權惜哉

唐書卷一百二十七

唐書卷一百二十七考證
張嘉貞傳選出爲幽州刺史○魏書因出爲幽州刺史

唐書卷一百二十七考證

唐書卷一百二十七考證

